

প্রবন্ধ-মালা


(প্রথম খণ্ড : সাহিত্য বারো ভাষা)

ডঃ কালীপ্রসাদ সিংহ এম. এ., পি. এইচ.- ডি., ডি. লিট.

অজা বাবাইসেনা প্রকাশনী

কচুধরম,

চেংকুড়ি, শিলচর ৭৮৮০০৭



প্রবন্ধ-মালা

(প্রথম খণ্ড : সাহিত্য বারো ভাষা)

ডঃ কালীপ্রসাদ সিংহ এম্. এ., পি. এইচ.-ডি., ডি. লিট.

অজা বাবাইসেনা প্রকাশনী

কচুখরম,

চেংকুড়ি, শিলচর-৭৮৮০০৭

Prabandha Mālā

By

Dr Kali Prasad Sinha M.A., Ph.D., D.Litt.

পইলা সংস্করণ :

শ্রীপঞ্চমী (৫ই ফাল্গুন, '৮৯সন)

১৮ই ফেব্রুয়ারী, '৮৩ ইং.

প্রকাশনাত :

শ্যামানন্দ সিংহ

অজা বাবাইসেনা প্রকাশনী

কচুখরম,

পোঃ—চেংকুড়ি, শিলচর-৭৮৮০০৭

ছাপানিত :

ইমাগো প্রেস

কচুখরম,

পোঃ—চেংকুড়ি, শিলচর-৭৮৮০০৭

দাম :

রূপা ৮.০০

ভূমিকা

ডঃ কালীপ্রসাদ সিংহর প্রকাশিত বারো অপ্রকাশিত প্রবন্ধ বারো ভাষণ হাবি পদলকারিয়া 'প্রবন্ধ-মালা' নাঙে গ্রন্থাকারে তিন খণ্ডত প্রকাশ করানির দায়িত্ব অজা বাবাইসেনা প্রকাশনীয়ে নৌছিগা । বর্তমান খণ্ডত ডঃ সিংহর বিষ্ণুপ্রিয়া মণিপুরী সাহিত্য বারো ভাষা সম্পর্কীয় প্রবন্ধ বারো ভাষণ প্রকাশিত অইল । দ্বিতীয় খণ্ডত বিষ্ণুপ্রিয়া মণিপুরী সমাজ বারো সংস্কৃতি সম্পর্কীয় প্রবন্ধ এবং তৃতীয় খণ্ডত গীতিম্বামী, সাধু, ঠাকুর ইত্যাদি মহান গিরকগাছির সম্পর্কিত প্রবন্ধ বারো ভাষণ প্রকাশিত অইতই ।

সূচী

প্রবন্ধের নাম	পৃষ্ঠা
১। বিষ্ণুপ্রিয়া মণিপুরী সাহিত্য সাধনা	১
২। বিষ্ণুপ্রিয়া মণিপুরী লোক-সাহিত্য	৩৪
৩। বিষ্ণুপ্রিয়া মণিপুরী সাহিত্য (অতীত, বর্তমান বারো ভবিষ্যৎ)	৩৯
৪। বিষ্ণুপ্রিয়া মণিপুরী শব্দ ভাণ্ডার	৬১
৫। বিষ্ণুপ্রিয়া মণিপুরী সাহিত্যের ভাষা	৬৯

বিষ্ণুপ্রিয়া মণিপুরী সাহিত্য সাধনা*

পুলোদৌছি সম্মানিত গিরিগিথানি বারো বেইবুনি-বনকলকেই—

সাহিত্য সভার সভাপতির দায়িত্ব মিয়াম ডাঙর। সমগ্র সাহিত্যহানর গজে সম্পূর্ণ আধিপত্য নাথাইলে অর্থাৎ সমগ্র সাহিত্যহানর প্রত্যেক শাখা এবং প্রত্যেক লেখক সম্বন্ধে পরিষ্কার ধারণা নাথাইলে সাহিত্য সভার সভাপতিত্ব করানি মিয়াম কঠিন। অথচ আজিকার সভাপতি এগোরতা বিষ্ণুপ্রিয়া মণিপুরী সাহিত্য সম্বন্ধে কতিহান জ্ঞান আছে উহান সম্বন্ধে সন্দেহর অবকাশ আছে। সভাপতির দায়িত্ব এহানর পোহান পেইলুতাও অনেক ডিলকরে। উতার গজে, মোর সংগৃহীত করপেথ কতোহান শিলচরে থা পরানিয়ে ভাষণহান সবাঙ্গসুন্দর করানি নুৱারলু। মোর এসসামথ' এহানরকা উপস্থিত সজ্জন মণ্ডলীরাঙ মি কমা চাউরি। আজিকার মোর বক্তব্যত পয়লা বিষ্ণুপ্রিয়া মণিপুরী সাহিত্যর ঐতিহাসিক আলোচনা আহান করিয়া পিছে সাহিত্যর ভাষা, বানান বারো সাহিত্য পরিষদ সম্বন্ধে বক্তব্য আহানি থনা মনাছু।

বিষ্ণুপ্রিয়া মণিপুরী সাহিত্যর ইতিহাসহানরে প্রধানতঃ তিনহান ভাগে ভাগ করে পারিয়ার—(১) প্রাচীন যুগ, (২) আদি আধুনিক যুগ বারো (৩) অত্যাধুনিক যুগ।

(১) প্রাচীন যুগ

বিষ্ণুপ্রিয়া মণিপুরী সাহিত্যর প্রাচীন যুগ রচিত অছেতা লোক-সাহিত্যর—বিশেষ করিয়া লোকসঙ্গীতর মাধ্যমে। লোকসাহিত্য বুলতে আমি হারপেয়ারতায়, কুনো অজ্ঞাত সময়ত মানুৱ থতান্ত সবাবিক ভাবে নিকুলেছে, অথবা কুনো অজ্ঞাত মানুৱেলো রচিত অছে বারো

★ ১২ই এপ্রিল, '৭৫ ইং হিজারীত অনর্দীষ্টত অছিল বিষ্ণুপ্রিয়া মণিপুরী সাহিত্য সম্মেলনে দৌছিল সভাপতির ভাষণহান।

মানুষ মূখে মূখে প্রচলিত আছে সাহিত্য উতা । এটা স্বাভাবিক ভাবে বা স্বল্পচেষ্ঠায় মানুহরাঙতো নিকুলের বুলিয়া স্বভাবতঃই এতার লগে ঔ ঔ সময়কার মানুহর জীবন-দর্শন, ধর্মবোধ, রুচি, বিশ্বাস, কৃষ্টি ইত্যাদি আত্মপ্রকাশ করে । উহানলো, জাতর ধর্ম, দর্শন, কৃষ্টি বারো ভাষার ইতিহাসে লোবসাহিত্যর মূলা অপরিসীম ।

আমার লোকসাহিত্য এতারে মোটামুটি চারিহান ভাগে ভাগ করে পারিয়ার—(১) য়ারি, (২) এলা, (৩) কবিতা বারো (৪) পোরেই ।

বিষ্ণুপ্রিয়া মণিপুরীরাঙ প্রচলিত য়ারির মাঝে ‘আপাঙর য়ারি’ এতায় হাবিত মিয়াম প্রচলিত আছে । আপাঙর য়ারির পিছে আহেরতায় রাজা-মন্ত্রী বিষয়ক য়ারি, অর্থাৎ রাজা-রাণী, রাজার পুতক-মন্ত্রীর পুতক, রাজার জিলক-মন্ত্রীর জিলক—এতার য়ারি । উতার পিছে সরাহালর সাতগো নিঙোলর য়ারি আকতা আমার লোকসাহিত্যত উল্লেখযোগ্য ফাম আহান দখল করিয়া আছে । (বিস্তৃত আলোচনারকা ‘গোধূলি’ ২য় সংখ্যা দৃষ্টব্য) ।

লোকসাহিত্য এলার মাঝে হাবিত প্রসিদ্ধহান অইলতায়—বরণ ডাহানির এলাহান (প্রতিশ্রুতি’ ১ম সংকলন দৃষ্টব্য) । “খুমেলর (মতান্তরে ‘খুমলো’) মাটি হুকেইলো, বরণ দিয়াদে (মতান্তরে ‘দে’) দৌরাজা (মতান্তরে ‘বৌরাজা’)”—এ টুকরাএহান নাহুর্নোই বারো উচ্চারণ নাকরোই মানু আগো আমার এ বিষ্ণুপ্রিয়া মণিপুরী সমাজে থা থাইবা বুলিয়া না নিঙকরোরি । এলা এহানাত প্রাচীন ধর্ম, ভাষা বারো জাতর ইতিহাসর অনেক খুরাক পেয়ার । মণিপুরে সময় অহানাত আমার ভাষাএহান প্রচলিত অছিল, উহানর জাজ্জল্য প্রমাণ এলা এহানে দে—

“খুমেলর মাটি হুকেইল, বরণ দিয়াদে দৌরাজা”—এলা এহানাত হারপেয়ার যে, ঔ সময়ত আমি বৈষ্ণব ধর্মত দীক্ষা নানেইলাঙগা, পাহাংপা বারো সরালেন দিয়োগো দৌর মাঝে উচ্চহান পাইলা । এলা এহানে প্রমাণ করে যে, ঔ সময়কার বিষ্ণুপ্রিয়া মণিপুরী ভাষাত মেইতেই ভাষার প্রভাব জবর অছিল (‘কৈফৎ’ ১ম সংখ্যা দৃষ্টব্য) । উতা ছাড়া ঔ

সময়কার কাব্যচেতনা সম্পর্কে এলা এহানাত অনেক ধারণা পেল্লার । মি
মিয়াম হবা পাছ পারেঙ কতোহান না মাতিয়া নুৱারল—

(ক) “বাটিয়ে আলি কারিরী মাঝে খংনেমে ।

মুঠি মুকা চেইলুতা সেনাচাংনিঙে ॥”

(খ) “ডেইনাই দিল দুনুকহান ছিড়্তৌ না ছিড়ের ।

উঠানর আগার বেকুরিজার দরতৌ না দরের ॥”

হুন্দা এ বরণডাহানির এলা এহানলো ডাঙর আলোচনা আহান
সম্ভব, সময়ভাবে আর আলোচনা না করলাঙ ।

উতার পিছে হাবিত্ত প্রসিদ্ধ এলাহান অইলতায় —মাদই-সরারেলর
এলা উহান । এলা এহানাত প্রমাণ অর যে, আমার পূর্ব-পূর্বুষে মদ
পিয়োছিল, বারো হুৱরর মাংস খাছিল—

“না খেইগা মাদই না খেইগা, তোর বাবারো ঘরে না খেইগা

তোর বাবারো ঘরে গেলগা মদরো শরাপ পিতেইগা ॥

মদরো শরাপ পিতেইগা, হুৱর পহু খেইতেইগা ॥” ইত্যাদি

এপেল গাঁতসনামী গিরকর এলা তুপ আহান নিঙনিঙ অয়ার—

“আগে আমার বেয়াপায়তে মাহু মাংস খাছিল ।

কুকীৰ সাদে জুৱা বাধিয়া কানে কলঠং লাগেইলা ॥” ইত্যাদি

এলা এহানি কুন সময়র লেখাহানি, ঔ সম্বন্ধে আমার কুনো সঠিক
ধারণা নেই । বরণ ডাহানির এলা উহানাত বিভিন্ন সময়র রচনার নিদর্শন
পেল্লার । প্রাচীনতম অংশ উহানি রচিত অছেতা আনুমানিক ১৬শ শতকর
মাকামাকিত । বাকী অংশ উহানি পরবর্তী যুগে বিভিন্ন সময়ত রচিত
অছেতা ; কুনো কুনো অংশ ১৮শ শতাব্দী পেল্লা, এমন কি বিংশ
শতাব্দী পেল্লা সম্ভবতঃ আহের । মাদই-সরারেল এলা উহান রচিত
অছেতা আনুমানিক ১৮শ শতাব্দীর মাকামাকিত, যেবাকা বৈষ্ণব ধর্ম
মণিপুৰে প্রচারিত অনার ফলে সমাজে ধর্মীয় দবন্দব আহান দেহাদিল ।
কারণ, এলা এহানাত কৃষ্টিৰ দবন্দব আহানর উল্লেখ পেল্লার (‘কৈফৎ’
১ম সংখ্যা দৃষ্টব্য) । স্মারি সম্পর্কীয় এলার মাঝে পানি বারো তেইর

বেয়কর য়ারি আহানর ভিতরেও এলা পদ কতগো আছে ।

“পানিরো পানি, আইনে ঘরে ষিকগা ।

—নাইতৌ নাইতৌ নাইতৌ ;

আগেতে তোর জিলক অছিল, এবাকাতে তোর বহক অইল ।”

এ য়ারি এহানাত ট্রেজেরি আহান আছে, উহান বিশেষভাবে লক্ষণীয় ।

এতা ছাড়া ইমা-ইন্দোলে সিংনা দিয়া রুৱা রুৱেইতে দিলা অনেক এলা আছে । যেমন—

“হুন্যারো অটিয়ো, রুপারো অটিয়ো,

পানা পাতা, গুৱা চিলা পাতালা গুছা দেই ।

সুনু তুকতা নামকরে খেই হুচিকা গুছা দেই ।”

কৃষি সম্পর্কীয় এলার পিছে আহেরতায়, গৃহকর্ম সম্পর্কীয় এলা অর্থাৎ ফুতি বুনতে, ঘর লেপতে বা ধান বানতে ইমা-ইন্দোলে দিলা এলা ।

যেমন—

“বাগা আতে খারৌ নেই, কাগছিড়া কাগে আঙঠি নেই ।

পালছে পালছে গিদেইর কাগহান ছিড়েছে ।”

শৌ ঠেমকরানির এলাও অনেক প্রচলিত আছে । যেমন—

“জাপিরো ফেন, উদুরর কাগ,

চিংনা চেরৌ দাতিনী, আড়ুৱা বেম্বুল সাদিনী ।” ইত্যাদি ।

এছাড়া হাস্যরস সৃষ্টি করানির উদ্দেশ্যে হুঙকরা আরতাও অনেক এলা আছে ।

কবিতার মাঝে হাবিস্ত মিয়াম প্রচলিত অয়া আছেতায় খেলার ছড়া ।

আগরদিনে বিভিন্ন রকম খেলা আমার সমাজে প্রচলিত অছিল, উতার মাঝে বিভিন্ন রকমর ছড়া ব্যবহার করলা । যেমন—

(ক) “পানি খেজং নাখেজং খেজঙে নাখেজং ।

মৈরাঙ কাওনা কাওনাছে, সারি কাওনাছে ।”

(খ) “কুকারা কুকুরী সনে বনে, বন কুকারায় নাহেইব

খেইব পহুর কাগ

(গ) “চিণ্টকি মিণ্টকি, নাই অরে ধানর তল,

কালি আইলে পুড়ামাছ আগোয় ভাত আককামড়ে

থেইছগা থেইছগা,

এরা দিলু বেরা দিলু দরারর কোণে লুকেইছগা লুকেইছগা ।”

(ঘ) “পারোঁও কুরকুরার পারোঁও কুরকুরার

পারোঁর নাছা চেইতেতে বেলীও হমেইলগা ।” ইত্যাদি ।

এতার পিছে শৌ ঠেমকরানির ছড়ার কথা আহের । শৌ ঘুমুদরানির ছড়া এতা পৃথিবীর হাবি জাতরাঙ আছে ; আমার বিষ্ণুপ্রিয়া মণিপুরীরাঙও উহানর ব্যতিক্রম নাহে । যেমন—

“ঘরর বারাদে মেকুরগো, বাহার তলেদে তকপাগো ।

মেকুরগোও কেঙ তকপাগোও কেঙ,

ঘরোবারাদে টপপ পড়িয়া পড়াধানগোও খুটেইলো কাজে

মুরে বারি দিয়াও কঙ ।”

এ এলা বারো ছড়া এতার অধিকাংশই বিংশ শতকর পয়লাকার অথবা বিংশ শতকর খানি আগেকার রচনা । এ এলা বারো ছড়া এতার সাহিত্যিক মূল্য নিতান্ত কম নাগয় ।

পৌরেই আমার ঠারর লোকসাহিত্যর অমূল্য সম্পদ আহান । ‘প্রতিশ্রুতি’ পত্রিকায় আমার রঙ্গএতা সংগ্রহ করাত লাগেছে এহান মিয়াম হারোর কথাহান । হুন্দা পৌরেইলো ডাঙর আলোচনা আহান অনা য়াকরের, কিন্তু আজ সম্ভ্রান্তভাবে ও আলোচনাত নাগেলাঙগা, হুন্দা এহান মাতিয়া মি লয়করানি মনার্জিৰ ঘে, আমার পৌরেইর ভিতরে আমার পূর্বপুরুষর ছন্দজ্ঞান, অলংকারজ্ঞান, সুক্ষ্মদর্শিতা বারো বুদ্ধিমত্তার পরিচয় পেয়ার । মি মিয়াম নুঙেই পাছ পৌরেই কতোহান নামাতিয়া নুদ্বারলু—

(ক) গিদেইয়ে রাস করানি, সাজৌরে ধার দেনা ।

(খ) ধরায় লাম লইলা, চাকালায় বনে হমেইলা ।

(গ) এমারি বার্তন, বুলনে কীর্তন ।

(ঘ) বলে ছলে বামনে খানা, পিতৃলোকে উদ্ধার পানা ।

(ঙ) ঘাম খেঁরি বেলে ঝলখেঁরি খানা ।

(চ) খাছি উতারকা ভাত রাধো, নাহাছি উতারকা ধান বানো ।

প্রাচীন সাহিত্যর আলোচনাহান সংক্ষেপে এপেয় লমকরিক ।

(২) আদি আধুনিক যুগ

আদি আধুনিক যুগর বিষ্ণুপ্রিয়া মণিপুরী সাহিত্য নিকুলানি অকরলতা এ শতাব্দীর তৃতীয় দশকেন্ত । আদি আধুনিক যুগর পয়লাকার স্মরণীয় লেখক চারিগো — লেইখোমসেনা সিংহ (সিঙ্গারী), মদন মোহন শর্মা (শনিছড়ার এইগা), আমদুসেনা সিংহ (চিপরসান্দন) বারো গোকুলানন্দ গীতিস্বামী ।

লেইখোমসেনা সিংহর ‘বন্দুবাহন’ বারো ‘মণিপুর বিজয়’ নাটক দিয়োহানি মিয়াম খ্যাতি লাভ করেছিল । এতাছাড়া আর কি কি রচনা আছিল উহান সঠিক মাতে নুৱারিয়্যার । তার রচনার মাঝে ‘বন্দুবাহন’ নাটক উহান অনেক চেষ্টা করিরাও মি জোগাড় করে নুৱারেছু । এ নাটক এহান সিঙ্গারীর শ্রীযুক্ত কমল সিংহ গিরকরাঙতো ১৯৪২ (?) ইংরেজীর পানিত বাহিয়া গেহেগা বুলিয়া হুনলু । ‘মণিপুর বিজয়’র অংশ আহান ১৯৬৬ ইংরেজীত মি সিঙ্গারীর শ্রীঅবন্তী কুমার সিংহ গিরকরাঙতো সংগ্রহ করেছু । শ্রীঅবন্তী সিংহ গিরকর মতে এ করপেখ এহান ১৯৪২ ইংরেজীর পানিত বাহিয়া গিয়া তানুর মরকসির বাড়ীহানাত আটকিয়া আছিল ; উপেইন্ত তা লকরিয়া থহেতা উনি । ‘মণিপুর বিজয়’র ভাষান্ত প্রমাণ অর লেইখোমসেনা গিরকরতা ভাষার গজে মিয়াম দখল আছিল । উদাহরণ সদরূপ—

“লেইরা অইলে জাত নেই মান নেই

আহ হাবিয়ে মোরাঙ চেই ।

হুরপাদিয়াদিক লেইরা অইলে

রাজাগোরতাও মানহান নেই ।”

তবে ফামে ফামে শব্দ চয়নর দোষে তারাও কাব্যরস খানি ব্যাহত
অছে । যথা—

“কাণ উহান চেইতে লাঙটিয়া রাজায় লাজপেইব ।

পাম্পল উগো চেইতে বদম্বাই মৌতুপ পারা ॥”

লেইখোমসেনা সিংহ গিরকর রচিত অনেক এলা আছিল বদলিয়া
হুনিয়ার, কিন্তু উতা সম্বন্ধে কোনো নিভরবোগ্য নিদর্শন নাপাছ ।

“আহনে হমাজিগাছিরে,

চেয়াও আইকগা মণিপূরর হবাহান ”

এলা এহানও গিরকউগোরহান বদলিয়া হুনিয়ার, কিন্তু মি পাছ
‘মণিপূর বিজয়’ উহানাত এহান নাপাছ । তার পুতক শ্রীদেবেন্দ্র কুমার
সিংহ গিরকরাঙতো সংগ্রহ করেছ এলাউতান্ত অংশ আহানি হুন্দরেইঙ—

“জিত যুধী ফুল মালতী লেহাও চিকঙলেই ।

হবা হবা ফুল ছিড়িকগা গোকুল সিঙ্গারেই ॥

কাল চিঙখেইর কালাহানায় পূজা করতে দৌ ।

কেতকীর গতহান মূরগোত করিয়া আহিল কঙালা বৌ ॥

টপ টপ টপ টপ টপ করের তুল তুল ।

অজাগো পেয়া নাছতারা আজি হাবি বনর ফুল ॥

গুণ গুণ গুণ করিয়া ভ্রমর আইলা ফুলর বনে ।

নানা জাতর ফুলর রস পিতারা ধুণে ধুণে ॥”

এতার ভিতরে কঙালা কাব্যরস আহানর নিদর্শন আছে, উহান
অসদ্বীকার করানিরহান নাগর ।

শনিছড়ার মদনমোহন শর্মা গিরকর রচনা উতা তার পুতকরাঙতো
মি ১৯৭২ ইংরেজীর জুলাই মাহাত সংগ্রহ করেছ । মদনমোহন শর্মা
গিরকে অনেক গ্রন্থ ইকরে গেছেগা—‘কালিপিণ্ড’, ‘হরিশ্চন্দ্র’, ‘সুবলমিলন’,
‘তিলত্তমা’, ‘বাসক’, ‘সুদামাবিপ্ৰ’ ইত্যাদি । এতার অধিকাংশই এলা
বারো কীর্তনর উপযোগী করিয়া ইকরা । গিরক উগোর এতা এলা দিয়া
দিয়া বুল্লগো । এ রচনা এতার সাহিত্যিক মূল্য মিয়াম কম—ছন্দ নেই,

জুর করিয়া সুর মিলানির চেষ্টা আছে, বারো অনেক হালকা শব্দর ব্যবহার আছে । তবে এতার ভিতরেও হৃদি হৃদিত হ'বা পারেও কতোহান দেহিয়ার । যেমন—

(ক) “টেইপাঙ মান্দুর দেহ এগো যেমন খলর খুটাগো ।

লুহার দাঁড় ছিড়ে পার্ণা টেইপাঙ মান্দু এতা ।

মান্নার দাঁড় ছিড়ে নুৱাৰ্ণা নরকে পড়তারা ॥”

(খ) “ছিড়তারা চিকঙলেই উহুলতারা মাকাকলেই ।”

এ বিখ্যাত এলাএহন ঔ গিরক উগোর লেঙকরাহান ।

আমুসেনা সিংহ গিরকর রচনা হাবি রামায়ণর কাহিনীর গজে, আরো উতা রামায়ণ কীর্তনর উদ্দেশ্যে রচিত আছেতা । তা নিজেও এতালো রামায়ণ কীর্তন বরছেগো । তার রচনার মাঝে ‘অঙ্গদ রায়বার’, ‘শক্তিশেল’, ‘তরণীসেন বধ’, ‘নাগপাশ’, ‘মহীরাবণ বধ’—এহানি মি পাছু । এহানি মি সংগ্রহ করেছুতা তার পড়ুৱা বাটাখালর শ্রীহুনাইণো সিংহ গিরকরাঙতো, ১৯৭৪ ইংরেজীর নভেম্বর মাহাত । শ্রীহুনাইশা সিংহ গিরকর মতে, আমুসেনা সিংহ গিরকর দেহত্যাগর পিছে তার করপেখ উতা হাবি ধলেশ্বরী নদীত বেলাদেছিলো ; উতা বাহিয়া যিতেগা ইঙচিল পাতিয়া খাতা আহান ধরেছি, বাকী উতা উদ্ধার করে নুৱারেছি । বর্তমানে আবে বচেনা উতা তা নিঙশিঙ অয়া অয়া ইকরেছেতা বুলিয়া হুনাইণো গিরকে মাতের । সুতরাং এতার প্রামাণ্য সম্বন্ধে যথেষ্ট সন্দেহ আছে । তবুও যেতা পেরার উতारे আমুসেনা সিংহ গিরকর রচনা বুলিয়া ধরিয়া নিয়া মাতে পারিয়ার যে আমুসেনা সিংহ গিরকর রচনাত কবিষর প্রচুর নিদর্শন আছে । দৃষ্টান্ত সদরূপ—

(ক) “যাগা যাগা বাছাধন

দুঃখিনীর অঙলর রতন

জ্বালায় জ্বালায় জ্বলিয়া থাইলু

পরাণ ধনরেও এরাছিলু ॥”

(খ) “ধর ধর ধনুকাহান চেইতৌ তোর পাণ্ডালহান ।

মোর আতর মাঝে রাম অইতেই মরণহান ॥”

(গ) “দিয়েগোর লাগলা লাগলা যুদ্ধ অকরলা ।

তানু দিয়েগোর ভরিহানায় লঙ্কাহান লরেইলা ॥”

(ঘ) “অঙ্গদয় মমতেরতা হুন ইন্দ্রজিতা ।

বাঁহি রাবণ এতা হাবি তোর বাপক অঁহিতা ॥”

এসাদে এলা এতায় আমারে প্রচুর আনন্দ দেব । এতা আমনুসেনা
সিংহ গিরকর রচিত রামায়ণর টুকরা আকেইহান ।

সাধারণভাবে মাতিক বুল্লে এ লেখক এগিরাঙতো মিয়াম সাহিত্যিক
অবদান আশা করে নুঝারিয়ার । কারণ, তানুর সময়ত সাহিত্যর ভাষা
বারো রচনাভঙ্গির কুনো নির্দিষ্ট সদরূপ আহান লেপ নাছিল । তবে
তানুর সাহিত্য উত্তরে সাহিত্যিক সমালোচনার সুক্ষ্মদৃষ্টিচো চানা উহান
থক নেই । তানু যে আমার সাহিত্যর পয়লাকার পথগো দেহেয়া নুঝা
যুগ আহানর রচনা করেদেছি, উহানরকাই আমি সমগ্র সমাজহান তানুরাঙ
চিরকুত্তর । তবে গীতিস্বামী গিরকরাঙ দেহিয়ারতাই অভিনব আহান—
সাহিত্যিক চিন্তাধারার যথার্থ প্রকাশ আহান ।

গোকুলানন্দ গীতিস্বামী গিরকর রচনা উত্তরে প্রধানতঃ তিন ভাগে
ভাগ করে পারিয়ার—(১) সামাজিক সংস্কার মূলক, (২) পদাবলী কীর্তন
বারো (৩) অন্যান্য কবিতাবলী । সামাজিক সংস্কার মূলক রচনার মাঝে
‘মাতৃমঙ্গল গীতাভিনয়’, আরাক বেনামী নাটক আহান বারো বিচ্ছিন্নভাবে
রচিত এলা কতোহান আছে । এতা মি গীতিস্বামীর জিলক স্ত্রীমতী
রোহিনী সিংহ গিথানকরাঙতো ১৯৬৬ ইংরেজীত সংগ্রহ করেছুতা ।
‘মাতৃমঙ্গল গীতাভিনয়’র পয়লাকার এলাউহান বিখ্যাত বারো কাব্যরসে
পরিপূর্ণ । যথা—

“ইমা ইমা তোর মহিমা কিতা মাততু শৌগো মি ?

জিপুত পাচগো পেইলে, হাবি মান্না নাইলে,

তোরাঙতে ইমা হাবিও মান্না ।

মান্নারে আলিশেইতারা উগো তোরাঙতে তাম্ফাগো

উগোর কাজে বুলিয়া মরুরি ॥

ইমার স্নেহ সিন্ধু ক্ষুদ্র এক বিন্দু হুজানির কাজে বুলিয়া ।

দেশে দেশে গিয়া ইমার গুণখান গেয়া, পাগলগোর সাদে বুলুরি ॥”

এহানিত নিপুণভাবে ইমার গুণ বারো ইমার প্রতি শ্রদ্ধা বর্ণনা করে
গেছেগা । ঐ নাটকর—

“সত্য ব্রেতা রুহীহান্না কলিযুগে না চলতই ।

রুহীবৃতি মৌতুপ বুলিয়া ধরিয়া থইলেও না চলতই ॥

কালে কালে কালর কথা নাহুনানি না করের ।

জিগোয় বনহান পুড়িয়া আনলে কাচায় মজায় না ধরের ॥”

একথা এহানি গীতিসন্ধানী গিরকরে ঋষিতুল্য করেছে । এ ‘মাতৃমঙ্গল
গীতিভিনয়’ নাটকে গীতিসন্ধানী গিরকে ইমা-ইন্দোলরে বাজারে না
কাকরানিরকা বারো ইমা-ইন্দোলর সম্মান রক্ষারকা প্রচার করিয়া গেছেগা ।
বাজারে গেছেগা মণিপুরী ইমা আগোরে বাঙালী দোকানদার আগোয়
অপমান করল, উতার পিছে ইমা-ইন্দোলরে বাজারে না কাকরানিরকা
সত্যবাদী পাগল আগোর প্রচার বারো প্রচেষ্টা উহানেই এ নাটকর
উপজীব্যহান । এহানর পিছনে বাস্তবিক ঘটনা আহান আছে : শিলচরর
প্রেমতলার দোকান আহানাত আকদিন মেহেরপুর অঞ্চলেস্ত বাজারে কাছে
মণিপুরী গিথানক আগোরে দোকানদার আগোয় জাঙদাল দিয়া অপমান
করেছিল ; উবাকা গীতিসন্ধানী গিরকে থানান্ত পুর্লিশ আনিয়া ঐ
দোকানদার উগোরে অপরাধ স্বীকার করুবাছিল এবং উতার পিছে তা
ইমা-ইন্দোলরে বাজারে না কাকরানিরকা প্রচার কার্য চালাছিল । নাটক
এহানার সত্যবাদী পাগল উগো গীতিসন্ধানীর প্রতিরূপগো । এ সত্যবাদী
পাগল এগোর মাধ্যমে তা তার চিন্তাধারা প্রচার করে গেছেগা—তা
ইমা-ইন্দোলরে বাজারে না কানারকা বারো ঘরে বস্যা লুরিকাটারানিরকা এবং

পুঁতি বুনানিরকা অনুরোধ করে গেছেগা । এতার ভিতরে অর্থনৈতিক সমস্যা সম্বন্ধে গীতিসদামীর সচেতনতার নিদর্শন পেয়ার । প্রসঙ্গক্রমে তা আমার মূর্নি এতারে আটকুরা এবং আয়নর বংশধর অর্থাৎ নপুংসক বুলিয়া তিরস্কার করেছে । এতার ভিতরে তার যথার্থ দৃষ্টি এবং যথার্থ বাদিতার পরিচয় পেয়ার । আধুনিক নব্য শিক্ষিত যুবক সমাজের কর্মবিমুখতা, মালকর প্রতি তানুর অনাদর, নিজের গৃহিনীগোর প্রতি প্রেমের আধিক্য এতার বিরুদ্ধে তা দারুণভাবে কটাক্ষ করিয়া গেছেগা । যেমন—

“বস্ত্র আখান পেইলে ইমার কাজে বুলিয়া,
হপনেদে আকগোও নিঙশিঙ নাইলা ।

হবা হবা অস্তা বাছিয়া পুছিয়া থয়া,
হৌরয়করাও সালকরলা ॥

মইলকে জারপেয়া ফুঁতি আখান উরলেও,
‘তাপ উৎলিসাত’ বুলিয়া কাদিয়া বইলা ।
বুড়ী মালক উগো মরানিরকা অইলেও
কিমতো বুলিয়া না আঙকরলা ॥”

ইমা-ইন্দোলর প্রতি তার শ্রদ্ধার শ্রেষ্ঠ নিদর্শনহাঙ্গ এ নাটক এহান ।
তা মাতে গেছেগা—

“ধর্মসভা লাখে লাখে কাথি ভিক্ষা করেই,
করিয়া কিস্তাও সম্মান নেইব নারী সম্মান যে জাতে নেই ॥”
আরাক বেনামী নাটক আহানাত গীতিসদামী গিরকে আমার অর্থনৈতিক সমস্যা সমাধানর পথ দেহা গেছেগা । যেমন—

(ক) “মটর চানা জিরা বাখর মুগ সাগলখই আন্দি আদা
হাবি খেঁতিত্ত ফলেরতা ।

এতা হাবি খেঁতিত্ত ফলের আকতাও নাগই বিলাতি ।
নিজে আলহান ধরিয়াতে করলে কিহান গিরগ্গি ॥”

(খ) “ধানগুলি পা বেলবাতায় পাচাঁদন থাইলাই বুলিয়া,
কুরাও বাসক খুশাখুচেই বিছারা বিছারিয়া ।

পয়সা দুখান পেইবারতায়তে কীৰ্তন আখান হাজেইলায় ;
বি-গুরু-মোষ্ হাবি বেছিয়া ধারর তলে হাবি থাইলায় ।”

(গ) “থেইপঙ-হেইনু কম লাগিয়া হইরু আর গুরা লাগেই,
গিরিভিলো থেইক বুলেতে এখান ছাড়া উপায় নেই ।”

এসাদে, অতি হুকাঙ কথার ভিতরেদে গীতিসদামী গিরকর অর্থনীতির
বাস্তব দাঁড়িভঙ্গি আহানর পরিচয় পেলার । এ নাটক এহানাত দরিদ্র
প্রতি গীতিসদামী গিরকর অসীম দরদর নিদর্শনও পেলার—

“হুনা রূপানো তোর জিলক বুলিয়া সভাত নিলেগা হাজেয়া,
তোর বেইবুনির জেলাশৌ দিরোগো ঘরে থাইলা কাদিয়া ।”

লগে লগে ধনীৰ প্রতি তার তীর সমালোচনা আহিত পড়ের—

“বরাবালায় দেশ মেইলা

আকতার গজে আকতা নিকানিয়া লেইরাপা হাবি পাতালে গরলা ।”

লগে লগে সাম্যবাদর ধর্নি নিকুলে আহের তার লেখনীও—

“সাকেই জিপুতে পিদে নুৱারবা ওসাদে পোষাকহান বেলাদে ।”

‘মাতৃমঙ্গল’এ নব্যশিক্ষিত যুবকর কর্মবিমুখতার তীর সমালোচনা বরেছে,
এ বেনামী নাটক এহানাত নব্যশিক্ষিতা যুবতীরেও খানি বিধা আহানি
দেছে—

“আজি কালির পুৱিজেলা মৌ লাজহান কিহান হারনাপেইলা ।

গঠন গাঠন ফিজল করতে কামদুমতে আককোণে বেললা ॥”

পয়লা পয়লা আধুনিক শিক্ষা পেইলা উতায় আমার ভাষা টটরানি
লাজপেইলা, বাংলা টটরলা, পুরানা শিক্ষা পাছলা উতায় বারো মেইতেই
ভাষালো টটরলে এবং লেইরিক দিলে গর্ববোধ করলা । এ দিয়োর
বিরুদ্ধেও গীতিসদামী গিরকে প্রতিবাদ জানেয়া গেছেগা—

“কতিও তলইলাঙতা (আঁমি)

ততরানি এহান পেয়া ঘরে আকতা বারে আকতা ।” ইত্যাদি ।

সমাজের দলাদলির বিরুদ্ধে তাঁর তাঁর সমালোচনা আহিত পড়ের—

“সরদার নাগই দরবারের দৌ মন্দিয়ার বুল্লাও এতা ।

দুগোয় আগোয় হিঙ ধারেয়া গাঙ পাচ করত বর্টা ॥

বেয়ক দুগোয় কোঁলি লাগলা, দিয়োবারাদে দুগো থাইলা ।

বাপক আগোর কর্ম দুখান, তানু করুবেইটী ॥

মারূপ সাকেইর প্রেম না থুইলায় দলাদলি করিয়া ।

আগো মরলে আগোয় না চেইলায়, দলাদলির ফলতে এতা ॥”

আমার এলা, ঢাক ইত্যাদি বিদ্যা তালকরতারা উতায় তানুর বিদ্যা, পরিশ্রম বারো অর্থব্যয়ের উপযুক্ত দক্ষিণা না পেইতারা বুলিয়া দুঃখ করিয়া তা মাতে গেছেগা—

“বিদ্যা বেলা বেলেই (হাবিয়ে)

গৃহস্থিহে জবর করো মণিপূরীরাও বাখালহান নেই ।”

আমার ভিতরে ‘হুকী জাত’ ‘ডাঙর জাত’ বুলিয়া যে ভেদাভেদ করিয়ার উতার বিরুদ্ধে মাতেছে—

“নিজর আগোয় পিঠা ভাজলে জাত তল বুলিয়া নাও খেইলে,

হিনানি রাখিলগো নাসাও মিয়াঙর জিলিবি খেইলে ।

মিয়াঙর ছকা সুনু খেইলা, মাতলেও সেনা কেইথেল বুললা,

সংকীত’নে সুনু খেইতে জাতহান বিছারলা ॥”

‘রাজার গাঙ, মাদই গাঙ’ বুলিয়া যে বিভেদবুদ্ধি আহান আমরাও আছে, উহান সম্বন্ধে গীতিসবামীর ঐকামন্ত্রহান—

“রাজার গাঙ মাদই গাঙ যেতা বাপক আকগোর জিপুত এতা

তঙাল বুলিয়া জাত না বিছারেই ।

রাজার গাঙ মাদই বেলেই হাবিয়ে বিষ্ণুপ্রিয়া বুলেই

আমি হাবি ক্ষত্রিয় সন্তান ॥”

বিষ্ণুপ্রিয়া মণিপূরী জাত এহানরে ঘুম ভাগদুরেয়া পৃথিবীর মূণ্ডে নিকালানিরকা তার চেঁটার অন্ত নেই । তার সমাজ জাগরণী এলার মাঝে—

ক) “উঠো উঠো রাজার গাও উঠো উঠো মাদই গাও ।”

(খ) “বর দেই বর দেই গিরিগিথানি ।”

(গ) “অজ্ঞান আধারে মা ঘুমিতায় কতি ।”

(ঘ) “উঠো ক্ষত্রিয় সন্তান সলকরো জয় ভগবান ।”

ইত্যাদি এলা বিখ্যাত । এ জাত এহানরে জাগানির আকুল আকাংখাহান ফুটিয়া উঠেছে তার অমর লেখনীত—

“বারা বুলিয়া বুলিয়া হাবিয়ে থাইলাও ঘুমজিয়া ।

গোকুল কৌরায় বাছা নুরারিয়া কা কা বুলিয়া রহানি ॥”

লগে লগে তার আশার বাণী হুনিয়ার—

“কৌরায় রৌনি অকরলেতে দিল নাইল রাত পোহানি ।”

তা হারপাছে—তার-এ আশা এহান তার জীবদ্দশায় পরিপূর্ণ নাইতই, তবে আকদিন এজাত এহানাত সুদিন আহান আইতই, উহান তা আশা করিয়া গেছেগা—

“ভাগ্যলক্ষ্মী পেইলে হাবিয়ে বাটিয়া খেইলে

গোকুলরে না থয়ো চৌরোয়া ।”

কিন্তু এ অন্ধ সমাজ এহানে তার কথা হুনানিতে দুরেইর কথা, তারে পদে পদে অবহেলা এবং অপমান করলা । উহানে আহির পানি ফাটিয়া পড়ের তার এলাত—

“কার কাজে কাদৌরিতা আকগোয়ও হারনাপেইলা ।

হবার কাজে মাত্বেগাতে আরাক আহান নিঙকইলা ॥”

সিঙ্গারীর শ্রীরমণী মোহন সিংহ গিরকর সংগৃহীত বাংলালো লিখা আত্মজীবনীহানাত গীতিসন্ধ্যায় মাতিয়া গেছেগা—

“কেহ হল বাদী তাতে কেহ বা বিবাদী ।

পূর্ণমনোরথ মোর নাহি হল সিদ্ধি ॥”

গীতিসন্ধ্যার বাসক, মোকাবিলাস ইত্যাদি কীর্তন পদাবলী আমার সমাজে অপূর্ব । উতার আলোচনা দীঘল করিয়া সময় নষ্ট না করোঁর । হুদা মিস্ত্রাম হবা লাগের এলা আহানি উল্লেখ করিয়া এঁরঙ—

(ক) “শয্যা পূণ্যবতী আজি এ দুর্গতি দিলুনায়ে তোরে হাজেরা ।
 মনে মনে কত আশা করেছিল, প্রাণবন্ধু আইতই বুলিয়া ॥
 আর আশা নেই মৃগবারা ভালইল সিঙ্গারেই পড়িল শাতয়া ।
 তোরাও মিছাত পড়ল, সখিরে হিনকরল, মুরগো তুলে নইল
 লাজপেয়া ॥”

(খ) “তি ধন মোর তি ঠইগো মোর তি আহিগির তারা ।

শয়নে সদপনে নিশি জাগরণে নেই মোর রাখে তি ছাড়া ॥”

অন্যান্য কবিতার মাঝে নীতিমূলক বা চরিত্র গঠন মূলক অনেক কবিতা আছে । যেমন, ‘ইমা-বাবা’, ‘বেয়ক-বনক’, ‘নিজর ঘরগো’, ‘সংসঙ্গ’ ‘নিজর গাঙহান’, ‘লোরিক তামকরানি’, ‘আকতা অনি’, ‘পরার কথা’ ইত্যাদি । নীতিমূলক কবিতার বাহিরে ‘বরিশা’ নাটক কবিতা উহান উল্লেখযোগ্য । আপাততঃ গীতিসন্ধানী আলোচনাহান এপেয় লমকরিঙ ।

এ আদি আধুনিক যুগ এহানাত আহেছিল আরাক দুগো আগোর সাহিত্যর বিবরণ পেয়ার, যেমন, হিংলার নাকু অজা বারো ফুনেই পিঁড়িত । এ দিয়োগোর লেঙকরা ‘গ্রিনাথ পূজা’র এলা এবং অন্যান্য লোকসংগীত এবাকাও শিংলার ঘরে ঘরে প্রচলিত অয়া আছে । তবে দুঃখর বিষয়হান মি উতা এবাকাও সংগ্রহ করে নুৱারেছ । এ পর্য্যায়ত প্রতাপগড়র রাজারগাওর দুর্গাচরণ সিংহ গিরকর কথা মাতে পারিয়ার । ঔ গিরক উগোর লেঙকরা ‘বহু-বাহন’ নাটক উহান ১৯৪০ ইংরেজীর দি-আক বছর আগে অভিনীত অছিল বুলিয়া হুনল । কিন্তু নাটক উহান উদ্ধার করে নুৱারেছ ।

এতার পিছে আমি কৃষ্ণধন সিংহ (কাপিৰবন্দ), গন্ধরাজ সিংহ (দ্বিপুৱার চাংকাপ), রোহিণী রাজকুমার (কাটাখাল), গোলাপ সেনা সিংহ (জেংকুড়িত জরম, বর্তমানে তিনগড়িত আছে), গোষ্ঠাবিহারী সিংহ (ঘাঘরা পার, বর্তমানে গোহাটী), এতার নাও উল্লেখ করে পারিয়ার । এতা হাবি বর্তমানে জীবিত, তবুও তানুরে আদি আধুনিক যুগে বেলানির কারণহান অইলতায় — তানু হাবির দৃষ্টিভঙ্গি প্রায় এক রকম । তানুর

দেখাত আধুনিক বস্তুবাদর দৃষ্টিভঙ্গি মিস্ত্রাম কম পেয়ার । তান্দুর
লেখার মাঝে সমাজ জাগরণীর দৃষ্টিভঙ্গি উহানেই প্রাধান্য পাবে ।
তান্দুর কবিতা, নাটক, এলা ইত্যাদি নানা রকম রচনা আছে, হাস্যহান,
কিন্তু হাবি রচনার ভিতরে একই ধরনের মনস্তত্ত্ব ক্রিয়া করে । উহানি
অইলতায়, সমাজ জাগরণ—সমাজর ভাষা-কৃষ্টির জাগরণ—বারো ঈশ্বর
ভক্তি । বিশেষ করিয়া কৃষ্ণন সিংহরাও সমাজ জাগরণর রচনাই মিস্ত্রাম ;
উতা ছাড়া ভক্তিমূলক, নীতিমূলক রচনাও আছে । গন্ধরাজ সিংহ গিরকর
লেখা কনাকর ছড়া হুস্তুমেও আমারে আনন্দ যোগার । যেমন—

“রাজার লগে আকপাতে টেহুরে টেহুরে বুলিয়া ।
জয়ধ্বনি করলা হিয়ালে আকাশহান ফাটেয়া ॥
ঘেউ ঘেউ করে তালকরে আইলা কুকুর ধাপাআহান ।
লেজ বেলেয়া ধাপহান লইলা হিয়াল হাবিহান ॥”

রোহিণী রাজকুমারর কবিতাতও সমাজ জাগরণী এবং ভক্তিমূলক
রচনা ছাড়া শৌর ছড়ার বিশেষ দামআহান আছে—

“চঞ্চল অইতে আঞ্চল অইল কাকালি ভাগিয়া ।
পাপর খেইতে থাপর খেইল চরকরানিত গিয়া ॥
রস নেই কস নেই নাঙহান রসময় ।
বলীর জরা আহান নেই নাঙহান খনজয় ॥”

তার লেংকরা ‘উষা’, ‘পৃথিবী’, ‘তি কুংগো’, ইত্যাদি কবিতা
উল্লেখযোগ্য । গোলাপসেনা সিংহ বুলিয়া যে গিরকগোর নাঙহান মাতলু,
উগারে কুনোগোয় নিঙশিঙ নাইতারা ; তা হঠাৎ সিঙ্গারেই ফুলগোর
সাদে শাতয়া জাঙিয়া পড়েহেগো । কনাকে তার লেংকরা ‘মণিপুর বিজয়’,
‘পুত্র পরিচয়’ নাটকর অভিনয় আমারে প্রচুর আনন্দ দেছিল । তা বত’মানে
ব্যক্তিগত এবং পারিবারিক নানা অসুবিধার দরুণ হাবিতা এরে দিয়া
বয়া আছে ।

গোষ্ঠাবহারী সিংহ গিরকর কীর্তন আমার সাহিত্যত বিশিষ্ট
অবদান । এ পর্য্যন্ত তার কীর্তন আমার সমাজে শ্রেষ্ঠ স্থান অধিকার

করিয়া আছে, তবে দুঃখের বিষয়হান যে উতার প্রচার প্রসার নিতা
কম । তার করপেখেন্ত উদাহরণ কতোহানি লইক—

(ক) “ফুল ছিড়িরা শ্রীরাধা প্যারী, মনে মনে কৃষ্ণ নাম জপিরা,
ললিতার ললিত লতা ছিড়িয়া, সুললিত ফুলর মালা গিথিরা !
বিশাখায় বাছিয়া বিছারা চেয়া,
হবা ফুল মালা বছে বানিয়া ।
চিতায় চিনিয়া চিতারা ফুল
বয়া বানাইরা ফুলর দাঁড়
চম্পকলতায় চম্পক মালা
চমৎকার করে গিথিরা ।”

(খ) “লেহাও ডালহান এধাকতে যাগা যমুনাত বাছিয়া
দোষ নাদিহ হে তোরে দুঃখ দিলু বুলিয়া ।
ফুলর জাতলো সাজাছিলু তোরে শয্যারাপী,
কৃষ্ণরে নাপেয়া পেইলে যমুনার পানি ।”

এতা ছাড়া এ গিরক এগোরতা ‘গাও ঘর’ বুলিয়া সমাজ জাগরণী
নাটক আহানও আছে ।

আদি আধুনিক যুগর আলোচনাহান সংক্ষেপে এপের লমকরিয়া
অত্যাধুনিক যুগর আনোচাত পড়িবাগা ।

(৩) অত্যাধুনিক যুগ

অত্যাধুনিক যুগে অনেক কবি, নাট্যকার, ছোট গল্পকার বারো
প্রবন্ধকারর আবির্ভাব অইল । নাট্যকারর ভিতরে নরসিংহপুরর শবনী
কুমার সিংহ, ইন্দ্রকুমার সিংহ বারো শিংলার ‘ফাগিরাম’র প্রবর্তক সুধন্বা
সিংহ গিরক এগির নাঙহানি পয়লা আহের । উতার পিছে, প্রতাপগড়র
বীরেন্দ্র কুমার সিংহর নাঙহান নঙ অয়ার । অশ্বিনী কুমার সিংহ
‘হারিশচন্দ্র’ নাটক হুতুমোও দর্শকরে আনন্দ দেয় । উতা ছাড়া ইন্দ্রকুমার

সিংহর 'হরি বলা এ হরি', 'ফৈলানে লৈলাট' ইত্যাদি নাটক আমার নাট্যসাহিত্যে প্রাণবন্ত করেছে। 'ফাগিরাম' হাস্যরসের অকুরন্ত উৎসগো। বীরেন্দ্র কু সিংহর 'ডাকাত কালান্তিক', 'মানব কথার ঘর না বাগিরো'—এ নাটক এহানি বিশেষভাবে উল্লেখ করানির উপযুক্তহানি। তবে আমার নাট্যসাহিত্য নিতান্তই হুঁকাত। নাট্যসাহিত্যের পুষ্টি করানিরকা আমারতা কেন্দ্র আগোত স্থায়ী মণ্ড আগোর দরকার। কিন্তু আমার দুঃখের বিষয়হান যে এসাদে মণ্ড আগো আমারতা নেই এবং নিকট ভবিষ্যতে অনার সম্ভাবনাও নাদেহিয়ার।

ছোটগল্পের বারাদে বিষ্ণুপ্রিয়া মণিপুরী সাহিত্য আরতাও দাঁড়। যথার্থ ছোটগল্পকার বুলতে ইন্দ্রকুমার সিংহ বারো ব্রজেন্দ্রকুমার সিংহর নাঙহানি আহের। ইন্দ্রকুমার সিংহর 'হুনোর অরিঙী', ব্রজেন্দ্রকুমার সিংহর 'সিকাডেইনী', 'উত্তরা', 'লেইমাতল', 'বেলীহান হমানির পরে' ইত্যাদি যথার্থ মর্যাদা পানার উপযুক্তহানি। এ দিনোগি ছাড়া আরাক দুগো আগো লেখক আছি উতার মাঝে শ্যামানন্দ সিংহ, শ্যামাসখী সিংহ ইত্যাদির নাঙ উল্লেখ করে পারিয়ার। এতা সম্বন্ধে আমি বিস্তৃতভাবে শ্রীইন্দ্রকুমার সিংহ গিল্লকরাঙতো হুনতাঙাই।

প্রবন্ধকাররতা আরতাও অভাব। ব্রজেন্দ্রকুমার সিংহ, কালী প্রসাদ সিংহ (আজিকার সভাপতি এগো) বারো বরুণ কুমার সিংহ—এ তিনোগি ছাড়া আর প্রবন্ধকার নেই বুল্লেও চলের। ব্রজেন্দ্রকুমার সিংহর ছন্দ বসন্তক প্রবন্ধ, কালী প্রসাদ সিংহর ভাষাতত্ত্ব বিষয়ক প্রবন্ধ এবং বরুণ কুমার সিংহর সমালোচনা মূলক প্রবন্ধ বিশেষভাবে উল্লেখ করে পারিয়ার।

অত্যাধুনিক যুগের কবির পারেঙহান দীঘল। এতা সম্বন্ধে শ্রীবরুণ কুমার সিংহ গিরকে বিস্তৃত আলোচনা করতয়; মি সংক্ষেপে কথা দুহান আহান মাতিঙ :

এ যুগের কবির মাঝে পয়লাকার পারেঙে আইতারাতায় মদনমোহন মুখোপাধ্যায়, সেনারূপ সিংহ, ব্রজেন্দ্রকুমার সিংহ বারো ধনঞ্জয় রাজকুমার। বরুণ কুমার সিংহরে এ পর্য্যায়ত আনে পারিয়ার, কিন্তু দুঃখের বিষয়হান

যে, তারাওতো যে পরিমানে রচনা আশা করিয়ার, ও পরিমাণে না পেরার । মদনমোহন মুখোপাধ্যায় গিরকর 'ঠাইগ', 'তেন্না ককক' বারো অন্যান্য পত্র পত্রিকাত উঠের কবিতা পাঠকর মনে বিরোট আনন্দ সঞ্চার করে । তার লেঙকুরা 'বসন্তহান আহিল যারগা ঠাইগ তি' এবং 'মোর ঠাইগ তি, মোর এলাহান তি'—এ এলা এহানি হুনিল মাহেই পেট না বুল্লের । মদনমোহন মুখোপাধ্যায়র রচনাত বিপ্লবী দৃষ্টিভঙ্গি আহানরই প্রাধান্য আছে, হাদি হাদিত প্রেমিকরাও আত্মসমর্পণ বারো প্রেমিকর বিচ্ছেদ বিরহর চিন আকেইহান আছে । তার অমর পারেও কতোহানি—

(ক) “এবাকা এপেই চলের কুরুক্ষেত্রহান ।

মরলৌ লাভ । জিঙলৌ লাভ । ক্ষেতি কিস্তাও নেই ।”

(খ) “কোকিল আগর নুংগি রহানিল

ঘোবন-রঙ-মাতামর বসন্ত নাহের !”

তবে, তার রচনাত মেরাকে বিশিষ্ট শব্দ আকেইহানর ব্যবহারে রস ব্যাহত আছে । এ গিরক এগোরাওতো আমি প্রচুর সম্পদ আশা করেছিলাও, কিন্তু দুঃখর বিষরহান, তার রচনা আর নাপেরার বুল্লের চলের ।

সেনারূপ সিংহ গিরকর গীতি-কবিতা বিখ্যাত । তার কবিতা পাঠকর মনহানরে মগ্ন করিয়া থনা পারের । তার কবিতার মাঝে প্রেমিকরে পানার আকুল আকাংখা, বিভিন্নরূপে তারে পানার চেষ্টা এবং প্রেমিকরাও আত্মসমর্পণর বিশুদ্ধ রূপ আহান দেহিয়ার—

(ক) “পথে পথে পড়িয়া চুপ্পুল চুপ্পুল অগ্না

পারা লইতৌ য়া পাতিয়া ।

তোর নিঙে শাতয়া তোর নিঙে কেলয়া

থাইতৌ তোরকা হারৌত মাতিয়া ॥”

(খ) “মালতী অলয়া তিরে যদি শাতইলেইহতে মোর বাগানে ।”

ইত্যাদি ।

সেনারূপ সিংহর ‘শতনির খোরাং’ বারো অ্য পত্র পত্রিকাত উঠের কবিতা, তার কল্পনার বারো বাক্যচক্রর গভীরতালো পরিপূর্ণ । যেমন—

“হকে মং গারিত ডকে থং আহিত মলয় গংদো দিল মাঠিয়া ।

অনুরাগে ঢলঢল আহিগি ছলছল বানেইতে য়ারি যতনে ॥”

তার ‘জয় সাধু ভুবনেশ্বর’ ইত্যাদি এলা শ্রোতার মন হৃদয়েও গুণ্ণ
করিয়া থর । অবশ্যই ছন্দর তভাবে বারো শব্দ চয়নের দোষে তার
কবিতা খানি দুর্বল আছে ।

রজেন্দ্রকুমার সিংহ গিরকর কবিতা অনেক গজর স্তরে আছে । তার
‘লেহাও ফুলগরে’ বারো ‘এলার খুস্তল’ বারো করপেখ আকারে আছে
‘মেরাক সেরাক’ আমার সাহিত্যর অমূল্য সম্পদহানি । তার অতুলনীয়
শব্দ-যোজনা, ভাবর গাম্ভীৰ্য, বাক্-প্রতিমা, চিত্রর সূক্ষতা এবং নিখুঁত
ছন্দ নিঃসন্দেহে তারে চির অমর করিয়া থইতর । তার কবিতাত প্রিয়তমার
প্রতি তার ঠইগো বৃজা প্রেম, প্রিয়তমার চিন্তায় বুরিয়া থানা বারো
প্রিয়তমারে পরিপূর্ণভাবে না পানির মর্মবাথা আহান অনুভব করিয়ার ।

যেমন—

(ক) “লেউ ফুলে ফুলে বেলোহান আগ্রণর

সিলয়া পড়েছে পাতার খুরায় - - - ।”

(খ) “থদিছ তি মোর চির দুঃখর বাশীত

তোর বুকগোর বঙালা হারোহান ।

বসন্ত ফুল নেয়ক দুঃখ নেই

মোর জীবনর চির বরিষাং থাইছ ।”

(গ) “তোর সালেদে দুঃখ জ্বালা হাবিতা পানা,

তোর সালেদে মোর বুকুদে জমের বানা,

তোর সালেদে জনমহান মাংকরানি

তোর সালেদে আহি ঘির্য়গি মাম করানি

তোর ঠইগর কাদাত বয়া মি বানেইং এলার তাল,

আহিগীর কোণে গোপনে কথাও অয়া থাক খানি ঙাল ।”

(ঘ) “বদিল দিনর মেঘালা ি ফরই হানি,

আহিগী বৃজিয়া বঙালা কাজল খানি ।”

বরষা নদশূরে চরণ সাজাছ

থাইবতা বাজে বাজে ।”

হাস্যরস সঞ্চারে ব্রজেন্দ্রকুমার সিংহর কবিতা অদ্বিতীয়—

(ক) “ডাক বারেয়া নাং বরেছে মন্ডুর গাঙুর মেইন ।

ফালুর ভাবক লৌদিলাতা ধেইন গিরক ধেইন ॥”

(খ) “পক পাক ছক ছক কাম দুম নাকুরি ।

ডিক ডিক আহিলেতে গুম গুম বাকুরি ॥”

ধনঞ্জয় রাজকুমার সার্থক কবিগো । তা যে রসহান ফুটানি মনার
উহান তা যথাযথ ভাবে ফুটানি পারের ! তার কবিতাত তার প্রিয়তমারে
পানার আকুল বেদনা বারো তার বার্থতার মর্মদাহ ফুটিয়া উঠের । তার
কবিতা বিষ্ণুপ্রিয়া মণিপুরী কবিতাত নুরা দিগন্ত আহান দেহাদের । যেমন,

(ক) “সন্ন্যাসীর কমন্ডলুগত কুরাংকারতা এমাটিক কঙালা দুঃখেতে

শ্মশানর জিগ আহির পানিল কিসাদে নিবানি ?”

(খ) “ঈশবরর লগে তুলনা করিয়া চেইতে এবাকাও মি

কতহান তলয়া আছ ।” ইত্যাদি

তার ‘ওমর খৈয়াম’র অনুবাদ আমার সাহিত্যর অমূল্য সম্পদ ।
তার রচিত অনেক পদাবলীও আছে, তবে উতাত রস বিকাশ খানি ক্ষুদ্র
অছে ।

এতার লগে শ্রদ্ধা সহকারে নিঙশিঙ অউরিতা ঘাঘরাপারর চন্দ্রবদন
সিংহ গিরকর কথা । উসাদে নিষ্ঠাবান, নিরহংকার, চরিত্রবান, সমাজসেবী
তথা সাহিত্যসেবী বুবক দ্বিতীয় আগো মি না দেহেছ বুলেও চলের ।
তার অনেক উচ্চ গানর রচনা আছে । কিন্তু আত্মপ্রচারে অনিচ্ছুক গিরক
উগোয় দুর্হান আহান কবিতা ছাড়া আর কিতাও প্রকাশ না করেছে ।
দুঃখর বিষয়হান, ও গিরক উগো অতি অল্প বয়সে আমারে বেলেয়া
গেলগা । তা জিওতা অয়া থাইলে তারাওতো অনেক সম্পদ পেইলাও
অইছ বুলিয়া দুঃভাবে মি বিশ্বাস বরোরি । তার দেহত্যাগর পিছে

১৯৭০ ইংরেজীত মি তার করপেখ উতা সংগ্রহ করেছ, উতাও কতোহান
'প্রতিশ্রুতি'ত প্রকাশিত অইল । তার রচনাত তার প্রেম, দরদী এবং কোমল
অনুভূতির স্পষ্ট নিদর্শন পেয়ার । যেমন—

(ক) “কাম হুদেয়া ঘরে আনার পরহীন এল গেলগা ।

উতা পেয়া নাহেরা আজি কুরাং কিতা অইলগা ॥

মানুর ডেকি হাতগো নাগই আকগো সিচিল পাছ ।

হুনার ঠইগো বুলিয়া ঘরে কলকরিয় আছ ॥”

(খ) “মতত্বা ইমা কবর কথালো বেলীহান নিকুলেরতা ?

কার কথালো জোনাক গিরক রাতি মিঙাল দেরতা ?

কার কথালো হুরা ডাঙর হাগর হাবি তেরা,

সেন্ধ্যার পিছে মিঙাল দিয়া রাতি ফুরেইতারা ?”

(গ) “হার নাপাছিলে এসাদে বেলিয়া আহিতৌ বুলিয়া তোরো ।

বেলিয়া আহিলু কিহান বরতু ওতারকা না গালেই মোরে ॥

মোরকা বুলিয়া তি যেসাদে দিনে রাতিয়ে কাদুরী ।

মিও উসাদে তোরকা বুলিয়া কাদিয়া পার না পালউরি ॥

এতার পিছে আহেরতায় চন্দ্রমোহন রাজকুমার, গৌরমোহন সিংহ,
চন্দ্রকান্ত সিংহ, গোপীনাথ সিংহ, নীলমাধব মুখার্জী, কালু সিংহ,
হরেকৃষ্ণ মুখোপাধ্যায়, কালাসেনা সিংহ (শিংগা), দ্রীবাস, অমর সিংহ,
ল.কা.স.—ইত্যাদির নাঙ । চন্দ্রমোহন রাজকুমারর ‘চিংখের এলা’,
‘ভূত-ভবিষ্যতর লেহা’ ; গোপীনাথ সিংহর ‘নিংগিং আরতি’, ‘কনাক
মেঠেল’ ; কালাসেনা সিংহর ‘মঞ্জুরী’, ‘অচিন পাহিয়া’ ; কালু সিংহর
‘মধুমালতী’ ; নীলমাধব মুখার্জীর ‘সুরর মিঙাল’ ; হরেকৃষ্ণ
মুখোপাধ্যায়র ‘মেইরিক’ ; গৌরমোহন সিংহর ‘ফুণির খোঁরাং’—এ
কাব্যগ্রন্থ এহায় আমার সাহিত্য ভাণ্ডারগোর সম্পদ বৃদ্ধি করেছে, সন্দেহ
নেই । কনাক লেংকার মাঝে কচুধরমর শ্যামানন্দ সিংহ, বৈলাশহরর
সমন্বিত সিংহ বারো গড়েরবন্দর মথুরা সিংহ—এগির নাঙ উল্লেখ করে
পারিয়ার । কান্দুরাঙ উজ্জ্বল ভবিষ্যৎ আহানর সম্ভাবনা দেইয়ার ।

সাহিত্য বিষয়ক আলোচনা লম্বকরাণির আগে আধুনিক যুগ বারো
 অত্যাধুনিক যুগ —এ বিভাগ এহানি সম্বন্ধে মোর বিশেষ বক্তব্য আহান
 আছে । এপেয়র অত্যাধুনিক যুগ এহান বাংলা সাহিত্যর আধুনিক
 যুগর সমপার্থ্যাহান নাগয় । এপেয় আদি আধুনিক যুগর ভিত্তরে
 ধরেছিতায় ঔ কবি উতা, যেতার রচনার মূল উপজীব্য—সমাজ জাগরণ
 বারো ঈশ্বরভক্তি ; বারো অত্যাধুনিক যুগর ভিত্তরে ধরেছিতায়—ঔ
 কবি উতা যেতার রচনাত মানব মনর প্রাধান্য অর্থাৎ মানুর বা কবির
 প্রেম-প্রীতি, আশা-নৈরাশ্য, সুখ-দুঃখর প্রতিফলন দেহিয়ার । এমাপকাঠিলো
 রোমান্টিক কবিতাও অত্যাধুনিক যুগর ভিত্তরে ধরেছি । বাংলা সাহিত্যর
 আধুনিক যুগর সমান্তরাল বিষ্ণুপ্রিয়া মণিপুরী কাব্যর অত্যাধুনিক যুগ
 আহান, তঙাল করিক বুলেতে একমাত্র ধনঞ্জয় রাজকুমারই সার্থক
 অত্যাধুনিক যুগর কবিগো । তার পিছে পিছে উল্লেখযোগ্য অইলাতার—
 কনাক লেঙুর শ্যামানন্দ সিংহ, সমরজিৎ সিংহ বারো মথুরা সিংহ ।

॥ সাহিত্য বারো ভাষা ॥

প্রায় পনরো ষোল বছর আগে যেকা বিষ্ণুপ্রিয়া মণিপুরী সাহিত্যর
 বর্তমান যুগর সূচনা অইল, উদ্যত পুরি সাহিত্যর ভাষা সম্পর্কে
 সমাজে মিয়াম হালকা ধরণর সমালোচনা আহান চলে আহের । শিক্ষা
 প্রসারর ফলে সমাজর দৃষ্টিভঙ্গি পরিবর্তন অইলে এ ধারার সমালোচনা
 সমাজেস্ত আপ্পানেও মাগো বিতইগা বুলিয়া নিঙকরেছিলো । কিন্তু
 দেহিয়ারতা বর্তমানে চিন্তাধারা উহান আরতাও সমাজে জট বাধে আহের ।
 বর্তমানে পত্র-পত্রিকাত এজাত সমালোচনালো সমালোচকর লেখনি মিয়াম
 মুখর আছে । উহানলো, এ বিষয়ে বক্তব্য আহান থনা থকর বুলিয়া
 নিঙকরোঁর ।

চলেছে সমালোচনার ধারাহান অইলতাই এহান (১) কুনো কুনো
 লেখকর লেখাত বাংলা শব্দ মিয়াম হিয়ার । এসাদে করিয়া বাংলাস্ত মিয়াম

শব্দ আনলেগা আমার ঠারর স্নাতক্যাহান নেয়ইতই, ফলে আমার ভাষার স্নাকীকৃত নাপেইতাঙাই পাউরি বুলিয়া কুনো কুনো চিন্তাশীল মানুৱে মিয়াম ফাফরে পড়েছি । (২) কুনো কুনোগোয় মাততারা তা যে অন্য ঠারেত্ত শব্দ আনানি যাকরের, তবে ঠার আকহানাত্তে নাগয়, অর্থাৎ বিভিন্ন ঠারেত্ত আনানি । (৩) কুনো কুনোগোয় মাততারা তা যে অন্য ঠারেত্ত আনলেগাও মেইতেই ঠারেত্তে না, কারণ, উহান অইলে মেইতেই উচ্চারণে আমার উচ্চারণ এতা নষ্ট করতই । কুনো কুনোগোয় দস্ত করিয়া মাততারা যে অন্য ঠারেত্ত এসাদে শব্দ আনানি উহান হুদা আমার ঠারর স্নাতক্যাহান পক্ষে ক্ষতি কারকহান নাগয়, এহান আমার পক্ষে অপমান জনকহান । নিজর ঠার থাইতে অন্য ঠারেত্ত 'শব্দ উদারি' করানি উহান আমার হীনতার পরিচয়হান । কুনোগোয় আয়াক কাকেই আহান আগুৱেয়া মাততারা যে—আমার ঠারে প্রচুর শব্দ আছে এবং যেতা আমার এ শব্দ হার নাপাছি উতায় অন্যঠারে উদারিত হুমেইতরাগাতা । কুনো কুনোগোয় চেলেজ্জ করতারা যে স্টেটিস্টিক্ছ নিলেগা দেখতাঙাই—ঔ লেখক ঔতা আমার শব্দ ভাণ্ডারর অধিকাংশই হার নাপাছি ।

এধরণর সাহিত্য সমালোচনা সমাজর চিন্তাধারার মিয়াম সংকীর্ণতা বারো নিম্ন মানর পরিচয় দেৱ । ইচ্ছা করে মাতিক বুলে—এতা সাহিত্য সমালোচনাই নাগয় । কারণ, সাহিত্যর আত্মা যে 'রস' ঔ রসর লগে বাজেয়া কুনোগোয় শব্দ পরীক্ষা নাকরতারা । এ সমালোচনাত্ত মনে অরতা, সাহিত্য বুলতারা বস্তু এহান ফরমাইছ দিয়া হুংকতারাহান ; ফলে মাটির মূর্তি হংবরানির সাদে এজাত সমালোচকে মাততাই ঔসাদে যেন সাহিত্য গিথানকরে হংকরেদেয়া । মাটির মূর্তিগো হাজার হবা অইলেও আত্মাগো নেই বুলিয়া উগোয় চলে নুৱারের । সাহিত্যতত্ত্ব রসরূপ আত্মা উগো নাথাইলে শব্দর কিত্তাও করে নুৱারের । সুতরাং, ঔ আত্মা উগো আগে হুংকরানি লাগতই, উতার পিছেদে কিসাদে শব্দ বা অর্থ—যেতারে কাব্যর দেহাগো বুলতারা—আনানি লাগতই এবং কিসাদে অলংকার পিদাদেয়া লাগতই ঔহান ঔ রস উহানর গঞ্জে নিভর করতই, এবং ঔ রস আত্মার

যেগোয় শব্দ, অর্থ, গুণ বারো অলংকার দেবী পারের, উগোয় এ কাব্য-সংসারে সার্থক সৃষ্টীগো—প্রজ্ঞাপতিগো । কাব্যতত্ত্ববিদে মাতে গেছিগো—“অপারে কাব্য-সংসারে কবিরেব প্রজ্ঞাপতিঃ ।” ঐ প্রজ্ঞাপতি সত্ত্বরূপ কবিয়ে মানুর ফরমাইছ, নিয়া কাম নাকরের । হাৰিয়ে কবি অন্য নুরারতারা । যেগোয় শব্দ, অর্থ, অলংকার মাধ্যমে রস ব্যক্ত করে পারের উগো কবিগো । সুতরাং, ‘বাংলা শব্দ না মেইতেই শব্দ’ উতা বিচার সাহিত্য সমালোচনাত না পড়ের । সাহিত্য বিচারহান অইলতায়—যে রসহান কবিগোয় ফুটানি ঞনান, উহান অভিযাক্ত আছে না নাছে—উহান । এবং যেহেতু শব্দ, অর্থ ইত্যাদির মাধ্যমে রস অভিযাক্ত অর, উহানলো বিশিষ্ট রস আহানাত বিশিষ্ট শব্দ আগো ঠিকঠিক প্রযোজ্য আছে কিনা, কুনো শব্দ আহানে বা অর্থ আহানে রসর অভিযাক্তিত বাধা সৃষ্টি করলো কিনা—এহান সাহিত্যর বিচরহান । অন্য ঠারেত্ত শব্দ আনলেগা ভাষার সদ্ভাবন্ত্য কুনোদিন হানি নার, ভাষার সদ্ভাবন্ত্য রক্ষা করেত্তা ভাষার কাঠামহানে—শব্দরূপ, ধাতুরূপ, প্রত্যয়, বাক্যরীতি ইত্যাদিয়ে । অসমীয়া, বাংলা, উড়িয়া এ তিনো ভাষার ভিতরে শব্দ ভাণ্ডার শতকরা প্রায় ৭০ ভাগ মিল । অমিলতায় ৩০ ভাগ । কিন্তু তবুও তানুর সদ্ভাবন্ত্য রক্ষিত অয়া আছে । বারো, মেইতেইস্ত শব্দ আনলেগা তলইতাঙাই বা আমার উচ্চারণ ব্যাহত অইতই, ঐ কথা ঐহান শব্দর বিবর্তন বারো উচ্চারণ পদ্ধতি হার পাছি মানু উতায় না মাততারা । মেইতেই শব্দ আনলেগাও আমি মেইনৈর সাদে উচ্চারণ না করিয়ার ; উতারে আমার উচ্চারণ অনুযায়ী নুরা রূপ দিমার । সুতরাং, মেইতেই উচ্চারণে আমারে প্রভাবিত না করেত্ত । এবং পাচ ছয়গ বছর ধরিয়া আমি মেইতেই শব্দ আমার ঠারে বরেন্না উচ্চারণ করিয়ার, কিন্তু এবাকা পেয়াও আমার উচ্চারণ বিকৃত নাছে । ভাষাতত্ত্বর ধারাহানেই এহান । পারগী এবং ইংরাজী শব্দত্ত প্রায় আড়াই হাজার শব্দ আবারাও আছেছে । কই, উতায় আমার উচ্চারণেতে প্রভাবিত নাকরেছে ! ঐ শব্দ উতা আমি নিজর উচ্চারণ অনুযায়ী খানি পরিবর্তন করিয়া উচ্চারণ করিয়ার । বারো, অন্য ঠারেত্ত

শব্দ আনানি ঔহান অপমান জনকহান নাগয় বরং উহানাতই ঠার আহানর
 বিষ্কৃতির পরিচয়হান পেম্মার । মি গর্ববোধ করৌরি যে বিভিন্ন ভাষা
 গোষ্ঠিত শব্দ আনিয়া নিজরতা করে পারানির প্রচণ্ড শক্তি উহান আমার
 বিষ্কৃপ্রিয়া মণিপূরী ভাষা ছাড়া অন্যান্য ভাষাত নিতান্ত কম । এ ভাষা
 এহানে ভারতীয় আৰ্য ভাষা এবং ভোট চীনীয় ভাষা—এ দিয়ো ভাষা
 গোষ্ঠিত সমান ভাবে শব্দ আনিয়া সম্পূর্ণ নিজরতা করে পারের । এবং
 এ গ্রহণী শক্তি এহানেই বিষ্কৃপ্রিয়া মণিপূরীর উজ্জ্বল ভবিষ্যতর ইঙ্গিত
 দেয় । এসাদে শব্দ আনানি এহানরে উদারি করানি না বুলতারা ।
 উহানরে বনে বনে বুলিয়া ফুল তুলানিহান বুলে পারিয়ার ।
 কবি-সাহিত্যিকরূপ মালীয়ে বিভিন্ন ভাষার সাহিত্য শব্দ বারো ভাব
 চয়ন করিয়া আমার কাব্যলক্ষ্মীরে সাজেইতারা । সুতরাং, আমার কাব্য
 গিথানক এগোরে খানি হবা করে সাজেরা ঔহানাত আপ্পানে ডর দেহেয়া
 মানুরে বিভূলা নাকরে দিবাঙ । অবশ্য, সত্যিকারর সাহিত্যিক উতায়
 এজাত সমালোচনারে কুনোদিন তুরাক্কা না করতারা ।

বারো, আমার ঠারে প্রচুর শব্দ আছে, সুতরাং অন্য ঠারেস্ত শব্দ
 আনানি অনর্দাচৎ বুলিয়া মাততারা উতায় নিজর জ্ঞানর সীমাগো নিজে
 হার নাপাছি । উহানে শব্দর ভুল পরিসংখ্যান আহান দিয়া মানুরে বিভূলা
 করে দিতারাতা উতার উদ্দেশ্যে মাতানি মনেয়ার যে, আমার ঠারে প্রায়
 ৩০,০০০ শব্দ আছে, উতার মাঝে সংস্কৃত ১০,০০০, অর্ধতৎসম
 ১,৫০০, বাংলা, অসমীয়া ইত্যাদি ঠারর লগে মিল তদ্ভব শব্দ ৭,০০০,
 বিষ্কৃপ্রিয়া মণিপূরীর নিজস্ব তদ্ভব শব্দ ১,৫০০, মেইতেই ৩,৫০০,
 আরবী ফারসী ২,০০০, ইংরেজী ৭০০, মিশ্র ১,০০০, দেশী বারো
 অন্যান্য ১,৫০০, সন্দিগ্ধ ১,০০০ । এতার ভিতরে ঠিকঠিক নিজর শব্দতে
 ৫,০০০র গজে নাগয় । অন্য ঠার আলোচনা নাকরলাঙকোপূরি অন্য
 ঠারর শব্দ উতারেও আপ্পানে আমারতা বুলিয়া গর্ব করিয়ারতা । এ
 শব্দ এগিরে মিয়াম বুলিয়া গর্ব করতারা উতা, ধানগি বারণে বরেইবাতায়
 বুলে বুলে খেইতারা উতা । ইংরেজীরতা প্রায় লক্ষ শব্দ, তান্দু এবাকাও

অন্য ঠারেও শব্দ নিতারাগা । হিন্দীরতা প্রায় দেড় লক্ষ শব্দ, তানুও
 দিনকার মানুৱাওতো শব্দ আনতারাগা । আসল কথাহান এহান, ভাবহান
 আগে আহিলবোপুৱি পিছে ভাষাহান আহেরতা । অথচ হাবি ভাবর
 শব্দ ঠার আহানাত থানা সম্ভব নার । উহানে, ভাষা আহানাত বিশিষ্ট
 ভাব আহানর উপযোগী শব্দ না থাইলে, ঐ ভাব উহান ফুটানিরকা অন্য
 ঠারেও আনানি লাগের । দ্বিতীয়তঃ কোনো কোনো ভাষাত এমন শব্দ
 কতোগো থার, যেতारे আমি অন্য ঠারে অনুবাদ করে নুৱাৱিয়ার ।
 যেমন, পারসী 'দরদ' শব্দ এগোর দয়া প্রীতি সহানুভূতি ইত্যাদি অর্থে
 প্রযুক্ত অর ; এহানরে আমার ঠারে অনুবাদ করানি সম্ভব নেই । আগোয়
 দাবী আহান করলে বা আগোয় সন্ধিগ্ধ অইলে ঐ দাবী উহান পুৱানিরকা
 বা সন্দেহ উহান দুৱেই করানিরকা যে আশ্বাস আহান দিতারা উহানরে
 সংস্কৃতে 'প্রতিশ্রুতি' বুলতারা ; এহানরে বিষ্ণুপ্রিয়া মণিপুরী ভাষায়
 কোনো শব্দলো অনুবাদ করানি সম্ভব নার । অসমীয়া বা বাংলা 'মরম'
 শব্দর অনুবাদ বিষ্ণুপ্রিয়া মণিপুরীত নার । এসাদে যে কোনো ভাব আহান
 যেবাকা লেখকগোৱাও উপস্থিত অইতই, উবাকা 'আমার ঠারে শব্দ নেই
 হানতে আর কিস্তা করতু ?' বুলিয়া ভাবহান থিঙকরিয়া বয়া নাথাইতই
 'যেপেইন্তও অক, শব্দ উহান আনিয়া প্রয়োগ করতই । আৱাক খানি কুপকরে
 বিচার বরলে দেখতাঙাই, অধিকাংশ শব্দরতাই দ্বিতীয় প্রতিশব্দ নেই । নদী
 শব্দর অর্থ তটিনী, তরঙ্গিনী, সরিৎ, প্রবাহিনী ইত্যাদি পাছি । কিন্তু
 প্রত্যেক শব্দর অর্থ বা ব্যঞ্জনা তঙাল । 'বাড়বাঞ্জা' শব্দ এগোয় যে বীররসর
 ব্যঞ্জনা আহান দেৱ উহান 'বৌ-বরণ' শব্দর নাদেৱ ; ইন্দোল, ইমাচাউবী,
 ইতেইমা শব্দর যে কোমল ভাব আহানর সূচনা বরেৱ উহান খুড়ী, জেঠী,
 বইজি শব্দর নাদেৱ । 'তার জাঙহানি ধদিল', বাৱো 'তার চরণ ধৌত করে
 দিল'—এ বাক্য দিয়োহানির অর্থ তঙাল : পরলাকার অর্থ উহানে হুন্দা
 কর্মহানর বর্ণনা দেৱ, দ্বিতীয় উহানে ভক্তি-প্রস্ফার ব্যঞ্জনা আহানও দেৱ ।
 ঐ কাৱণে এ দ্বিতীয় প্রয়োগ এহান বৈষ্ণব-সেবা, কীর্তনর খম-হাম-ফাম
 ইত্যাদির ক্ষেত্রে লাগের, অন্যত্র নার । 'জুনাক মেইথঙী' শব্দ এহানে

নায়িকার সৌন্দর্য্যের প্রকাশ না করের, বরং গুলডুরা রাণিকসি নেই
 মেইথঙ আহানর ব্যঞ্জনা দেব, এ ক্ষেত্রে 'চন্দ্রবদনী' দিলে শাতহান হবা
 নায়িকাগোর চিত্রহান চটকরে আহের । সুতরাং, আবিধানিক অর্থহান
 মিললেই লম নার, শব্দ উতার ব্যঞ্জনার দিক আহানও আছে । উহানে
 শব্দ আগো হাবি রসে প্রযোজ্য নার । হাস্যরসে লাকতই শব্দ উগো করুণ
 রসে প্রযোজ্য নানাও যাকরের । এ দৃষ্টিলো বিচার করানি উহানেই সাহিত্য
 সমালোচনার ধারাহান অনা থকর । যথার্থ সাহিত্যিক উগোর শব্দর এ
 সূক্ষ্মভেদ এতা হারপেয়া শব্দর ব্যবহার করতই, সমাজর শাসন বা ফরমাইছ
 নিয়া না চলতই । রূপকথার রাক্ষসীগোর প্রাণহান যেসাদে পহুরীর কোণর
 উপদুগোত লুকুয়ে থার, উসাদে কাবার প্রাণহান আছেতা রসে । ও রসহানে
 যদি প্রয়োজন মনে করের, যে কোনো ভাষাস্তও শব্দ আনতইগা, উহানাত
 কবির সম্পূর্ণ স্নাতন্ত্রা আছে । কবি মধুসূদনে ইচ্ছামত সংস্কৃত শব্দ
 প্রয়োগ করেছে বারো কবি নজরুল ইসলামে প্রচুর পারসী শব্দ ব্যবহার
 করেছে, উহানে বাংলার ক্ষতিতে দুরেইর কথা, সম্পদ বৃদ্ধিই আছে ।

সুতরাং, 'সাহিত্যর ভাষা' আলোচনার উপসংহারে মাতানি মনেরারতায়
 এহান যে, সাহিত্যিকে রস সৃষ্টিরকা উপযোগী শব্দ যে কোনো ভাষাস্তও
 আনকাগা, এবং যত অন্যান্য ভাষার শব্দ আনিয়া বরেইতাঙাই, ততই
 সাহিত্যর বারো ভাষার সমৃদ্ধি অইতই । আজি হুন্দা 'আমার শব্দ আমার
 শব্দ' বলিয়া অন্ধলহানে সমাজহান ছেয়া আছে, এহানর হাদিত আমার
 কথা এহানি উপহাস এবং টিটকারীর বিষয়হানি আছে এবং অইতই উহানাত
 সন্দেহ নেই । কিন্তু মনে থনা লাগতই যে, এহান যথার্থ কথাহান, টিটকারী
 করিয়া সত্যরে চাপেয়া থনা নাইতই ; কোনোদিন পিছে এহানেই হাবিগে
 গ্রহণ করতায় মতহান, উহানাত বিদ্দু আহানও সন্দেহ নেই । এবং হাস্যকর
 বিষয় আহান এহান যে, যেতায় অন্য ভাষাস্ত শব্দ আনানি থক নেই
 বুলতারা, উতায়ও নির্বিচারে অন্য ভাষার শব্দ আনিয়া ব্যবহার
 করতারা । এহান 'মি চির জীবন মৌনব্রত করেহুগো' বলিয়া মাতানির
 সাদে সর্বাধিক কথাহান নায়াতে কিহান ।

বানান

বিষ্ণুপ্রিয়া মণিপুরী সাহিত্যত বানান এহান ডাঙর সমস্যা আহান ।
 তবে বর্তমানে নিকুলের পত্র পত্রিকাত বানানর ভিতরে ক্রমশঃ সাম্য আহান
 আহের এবং অদূর ভবিষ্যতে এ সমস্যা এতা দূরেই অইতই বুলিয়া
 নিউকরিয়ার । বানান সম্বন্ধে অনেক কথা মাতিলতা আছে । কিন্তু এ
 অল্প সময়র ভিতরে উতা হাবি আলোচনা করানি সম্ভব নার । (বিস্তৃত
 আলোচনারকা 'প্রতিশ্রুতি' ঠর্খ সংকলন দ্রষ্টব্য) । আজি হুন্দা বানান
 দুহান সম্বন্ধে আলোচনা করিক; আহান অইলতায় ক্রিয়াত 'ছ' বর্ণ
 এগোর ব্যবহার, বারো আধার অর্থে 'মা' অনুসর্গর ব্যবহার । আছে,
 খাছ, গেছেগা, গেছিলগা ইত্যাদি ক্রিয়াত 'ছ' ব্যবহার না করিয়া 'স'
 ব্যবহার করানি বুলিয়া দল আহানে হবা করে প্রচার কার্য চালাই ।
 তানুর যুক্তি উতা মূলতঃ দুহান—আহান ব্যুৎপত্তিগত, আরাক আহান
 উচ্চারণগত । ব্যুৎপত্তিগত দিক উহানলো তানু মাত্তরাতায় এ 'আছ'
 ধাতু এগো সংস্কৃত 'অস্' ধাতুত আহেছেগো । সুতরাং, মূল সংস্কৃত
 ধাতুর 'স' উগো থনা থকর । উচ্চারণগত দিক উহানলো মাত্তরাতায়
 আছে খাছ ইত্যাদি শব্দর 'ছ' এগো উচ্চারণ করতে জুহান দাতে লাগের,
 সুতরাং, এগো 'স'গো অনা থকর । কিন্তু দিরোহানি যুক্তিও দ্রাষ্টমূলক ।
 সংস্কৃত 'অস্' ধাতুত 'আছ' ধাতু আহেছেগা নাগর, 'অস্' ধাতুর অকার
 উগোয় আকার অনার কোনো ভাষাতত্ত্বগত নিয়ম নেই । এ 'আছ' ধাতু
 এগো আহেছেতা প্রাকৃত 'অচ্ছ' ধাতুত । আমার ভাষা, বাংলা অসমীয়া,
 হিন্দী ইত্যাদি ভাষা এতাও সংস্কৃতত আহেছেতা নাগর, আহেছেতা
 প্রাকৃতত । পিছে যুক্ত বর্ণ থাইলে এবং ঔ যুক্ত বর্ণর বর্ণ আগো লোপ
 পেইলে আগেকার হ্রস্ব স্বর উগো দীর্ঘ অর—'অচ্ছ' ধাতুর 'চ্ছ' এ
 যুক্ত বর্ণ এগোর 'চ' বর্ণ উগো লোপ পানায় আগেকার 'অ'কার উগো
 দীর্ঘ অইলতা । ডঃ সুনীতি কুমার চাটোজীর 'The Origin And
 Development of The Bengali Language' এ এহানর

আলোচনা আছে । সুতরাং শব্দৰ ব্যুৎপত্তিহানৰ আন্দাজি জ্ঞানৰ গজে
 নিৰ্ভৰ কৰিয়া বানানৰ নিয়ম হংকৰানি উহান ইমে আপ্পানে কামহান ।
 দ্বিতীয়তঃ উচ্চারণৰ গজে নিৰ্ভৰ কৰানিৰ আগে আমাৰ জুহান বিচাৰ কৰানি
 লাগেৰ । সংস্কৃত যত 'ষ' 'স' আছে, উৰা বাংলা, অসমীয়া বারো বিষ্ণুপ্ৰিয়া
 মণিপুৰীত 'শ'ৰ সাদে উচ্চাৰিত অৰ । যেমন, আসন, ভূষণ, বাসক, রস,
 রাস ইত্যাদি । অথচ এ তিনো ভাষাতও উতारे 'শ'লো প্রকাশ না কৰিয়া
 'স'লো প্রকাশ কৰিয়াৰ । আমাৰ 'আস্' ধাতু এগোও 'স'লো ইকরলে
 উচ্চারণহান তইতইতা আস্, থাস্ ইত্যাদি । অথচ আমাৰ standard
 উচ্চারণহান উহান নাগর, standard উচ্চারণহান অইলতার আছ্, থাছ্
 দেছ্ ইত্যাদি । এ 'ছ'(s) এগো অইলতার সংস্কৃত এবং प्राकृत 'छ' উগোর
 উচ্চারণহান । সং. मस > प्रा.माह विम. > माह । सं. वंसरूप प्रा.
 वज्ररुअ > विम. वाहुर । 'छ'গোর 'ह'(h) ভাবে উচ্চারণ কৰানি উহান
 অসমীয়া, পূৰ্ববঙ্গ বারো বিষ্ণুপ্ৰিয়া মণিপুৰীৰ লক্ষণহান । উগোরে 'স'গো
 বুলানি উহান মিয়াম হবা ভুলহান । সুতরাং, আছ্, থাছ্, দেহিল ইত্যাদি
 কামে 'স' নাদিয়া 'ছ' দেনা উহানেই বৈজ্ঞানিক চিন্তাধাৰাৰ পৰিচয়হান ।
 'মা' অনুসৰ্গউগো কতগোয় চন্দ্রবিন্দু দিয়া 'মঁ' ইকরতারা । এগো সৰ্বম্বে
 আলোচনা কৰানিও লাজৰ কথাহান । কারণ, এহানাত ইমে নাহাৰপানি
 ছাড়া অন্য কোনো যুক্তি নেই । ব্যুৎপত্তিগতভাবে আহেহেতা এসাদে, সং.
 मध्य > मन्थ > माथ > माह > मा । ভাষাতত্ত্ব সম্বন্ধে প্রাথমিক শিক্ষা নেহেগা
 উগোয়ও মাতে পারতই যে এপের অনুনাসিক উচ্চারণ থানার বিন্দু
 আহানও যুক্তি নেই । উচ্চারণৰ দিহেও বিন্দু আহান যুক্তি নেই । কারণ
 হুন্দা এপের নাগর, যে কোনো শব্দতও অনুনাসিক উচ্চারণ এহানেই
 আমাৰাও নেই । হুন্দা নেই নাগর, আমি চেষ্টা কৰিয়াও উচ্চারণ কৰে
 নৱাৰিয়াৰ । সুতরাং, চন্দ্রবিন্দু দিয়া 'মা' প্রত্যয় ইকৰানি এহান ইমে
 আপ্পানে মনেয়া কৰানিহান ।

সাহিত্য পরিষদ

সাহিত্য পরিষদের বহাহানলো আজিকার মোর বক্তব্যহানর উপসংহার করিক । কোনো সমাজে কৃষ্টির জগরণ আনেরতা সাহিত্য পরিষদে । বঙ্গীয় সাহিত্য পরিষদ, অসম সাহিত্য সভা, মণিপুরী সাহিত্য পরিষদ— এচাৰ বারাদে দৃষ্টি দিবেই আমি উহান হারপেইতাঙাই । তান্দর কর্মধারা বারা অনুষ্ঠান বা সম্মেলন আবেইহান দেখলে আমার সমাজর বধা খালকরিয়া মেইথঙ লুকানির ফাম না পেয়াৰ । ‘গীতিসন্দামী গীতিসন্দামী’ বুলিয়া কাদিয়ার, ঔ গীতিসন্দামীরকা আমি সমাজে বা আমার সাহিত্য পরিষদে কিতা বরোছি ! আমার সাহিত্যর অমূল্য সম্পদ তার করপেখ উতা এবাকাও পড়িয়া থাইল । উতা প্রকাশ করানির প্রচেষ্টা আমি কুনোদিন নাকরোছি । এমন কি, সংগ্রহ করিয়া থনার প্রয়োজন পেয়া বোধ না করোছি । এসাদে করিয়া লেইখোমসেনা সিংহ, মদনমোহন শৰ্মা, আমদুসেনা সিংহ ইত্যাদি পুরানা লেখকর করপেখ উতা পুলকরানি বা প্রকাশ করানির প্রচেষ্টা আমি এবাকাও না করোছি । আজিকার বক্তা এগোয় ঔ করপেখ উতার থানি আকতা সংহে বরোছে, কিন্তু সমাজর ঔদাসীন্যর দরুণ উতা এবাকাও অপ্ৰকাশিত আছে । এতন্ত জিঙে পরিতাপর বিষয় আর কিতা আছে ? এতা কথা মাতলে কেন্দ্রীয় সাহিত্য পরিষদর বর্ণধার মহাজন গিরিগিথানিয়ে আজিকার বক্তা এগোরে কটাক্ষ করিয়া মাতারাতা— “তারেতে উতা উপদ্রুত বরোয়া থনারকা মাতেছিথাঙ ? তাও ছাপেরা নিকালাকনে !” সমাজর এজাত নেতার মনোবৃত্তি বারো বাকবৃত্তির বিচার আজিকার বিদ্বজ্জনে করে নুব্বারলেও আমার অনুগামী বেইবুনি বেয়াপা উায় আকদিন বরে পারতায় বুলিয়া আশা করুনি । সাহিত্য পরিষদর মুখপত্র আহান পয়লাকার প্রয়োজনীয়হান । কিন্তু কই ! এবাকাও সাহিত্য পরিষদর মুখপত্র আহানর সাত না দেখলাঙ ।

লৈহীক পুলকরানি বা প্রকাশ করানির বধাতে দুরেইত থাক, সাহিত্য পরিষদর তরফেসু কমপক্ষে বছরে সাহিত্য সম্মেলন আহান করানির

প্রচেষ্টা পেয়াও নেই, ইচ্ছাও, নেই, দৃষ্টিভঙ্গিও নেই । সাহিত্য পরিষদের বয়স প্রায় পনের-ষোল বছর অইল, কিন্তু আজ পেয়া সাহিত্য পরিষদে সাহিত্য সম্মেলন আহান করানির হপন না দেহেছি । ছাত্র সংস্থার তরফেও সাহিত্য সম্মেলন কত খুঁরুদুম অ'গেলগা, কিন্তু সাহিত্য পরিষদের পাত্তা নেই । সমাজসেবীর দল আত্মপ্রচারে ব্যস্ত, সহস্রভাবে অপব্যাখ্যা অপপ্রচারর মাধ্যমে অন্যরে হীনপ্রতিপন্ন করিয়া নিজর কীর্তির ধ্বজহান তুলানির চেষ্টালো তানুর ঘুমতুম নেই ; সমাজর মঙ্গলরকা কুংগোয় খালকরতই !

সাহিত্য পরিষদ, শিলচর শাখার তরফেও ১৯৭৩ ইংরেজীত এ সিদ্ধারীত সাহিত্য সম্মেলন আহান অয়া গেলগা ; আজিকার এহান এ শিলচর শাখার দ্বিতীয় বার্ষিক সম্মেলনহান । সাহিত্য পরিষদ, শিলচর শাখার এ প্রচেষ্টা এহানর ডাঙর ঐতিহাসিক মূল্য আহান আছে । মাততে লাজে মেইথঙ লুকানি লাগের, এ সম্মেলন এহানর আয়োজন করণেও উনি বৈশ্বীয় সাহিত্য পরিষদের কুনো কুনো বর্ণধার গিরিগিথানিয়ে মাততারা—“তুমি বারো সাহিত্য সম্মেলন বুলিয়া কিতা আকতা লাগাছোতা ? এতালো কিতা করতায় বরে .” এসাদে মাততারা গিরিগিথানি উতার মনোবৃত্তির বিচারর ভারহান নিরপেক্ষ বিজ্ঞ শ্রোতৃমণ্ডলীর গঞ্জে থাইল । আমি ইমে কথা আকহান মাতিয়া লয়করিক খে, “সমাজর এ অবিন্যাসকারিতা এহান যানার আর কতোদিন বাকী আছেতা ?”

সমাজর এসাদে অবস্থার হাদিত যেতায় এ সাহিত্য সম্মেলনর আয়োজন করেছি উতারে, বিশেষ করিয়া সাহিত্য পরিষদ, শিলচর শাখার সভাপতি শ্রীমণিবাস্ত সিংহ (সিদ্ধারী) গিরকরে মোর অশেষ শ্রদ্ধা বারো ধন্যবাদ জানাউরি এবং অনুরোধ করুনি—শত বাধা-বিপত্তির ভিতরেদেও যেন এসাদে সাহিত্য-আলোচনা চক্র আবেইগোর আয়োজন অন্ততঃ বছরে আকখুঁরুদুম করকা । আমি ঔ দিন উহানর অপেক্ষায় আছি—যেদিন আমার ঘরে ঘরে কবি-সাহিত্যিক নিকুলতায়, ঘরে ঘরে আমার সাহিত্যর আলোচনা অইতই ; যেদিন আমার কনাক ঠোঁরে পালে পালে আমার ভাষার ছড়া উচ্চারণ করে করে খেলতায়, ইমাইন্দোলে লপদকে লপদকে

আমার ভাষালো এলা দিতায় ; যেদিন মন্দিরে মন্দিরে, মণ্ডপে মণ্ডপে
আমার ভাষালো আরতি বারো কীর্তনর ধ্বনি উঠতই । এসাদে সাহিত্য
সম্মেলনর ভিতরেদে ঔসাদে দিন আহানর শুভ আগমনর হপন আহান
দেহিয়ার । উহানলো সমাজর সাহিত্য-কৃষ্টির নবজাগরণে এসাদে সাহিত্য
সম্মেলনর ভূমিকা অপারিসীম । উহানলো আজিফার এ সম্মেলনর উদ্যোক্তা
গিরিগিথানিরে বিণেষ করিয়া এসাদে সম্মেলনর উদ্যোগর ব্যাপারে অভিজ্ঞ
শ্রীমণিকান্ত সিংহ গিরকরে আরতাও দৃঢ়তর মনোবললো এবং আরতাও
বৈচিত্র্যালো এসাদে সম্মেলন ঘন ঘন আয়োজন করানিরকা মোর আন্তরিক
অনুরোধ জানাউরি । বর্তমান অবস্থাত এসাদে সম্মেলন যত মিয়াম
অইতই, তত হবা ।

উপস্থিত গিরিগিথানি হাবিরে মোর শ্রুভেচ্ছা জানেরা এপের
মোর বক্তব্যহাস লয়করিঙ ।

বিষ্ণুপ্রিয়া মণিপুরী লোকসাহিত্য

লোকসাহিত্য বুলতে আমি হারপেয়ারতায় — কোনো অজ্ঞাত সমস্ত মানুসৰ খতান্ত স্বেচ্ছাভাৱিক ভাবে নিকুলেছে অথবা কোনো অজ্ঞাত মানুসৰে লোৱাচিত আছে এবং মানুসৰ মুখে মুখে প্রচলিত আছে সাহিত্য উতা । উত্তৰ মাঝে হমারতায় পৌৰানিক কাহিনী, উপাখ্যান, ঝাৰি, এলা, কবিতা, ফাৰ্টি (riddle), পোৱেই ইত্যাদি । এতা স্বেচ্ছাভাৱিক ভাবে বা স্বেচ্ছা চেষ্টায় মানুসৰ ওচৰে নিকুলে বুলিয়া স্বেচ্ছাভাৱেই এতাৰ লগে ঔ ঔ সময়কাল মানুসৰ জীৱনদৰ্শন, ধৰ্মবোধ, ৰুচি, বিশ্বাস, কৃষ্টি ইত্যাদি আত্মপ্ৰকাশ কৰে । উহানলো জাতৰ ধৰ্ম, দৰ্শন, কৃষ্টি বাৰো ভাষাৰ ইতিহাসে লোকসাহিত্যৰ উপযোগিতা অপৰিসীম ।

আমাৰ লোকসাহিত্যত যেহানি মি সংগ্ৰহ কৰেছ, বা পাছ, উতাৰে মোটামুটি চাৰিহান ভাগে ভাগ কৰে পাৰিয়াল—(১) ঝাৰি, (২) এলা, (৩) কবিতা বাৰো (৪) পোৱেই ।

১। (ক) বিষ্ণুপ্রিয়া মণিপুরীৰাও প্রচলিত ঝাৰিৰ মাঝে ‘আপাঙৰ ঝাৰি’ এতাৰ হাবিত্ত মিয়াম প্রচলিত । আপাঙে কিসাদে গাছৰ আগত পাৰণ বহেয়া মাছৰ পৰিবৰ্তে বগা পাইল, চৰ দাপা আহানৰ লগে গিয়া মানুসৰ ঘৰে চৰে হমেয়া কিসাদে ঢুলপ আগো বাড়াইল, হোৱকৰ ঘৰে গিয়া কিসাদে ৰাতি উঠিয়া চৰেদে ভাত খাইল, ধানৰ হাদিত সৰাহালৰ আঁতৰ আগৰ চিন উতাৰে গাৰালিৰ চিন বুলিয়া কিসাদে গাঙৰ গাহাৰি হাবি কুহৰে দৌছিল, ইন্দ্রসৱালেলৰ আঁতৰ লেজগো ধৰিয়া হাফহানাদে কাষতেগা কিসাদে পড়েছিল—এতা ঝাৰি আমাৰ কনাক মনৰে পুৰ আনন্দৰ খুৱাক দিয়া আহেৰ । এতা ‘আপাঙৰ ঝাৰি’ বুলিয়া পৰিচিত অইলেও এতাৰ ভিতৰে মানুসৰ বুদ্ধিমত্তাৰ এবং বিশেষ কৰে শিশু মনস্তত্ত্ব সম্বন্ধে অসুদৃষ্টিৰ নিদৰ্শন পেয়াৰ ।

(খ) আপাঙৰ ঝাৰিৰ পিছে আহেৰায় ৰাজনীৰ ঝাৰি অৰ্থাৎ ৰাজা-ৰাণী, ৰাজাৰ পুতক-মন্ত্ৰীৰ পুতক, ৰাজাৰ পুতক-ৰাজাৰ

জিলক—এতার স্মারি । রাজার কিসাদে সংকল্পহাল খনারকা বিয়ানেতো দেহেছিল বাঘপোরাও জিলকরে বিয়া দেছিল, রাজার অনিচ্ছা সত্ত্বেও কিসাদে দৈবচক্রে রাজার পুত্রক আগোর লগে রাজার জিলক আগোর লুহোও অছিল, রাজার পুত্রক আগোয় বুলতে বুলতে বিসাদে বীরত্ব দেহেরা রাজার জিলক আগোরে লুহোও করেছিল—এতা স্মারির ভিতরে রোমান্টিক চিন্তাধারার পরিচয় পেলার । উতার লগে পেলারায় দৈবর প্রতি বিশ্বাস এবং সংকল্পর বারো ন্যায়নিষ্ঠার প্রতি শ্রদ্ধা ।

(গ) উতার পিছে সরাহালর জিপুতর স্মারি আকতা আমার লোকসাহিত্যত উল্লেখযোগ্য ফান আহান দখল করিরা আছে । কুনো কুনো মতে সরাহালর নিঙোল সাতগো, মূনি আগো ; কুনো কুনো মতে হুন্দা নিঙোল সাতগো, কুনো কুনো মতে মূনি ছরগো, নিঙোল আগো । তবে বিশেষ করিরা সরাহালর নিঙোল সাতগো বুলিরাই মিয়াম প্রসিদ্ধ আছে । এ নিঙোল সাতগোর স্মারির লগে ‘কুন্দু খেলা’র অর্থাৎ সরোবরে হাড়ুরিরা খেলানির ঘটনা আকেইহান যেসাদেও ধার । মণিপুরর পৌরাণিক স্মারিত পেলারতা—সৃষ্টির পয়লা চারিয়বারাদে হুন্দা পানি আছিল । ‘লেইপুমখো’ বুলিয়া নয়গো দোঁরে সবর্গন্ত মাটি বেলেরা পৃথিবীহান হংরেছিতা । ঐ সময়ত ‘লেইনর’ বুলিরা সাতগো দোঁনিঙোলে পানি উতার গজে নাছিরা খেলেরা আছিল । এ স্মারি এহানর লগে সরাহালর নিঙোল সাতগোর সম্পর্ক আহান থানা সাকরের । কুনো কুনো স্মারিত পেলারতা, এ নিঙোল সাতগোর সন্তর্ষিমডল অছিতা । যেতাও অক, এ স্মারি এতার ভিতরে রোমান্টিক চিন্তাধারার আভাস পেলার ।

(ঘ) এতা ছাড়া, হিঙাপীর স্মারি আকতা আছে । হিঙাপীয়ে কিসাদে করিরা দেশ আহানর মানু খেইতে খেইতে নিঙোলশো আকগোরে ইজু বানাপেয়া না মারিরা থছিলী, বিসাদে রাজার পুত্রক আগো উপের আহিল আরো নিঙোল উগোর লুকেরা থছিলী—ইত্যাদি স্মারির ভিতরে এড্ভেণচারর আভাস পেলার ।

২। (ক) এলার মাঝে কৃষি সম্পর্কীয় এলার কথা পয়লা আহের ।

এবার মাঝে হাবিত প্রসিদ্ধহান অইলতায়—বরণ ডাহানির এলাহানি
 ('প্রতিশ্রুতি' ১০ম সংকলন দৃষ্টব্য) । এলা এহানাত প্রাচীন ধর্ম, ভাষা
 বারো জাতের ইতিহাসের অনেক খুরাক পেয়ার । মণিপুরে সময় আহানাত
 আমার ঠার এহান প্রচলিত আছিল; উহানর জান্জদ্বা প্রমাণ এলা এহানে
 দেই — “খুমোলর মাটি হুকেইল, বরণ দিরাতে দৌরাজা ” । এলা এহানাত
 হারপেয়ার যে, ঐ সময়ত আমি বৈষ্ণব ধর্মত দীক্ষা না নেছিলঙগা ;
 পাহাঙপা বারো সরালেল দিয়োগো দৌর মাঝে উচ্ছান পাহিলা । এলা
 এহানাত এহানও হারপেয়ার যে, ঐ সময়কার বিষ্ণুপ্রিয়া মণিপুরী ঠারে
 মেইতেই ঠারর প্রভাব মিয়াম জবর অছিল ('কৈফ' ১ম সংখ্যা দৃষ্টব্য) । উতা
 ছাড়া ঐ সময়কার কাব্য চেতনা সম্পর্কে এলা এহানাত অনেক ধারণা
 পেয়ার । মি মিয়াম হবা পাছদু পারেঙ কতোহান না তুলিরা নুৱারলু—

“বাটিয়ে আলি কারিরী মাঝে ঝঙনেমে(১) ।

মুঠিমদুকা(২) চেইলুতা সেনা(৩) চাঙনিঙে ॥

ডেইনার দিল দুনুবহান ছিরতেও না ছিরের ।

উতানর আগার বেজুরিজার ধরতৌ না ধরের ॥”

এতা ছাড়া ইমাইন্দোলে সিংনা দিরা রুৱা রুৱেইতে দিলা অনেক
 এলা আছে । দৃষ্টান্তস্বরূপ পারেঙ আহানি দিঙ —

“হুনাগো অটিয়ো, রুপারো অটিয়ো !

পানা পাতা গুৱাচিলা পাতালা গুহা দেই ।

সুনু তুতা নামকরে খেই, হুচিকা গুহা দেই ॥”

(খ) কৃষি সম্পর্কীয় এলার পিছে আহেরতায় গৃহকর্ম সম্পর্কীয়
 এলা, অর্থাৎ ফুতি বুনতে, ঘর লেপতে বা খান বানতে ইমা ইন্দোলে
 দিলা এলা । যেমন—

“বাগা আতে খারৌ নেই, কাণছিড়া কাণে আংঠি নেই ।

পালছে পালছে গিদেইর কাণহান হিড়েছে ॥”

(গ) শৌ ঠৈমকরানির এলাও অনেক প্রচলিত আছে ।

(১)আলির পদতার লু'ত, (২)মুদুসো, (৩)হুনা

দাঁটারস্বরূপ টুকরা আহান নিও —

“জাপিরো ফেন(১), উদুর কাণ,

চিঙনা চেরৌ দাভিনী, আরুবা বেম্বুল সাদিনী ।” ইত্যাদি ।

(ঘ) স্মারি সম্পকীয় এলার (ballad) মাঝে হাবিত্ত প্রসিদ্ধ এলাহান
তইলতার—মাদই-সরালেলর এলা উহান । এলা এহান মণিপুরে পইলা
গৌড়ীয় বৈষ্ণব ধর্ম হমেইল উবাকা রচিত অছেহান বুলিয়া আমি
অনুমান বরে পারিয়ার । এলা এহানাত্ত প্রমাণ অর যে, আমার পূর্ব
পুরুষে মদ পিয়েছিল, বারো হুবরর মাংস খাছিল—

“নাষেইগা মাদই নাষেইগা, তোব বাবারো ঘরে নাষেইগা ।

তোব বাবারো ঘরে গেলেগা, মদরো শরাপ পিতেইগা ।

মদরো শরাপ পিতেইগা, হুবর পহু খেইতেইগা ।” ইত্যাদি ।

এপের গাঁতসদামী গিরবর এলা তুপ আহান নিওনিও অয়ার—

“আগে আমার বেরাপায়তে মাদু মাংস খাছিল ।

কুকির সাদে জুরা বাধিরা কাণে কলঙ লাগেইগা ।” ইত্যাদি ।

পানি বারো বেরবর স্মারি আহানর ভিতরেও এলা পদ কতোগো আছে—

“পানিরে পানি, আয়নে ঘরে বিকগা ।

নাইতৌ নাইতৌ নাইতৌ,

আগেতে তোব বনক অছিল, এবাকাতে তোব মইলক অইল ॥

আগেতে তোব জিলক অছিল, এবাকাতে তোব বহক অইল ।”

(ঙ) এতা ছাড়া, মানুরে বেজানি বা হাস রস সৃষ্টি করানির
উদ্দেশ্যে হংকরা এবং প্রচলিত এলা অনেক আছে ।

৩। (ক) ববিতার মাঝে হাবিত্ত মিয়াম প্রচলিত অছেতার খেলার ছড়া ।

আগেকার দিনে বিভিন্ন রকমর খেলাত বিভিন্ন রকমর ছড়া ব্যবহার করলা—

(i) পানি খেজং নাখেজং খেজঙে নাখেজং ।

মৈরাং কাণা কাওনাছে, সারি কাওনাছে ॥

(১)গুড়ুনি

(ii) কুকারা কুকুরী(১) সনে বনে বন কুকারার নাহেইব,
খেইব পহুর কাণ ।

(iii) চিণ্ডিকি মিণ্ডিকি, নাই অরে ধানর তল,
কালি আইলে পুড়া মাছ আগোয় ভাত আককামড়ে খেইছগা খেইছগা,
এরাবিলু বেরাবিলু দুদ্বারর কোণে লুকেইছগা লুকেইছগা ।

(iv) পারোঅ কুরকুরার, পারোঅ কুরকুরার,
পারোর নাহা চেইতেতে বেলীঅ হমেইলগা । ইত্যাদি

(খ) এতার পিছে শৌ ঠেমকরানির ছড়ার কথা আহের । বৃন্দ
পাড়ানি' এতা পৃথিবীর হাবি জাতরাও আছে এবং আমার বিস্ময়প্রসূ
মণিপুত্রীও উহানর ব্যতিক্রম নাহে । দৃষ্টান্ত আহান লইক—

“ঘরর বারাদে মেকুরগো, বাহার তলেদে তকপাগো,

... মেকুরগোও কেঙ, তকপাগোও কেঙ,

ঘরোবারাদে টম্প পড়িয়া পড়া ধানগোও খুটেইল কাজে
মুরে বারি দিয়াও কঙ ।”

৪। ‘পৌরেই’ আমার ঠারর লোক সাহিত্যত অমূল্য সম্পদ আহান ।
‘প্রতিশ্রুতি’ পত্রিকায় আমার রক্ত এতা সংগ্রহ করাত লাগেহে এহান ণি রাম
হারোর কথাহান । হৃদয় পৌরেইলো ডাঙর আলোচনা আহান অনা যাবরের
বিস্তর আজি স্থানাভাবে ঔ আলোচনাত না গেলাঙগা । হৃদয় এহান
মাতিয়া মি লইকরানি মনার্টির যে আমার পৌরেইর ভিতরে আমার পুণ্ড-
পুণ্ডর হৃদয়জ্ঞান, অলংকারজ্ঞান, সুস্কন্দশিতা বারো বুদ্ধিমত্তার পরিচয়
পেরার । পৌরেই কতোহান দৃষ্টান্ত নাদিয়া নুবেইল—

(ক) ধরার লাম লইলা, চাকালার বনে হমেইলা ।

(খ) এয়ারি বার্তন, বুলনে কীর্তন ।

(গ) বলে ছলে বামনে খানা, পিতৃলোকে উদ্ধার পানা ।

(ঘ) ঘাম খেরি বেলে জল খেরি খানা ।

(ঙ) খাছি উতারকা ভাত রাধো, নাহাছি উতারকা ধান বানো ।

(১) মুরদুক-মুরগী

বিষ্ণুপ্রিয়া মণিপুরী সাহিত্য*

(অতীত, বর্তমান বারো ভবিষ্যৎ)

মাননীয় সভাপতি গিরক, বিভিন্ন অঞ্চলেও আহেদিয়াছি গিরিগিথানি, শিংলা অঞ্চলর সজ্জন গিরকগাছি ও ইমাগাছি, বারো মোর পরমস্নেহর ছাত্র-ছাত্রী—

দীর্ঘদিন অইল, এ শিংলা অঞ্চলর মোর পরম আত্মীয়— মোর সমাজর গিরকগাছি, ইমাগাছি বারো তরুণ যুবক-নিঙোলপী হাবির লগে পরিচিত অনার—তানুর লগে ততরানির—তানুর মুঙে কথা মাতানির প্রবল আকাঙ্ক্ষা আহানলো আছ। আজি মোরে ঐ সুযোগ উহান দেনারকা এ অনুষ্ঠানর চৌরাঙপা গিরক-গাছিরে মোর কৃতজ্ঞতা বারো ধন্যবাদ জানাউরি।

মোরে আজি আলোচনারকা দেছি বিষয়হান অইলতায়— ‘বিষ্ণুপ্রিয়া মণিপুরী সাহিত্যর অতীত, বর্তমান বারো ভবিষ্যৎ’। বিষয়হান অতি ডাঙর ; এ অল্প সময়ত বিষয় এহানর গজে বিস্তৃত আলোচনা সম্ভব নার। উতার গজে, ১৯৭৫ ইংরাজীত সিংগারীত আয়োজিত সাহিত্য পরিষদর ভাষণে আমার প্রাচীন সাহিত্য সম্বন্ধে মুটামুটি বিস্তৃত আলোচনা আহানি করেছিলো ; উহানে আজি প্রাচীন সাহিত্যর হুদা দিগ্‌দর্শন আহানি দিয়া বর্তমান বারো ভবিষ্যৎ সাহিত্য সম্বন্ধে খানি দীঘল আলোচনা আহানি করিক। তবে এ বিষয়েউ বিস্তৃত আলোচনা এ অল্প সময়ত সম্ভব নেই, উহান হয়তো না মাতলেউ যাকরের। আরাক কথা আহান—আমার প্রকাশিত সাহিত্য নিতান্তই কম, বলিষ্ঠ সাহিত্য-পত্রিকার অভাবে পত্রিকার মাধ্যমে হাবি সাহিত্যিকর

* ১৯৮১ ইংরাজীর ফেব্রুয়ারী মাহাত ল্‌লভছড়াত অনুষ্ঠিত সাহিত্য পরিষদর বার্ষিক সম্মেলনে প্রদত্ত প্রধান অতিথির ভাষণহান।

থবর পানিউ সম্ভব নেই ; বারো করপেথ আকারে আছে সাহিত্য
উতাউ হাবি পানা সম্ভব নেই । স্মৃতিরাং মোর এ বিবরণীত কোনো
লেখকর নাঙ অনুলিখিত থাইলে মোরে ক্ষমা করেদিবাঙ ।

বিষ্ণুপ্রিয়া মণিপুরী সাহিত্যর সৃষ্টি কুশাকা আছে, উহান
সঠিক করে মাতে তুরারিয়ার । এ শতাব্দীর আগেকার লিখিত
কোনো সাহিত্য আমি না পাছি ; পেয়ারতার মাঝে হুদা মুখে
মুখে প্রচলিত লোকসঙ্গীত ত'হান-আহান, যারি, পোরেই বারো
ছড়া খানি । লোকসঙ্গীতে হাবিত্ত বিখ্যাত এলা ত'হানর মাঝে
প্রথম হান অইলতায়— “সরালেলেতে রাজারো লেইপাক বুমৌ
কইল ... থুমোল' মাটি হুকেইল বরণ দিয়াদে দৌরাজা.....”
—এ বরণ ডাহানির এলা এহান । এহানরেই মি বিষ্ণুপ্রিয়া
মণিপুরী লোকসাহিত্যর প্রাচীনতম নিদর্শনহান বুলুরি । মোর
মতে ১৬শ শতাব্দীর প্রথমার্ধত, অর্থাৎ আমি গোঁড়ীয় বৈষ্ণবধর্ম
গ্রহণ করানির প্রায় দেড়শ বছর আগে মণিপুরে এলা এহান
রচিত অছেহান । দ্বিতীয় বিখ্যাত লোকসঙ্গীতহান অইলতায়—
“মাদই গিদেই সালইলী”—এ এলা এহান—যেহানাত আমি
সরালেলের লগে লুহোঙ দিয়াছি নিঙোল আগোর বিয়োগাত্মক
ঘটনা আহান পেয়ার । এলা এহান ১৮শ শতাব্দীর মধ্যভাগে
অর্থাৎ আমি গোঁড়ীয় বৈষ্ণব ধর্ম লনার খানি পিছে রচিত অছেহান
বুলিয়া মি অনুমান করুরি । যারির মাঝে, আপাঙর যারি,
রাজা-রাণীর বা রাজার-পুতক—রাজার-জিলকর যারি এবং
নানাধরণর প্রেমকাহিনী আছে । এতা হাবি লোকসাহিত্যর
ভিতরে হমার । এ যারি এতার অনেকহান নরসিংপুরর
শ্রীপুলোকেশী সিংহ গিরকে সংগ্রহ করেছে । উতা ইংরাজীলো
প্রকাশ করানিরকা আমি চেষ্টা করিয়ার । এতার বাহিরে
লোকসাহিত্যর ভিতরে আহেরতা পোরেই বারো ছড়া ।
অধ্যাপক ব্রজেন্দ্রকুমার সিংহর প্রকাশিত ‘প্রতিশ্রুতি’ পত্রিকাত

পৌরেইর ডাঙর সংগ্রহ আহান আছে । ছড়ার ভিতরে
 আহেরতা বিশেষভাবে খেলার ছড়া বারো ঘুমপাতানির ছড়া ।
 যেমন, ‘চিক্কিকি মিক্কিকি নাই অরে ধানর তল, কালি আইলে
 পুড়া মাছ আগোয় ভাত আককামড়ে খেইছগা খেইছগা, এড়া দিলু
 বেড়া দিলু ছরারর কোণে লুকেইছগা,” “কুকারা-কুকুরী সনে বনে
 বন কুকারায় নাহেইব খেইব পহুর কাণ”, “ঘরর বারাদে
 মেকুরগো বাহার তলেদে তকপাগো, মেকুরগো কেউ তকপাগো
 কেউ, ঘর বারাদে টপপ পড়িয়া পড়া ধানগো খুটেইলো কাজে মুড়ে
 বাড়িদিয়াও কঙ” ইত্যাদি ।

বিষ্ণুপ্রিয়া মণিপুরীর লিখিত সাহিত্য পানা অকরলাঙতা এ
 শতাব্দীর তৃতীয় দশকেও । এ যুগর পইলাকার স্মরণীয় লেখক
 চারিগো—সিদ্ধারীর (শিলচরর) লেইখোমসেনা সিংহ, শনি-
 ছড়ার এইগা বা মদনমোহন শর্মা, চিপরসান্ননর আমুসেনা বারো
 সর্বজন পরিচিত গোকুলানন্দ গীতিস্বামী । এতা হাবির রচনা
 যতহান পাছু, মি সংগ্রহ করিয়া থছু । লেইখোমসেনা গিরকর
 নাটক দুহান— ‘বভ্রবাহন’ বারো ‘মণিপুর-বিজয়’, মদনমোহন
 শর্মা গিরকর রচনা হাবি কীর্তনর উপযোগী করিয়া ইকরাতা ।
 উতার মাঝে ‘বালিপিও’, ‘হরিশ্চন্দ্র’, ‘সুবল-মিলন’, ‘তিলোত্তমা’,
 ‘বাসক’, ‘সুদামা-বিপ্র’ ইত্যাদি উল্লেখযোগ্য । আমুসেনা গির-
 কর রচনা হাবি রামায়ণর গজে ; উতাউ কীর্তনর উপযোগী
 করিয়া ইকরাতা, যেমন, ‘অঙ্গদ-রায়বার’, ‘লক্ষণর শক্তিশেল’,
 ‘তরনীসেন বধ’, ‘নাগপাশ’ ইত্যাদি । গীতিস্বামীর রচনার
 মাঝে পেয়ারতা—সমাজ-সংস্কার মূলক এলা বারো নাটক, রাখা-
 কুঞ্চলীলা বিষয়ক পদাবলী বারো অন্যান্য কবিতাবলী । এতার
 বাহিরে প্রতাপগড়র দুর্গাচরণ সিংহ গিরকে ‘বভ্রবাহন’ বুলিয়া
 নাটক আহান ইকরেছিল বুলিয়া হনেছু, বারো শিংলার নাকু
 অজা বারো কুনেই পণ্ডিতর ইকরা ত্রিনাথ পূজার এলা অনেক

আছে বুলিয়া উ হুনেছু । মি অনেকদিন আগে উতা সংগ্রহ করাও
বুলিয়া আহেছিলু, কিন্তু কিনাউ নাপেইলু ।

যেতাউ অক, এ যুগর লেখকর ভিতরে হাবিত উল্লেখযোগ্য
এবং বিষ্ণুপ্রিয়া মণিপুরী সমাজর চিরশ্রদ্ধার পাত্রগো অয়া থাই-
তইগো—গোকুলানন্দ গীতিস্বামী । তার রচনাত সমাজর প্রতি
তার নিকলুষ প্রেম, ইমাইন্দোলর প্রতি তার প্রগাঢ় শ্রদ্ধা, নায়
নীতির প্রতি নির্ভী, অর্থনৈতিক সচেতনতা, সাম্যবাদর প্রতি
অটুট আস্থা ইত্যাদি জ্বলজ্বল করে দেহিয়ার । গিরক এগোরাও
আরাক অতি প্রশংসনীয় গুণ আহান—যেহান মি আগে কুনো
ভাষণে বা রচনাত মাতে হুরারেছু—উহান অটলতায়—তার
সমস্বয়ী ভাষা । তার ভাষাত বিশেষ করিয়া মাদইগাও বারো
রাজারগাওর অপূর্ব সম্মিলন । এবং মি অতি স্পষ্ট ভাষালো এবং
দৃঢ়তালো মাতুরি যে—এসাদে সমস্বয়ী ভাষা এহানেই আমার
সাহিত্যর আদর্শ ভাষাহান অনা থকর—লেখক হাবিরে এহান
মনে থনারকা মি অহুরোধ করুরি । এ সমস্বয়ী ভাষা এহান
অনুসরণ না করলে মাদইগাও বারো রাজার গাওর দূরত্ব এহান
কমানি সম্ভব নেই ।

এ যুগ এহানর পিছে লেখক দল আহানরেলো আমি বিষ্ণু-
প্রিয়া মণিপুরী সাহিত্যর পর্যায় আহান করে পারিয়ার । এ
পর্যায়ত আইতারাতা নাট্যকার ও পদাবলীকার গোলাপসেনা
সিংহ, কবি রোহিনী রাজকুমার, কৃষ্ণধন সিংহ, গন্ধরাজ সিংহ
বারো পদাবলীকার গোষ্ঠবিহারী সিংহ । ‘ফুনির থোরাও’-র
লেখক গৌরমোহন সিংহরেউ এ পর্যায়ত আনে পারিয়ার । এ
লেখকগোষ্ঠী এহানর হাবিরতাউ দৃষ্টিভঙ্গী প্রায় একরকম ।
তাহুর লেখাত আধুনিক বস্তুবাদর দৃষ্টিভঙ্গী মিয়াম কম পেয়ার ।
তাহুর লেখার মাঝে সমাজ জাগরণীর দৃষ্টিভঙ্গী উহানেই প্রাধান্য
পাছে । তাহুর নাটক, কবিতা, এলা ইত্যাদি নানা রকমর রচনা

আছে, হায়হান, কিন্তু হাবি রচনার ভিতরে একই ধরণের মনস্তত্ত্ব
 ক্রিয়া করে। উহান অইলতায়, সমাজ-জাগরণ—সমাজের ভাষা-
 কষ্টির জগরণ। কৃষ্ণধন সিংহর রচনাত ভক্তিমূলক বারো
 নীতিমূলক রচনাউ আছে। গঙ্গরাজ সিংহর রচনাত কনাকর
 ছড়া খানিও আছে। রোহিনী রাজকুমারর রচনাত ভক্তিমূলক
 রচনা, কনাকর ছড়া বারো অন্যান্য কবিতাউ আছে।
 গৌরমোহন সিংহর রচনাত সমাজ-জাগরণীর বাহিরে অন্যান্য
 কবিতাউ আছে। গোষ্ঠবিহারী সিংহর পদাবলী আমার
 সাহিত্যত বিশিষ্ট অবদান যদিও উতার প্রচার-প্রসার
 নিতান্ত কম। গোলাপসেনা সিংহর লেংকরা ‘মণিপুর-বিজয়’
 বারো ‘পুত্রপরিচয়’ নাঙর নাটক দুহান বারো পদাবলী খানিও
 আছে। এহান পর্যন্ত মি অতি সংক্ষেপে প্রাচীন যুগর বারো
 বর্তমান যুগর প্রথম পর্বর কথা মাতে গেলুগা।

এবারে খানি বিস্তৃত করিয়া বর্তমান-যুগর সাহিত্যর
 আলোচনা আহানি করিক। বর্তমান যুগে অনেক নাট্যকার,
 ছোট গল্পকার, প্রবন্ধকার বারো কবির আবির্ভাব দেহিয়ার।
 নাট্যকারর ভিতরে নরসিংপুরর অশ্বিনী কুমার সিংহ, ইন্দ্রকুমার
 সিংহ বারো শিংলার ‘ফাগিরাম’ নাট্য সংস্থার প্রবর্তক সুধম্মা
 সিংহ—এ তিনে’গির নাঙহানি পইলা আহের। উতার পিছে
 নিউশিঙ অয়ারতায় নরসিংপুরর দেবদত্ত সিংহ বারো প্রতাপগুপ্তর
 বীরেন্দ্রকুমার সিংহর নাঙ অশ্বিনী কুমার সিংহর পৌরাণিক নাটক
 দুহান ‘হরিশ্চন্দ্র’ এবং ‘সাবিত্রী-সত্যবান’, বারো ‘প্রত্যাবর্তন’
 নাঙর সামাজিক নাটক আহান। ‘প্রত্যাবর্তন’—নাটক এহান
 আধুনিক যুগর উপযোগী করিছা লেখানিয়ে অত্যন্ত উপভোগ্য আছে,
 উহানাত সন্দেহ নেই। গিরক এগোর হাবি লেখাতো তার
 ভাষার পারিপার্শ্বিক বারো চরিত্র রূপায়ণ মিয়াম লক্ষণীয়। এ
 গিরকর নাটকহানি হাবি প্রকাশ করানির ভারহান অজা বাবাই-

সেনা প্রকাশনীয়ে নেহেগ। ইন্দ্রকুমার সিংহর 'হরিবলা এহরি', 'কৈলাসে লৈলাট', 'সেন্সাস', 'মণিহারী', 'জরাসক'—এ পাচো-হান নাটক পেয়ার। গিরক এগোর নাটকে সমাজর কুসংসার, শীনতা ইত্যাদির বিরুদ্ধে কটাক্ষ দেহিয়ার। তার হাস্য রস সৃষ্টির দক্ষতা এবং ভাষার গজে আধিপত্য অত্যন্ত প্রশংসনীয়। অজা বাবাইসেনা প্রকাশনীয়ে এ গিরকর নাটক দুহান প্রকাশ করেছে; বাকী উতা পুকাশ করানির দায়িত্ব নেহেগ। সুশ্রী সিংহর 'ফাগিরাম' নাটকমালা হাস্য রসর অফুরন্ত উৎস। হাস্য-রসর ভিতরেদে এ লেখক গিরকে যেসাদে অতি দক্ষভাবে সমাজর চিত্র ফুটেয়া তুলেছে বারো মানুর মনস্তত্ত্বর সূক্ষ্ম সূক্ষ্মভাবর রূপায়ণ বারো উতার গজে কটাক্ষ করেছে, উহান অত্যন্ত প্রশংসনীয়। দেবদত্ত সিংহর 'সুমতি' নাটক উহান শরচ্ছন্দর 'মেজদিদি'র রূপান্তরহান অইনেউ উহানরে আমার সমাজ-চিত্রণর মাধ্যমে উপস্থাপিত করানিত লেখকর দক্ষতা দেহিয়ার। বীরেন্দ্র কুমার সিংহর 'ডাকাত কালান্তিক' বারো 'মানুর কথায় ঘর না ভাগিয়ো'—এ নাটক দ্বাহানি উল্লেখযোগ্য। আমার নাট্য সাহিত্য নিতান্তই হুর্কাত। নাট্য সাহিত্যর পুষ্টিরকা আমারতা কেন্দ্র আগোত স্থায়ী মঞ্চ আগোর দরকার; কুস্থাকা আমার ভাগাত এসাদে মঞ্চ আগো আহিতই, মাতে নুরারিয়ার।

ছোট-গল্পর বারাদে বিষ্ণুপ্রিয়া মণিপুরী সাহিত্য আরতাউ দরিদ্র। যথার্থ ছোটগল্পকার বুলতে ইন্দ্রকুমার সিংহ বারো ব্রজেন্দ্রকুমার সিংহর নাঙহানিই পইলা আহের। ইন্দ্রকুমার সিংহর 'ছনার অরিডী', 'পোষ্টোফিস', 'খলা চিঠি', 'খুন্তল', 'ছবি', ইত্যাদি বারো ব্রজেন্দ্রকুমার সিংহর 'সিকাডেইনী', 'উত্তরা', 'লেইমাতল', 'বেলীহান হমানির পরে' ইত্যাদি গল্প তানুর সূক্ষ্ম বারো দরদী অনুভূতির নিদর্শন বহন করেন। কনাক পারেঙর ভিতরে পইলাই আহেরতা শ্যামানন্দ সিংহর নাঙহান।

অজা বাবাইসেনা প্রকাশনীতে প্রকাশ করা তার 'অজা বাবুলোক' নাটর গল্প-সঙ্কলন উহানাত সমাজের অবিচার, দরদহীনতা, সামাজিক কুষ্টির প্রতি শ্রদ্ধাহীনতা ইত্যাদির বিরুদ্ধে এ লেখকের প্রতিবাদ ফুটিয়া উঠেছে। নরসিংপুরের শ্রুতিকুমার সিংহর লেখা যদিও মিয়াম প্রকাশিত নাহে, তথাপি তার যে ছ'হান আহান গল্প নিকুলেছে, উতার মাঝে তার প্রচণ্ড দক্ষতার জ্বাঞ্জলা প্রমাণ আছে। তার ইকরা 'কেথকপী', 'গংনেই ফুল', 'কোঁহাঙ', 'মণিদা বেলেয়া গেলগা', নাটর ছোট গল্প অত্যন্ত হৃদয়গ্রাহী।

প্রবন্ধকাররতা আরতাউ অভাব। ব্রজেন্দ্রকুমার সিংহ, কালীপ্রসাদ সিংহ বারো বরুণ কুমার সিংহ—এ তিনোগির বাহিরে প্রবন্ধকার নেই বুলেউ যাকরের। ব্রজেন্দ্রকুমার সিংহর ছন্দবিষয়ক প্রবন্ধ, কালীপ্রসাদ সিংহর ভাষাতত্ত্ববিষয়ক প্রবন্ধ, বরুণ কুমার সিংহর সমালোচনা মূলক প্রবন্ধ আমার প্রবন্ধ সাহিত্যর সম্পদ। এতার বাহিরে প্রবন্ধকারর ভিতরে মহীদেব সিংহর নাঙে উল্লেখ করে পারিয়ার। ভ্রমণ কাহিনীর ভিতরে 'আমার পৌ'—পত্রিকাত প্রকাশিত শ্রীমতী কুন্দুম সিংহর 'সোভিয়েৎ দেশে মি' নাটর ধারাবাহিক রচনাত লেখিকা গিথান-কর সরল, সরস ও দরদী প্রকাশভঙ্গী বারো ভাষার পারিপাটা ও দক্ষতার ভিতরেদে গিথানকর পরিপক আতর পরিচয় পেয়ার। উপন্যাসর ভিতরে—'বরাকপ্রবাহ' পত্রিকাত ধারাবাহিকভাবে প্রকাশমান হুঙ্কুপী-র লেখা 'মাচুহানর নাঙ তেহুরালাঙ' সমাজ চিত্রণে, চরিত্রকপায়ণে, ভাষার মধুরতায় মিয়াম মনোজ্ঞ। করপেথ আকারে আছে শ্রুতিকুমার সিংহর 'জয়া' নাটর উপন্যাস ঘটনাবিন্যাসে, অঙ্কতির গভীরতায়, ভাষাপ্রয়োগর নিপুণতায় অতি সুন্দর।

এ দুগর কবির পইলাকার পারেঙে আইতারাতায়—মদন-

মোহন মুখোপাধ্যায়, ব্রজেন্দ্রকুমার সিংহ বারো ধনঞ্জয় রাজকুমার ।

মদনমোহন মুখোপাধ্যায়র 'ঠাইগ', 'তেলা ককক' বারো বিভিন্ন পত্রপত্রিকাত প্রকাশিত কবিতা পাঠকর মনে বিরাট আনন্দর সঞ্চার করে। গিরকর লেঙ্করা 'বসন্তহান আহিল যারগা ঠাইগ তি' এলা এহান হুনিল মাহেই হুনানি আহের । মদনমোহন মুখোপাধ্যায়র রচনাত বিপ্লবী দৃষ্টিভঙ্গী আহানরই প্রাধান্য আছে । হাদি-হাদিত প্রেমাস্পদরাও আত্মসমর্পণ বারো বিচ্ছেদ-বিরহর চিন আকেইহান আছে । তার বিশিষ্ট পারেও কতোহানি—

(১) এবাকা এপেই চলের কুরুক্ষেত্রহান ।

মরলৌ লাভ । জিঙলৌ লাভ ।

(২) কোকিল আগোর হুংলি রহানিলো

যৌবন-রঙ মাতামর বসন্ত নাহের ।

ব্রজেন্দ্রকুমার সিংহর কবিতা অনেক গজর স্তর । তার লেহাউ ফুলগরে', 'এলার খুন্তল', 'মিকুপর চেরী কুল' বারো কর-পেখ আকারে আছে 'মেরাক-সেরাক' আমার সাহিত্যর অমূল্য সম্পদ । তার অতুলনীয় শব্দযোজনা, বাক-প্রতিমা, চিত্রণর সূক্ষ্মতা বারো নিখুত ছন্দ নিঃসন্দেহে তারে চির-অমর করিয়া থাইতই । তার কবিতাত প্রিয়তমার প্রতি তার ঠাইগ-বুজা প্রেম, প্রিয়তমার চিন্তায় নিমগ্নতা বারো প্রিয়তমারে পরিপূর্ণভাবে নাপানির মর্মব্যথা আহান অহুভব করিয়ার । গিরকর উল্লেখ-যোগ্য পারেও কতোহানি—

(১) লেউ ফুলে ফুলে বেলীহান আগ্রণর

সিলয়া পড়েছে পাতার খুয়ায় ।

(২) বসন্ত ফুল নেয়ক দুঃখ নেই

মোর জীবনর চিরবরিষাত থাইছ ।

(৩) তোর সালেদে জনম এহান মাউকরানি ।

তোর সালেদে আহি দিয়গি মামকরানি ॥

হাস্যরস সঞ্চারে ব্রজেন্দ্রকুমার সিংহর কবিতা অদ্বিতীয় ।

দৃষ্টান্ত আহানি লইক—

(১) ডাক বায়েয়া নাঙ করেছে মুঙর গাঙর মেইন ।

ফালুর ভাবক লৌদিতারা খেইন গিরক খেইন ॥

(২) জাঙাক গতে হিনেইলগা পড়লু জঞ্জালে ।

খাল করিয়া কুল নাপেয়ার দিয়গি জালমালে ॥

খনঞ্জয় রাজকুমার অত্যাধুনিক যুগর সার্থক কবিগো ।

তার কবিতাত তার প্রিয়তমারে পানার আকুল আকাঙ্ক্ষা বারো
প্রিয়তমারে নাপানির মর্মদাহ ফুটিয়া উঠের । এ গিরকর
কবিতা বিষ্ণুপ্রিয়া মণিপুরী সাহিত্য জগতে হুয়া দিগন্ত আহান
আনে দিলো । দৃষ্টান্ত আহানি—

(১) শ্মশানর জিগ আহির পানিলো কিসাদে নিবানি ?

(২) ঈশ্বরর লগে তুলনা করিয়া চেইতে

এবাকাও মি কতোহান তলয়া আছু ।

তার অমর খেয়ামর অনুবাদ আমার সাহিত্যর অমূল্য সম্পদ ।

এতার লগে লগে আহেরতায় সেনারূপ সিংহ, গোপীনাথ
সিংহ, চন্দ্রবদন সিংহ, শশীকুমার সিংহ, চন্দ্রকান্ত সিংহ, বরুণ
কুমার সিংহ বারো কালাসেনা সিংহর নাঙ । কনাক-পারেঙর
নায়ে সমরজিৎ সিংহ, বিমল সিংহ বারো শামানন্দ সিংহ
—এতরেউ আমি এ পর্যায়ে আনে পারিয়ার ।

সেনারূপ সিংহর গীতি-কবিতা বিখ্যাত । তার কবিতার মাঝে
প্রেমাস্পদরে পানার আকুল আকাঙ্ক্ষা, বিভিন্নভাবে তারে পানার
চেষ্টা, বারো প্রেমাস্পদরাঙ আত্মসমর্পণর বিশুদ্ধ রূপ আহান দেহি-
য়ার । গিরকর লেংকরা 'শাতনির খোরাং' বারো বিভিন্ন পত্রিকাত

প্রকাশিত কবিতা তার কল্পনার বারো বাক-চিত্র গভীরতালো
পরিপূর্ণ। গিরকর পদাবলী আমার সাহিত্যের অমূল্য সম্পদ।
তারাতো পারেও কতোহানি—

(১) মালতী অলয়া তিরে যদি শাতইলেইছতে মোর বাগানে।
(১) অনুরাগে ঢলঢল আহিগি ছলছল বানেইতে যারি যতনে।
অবশ্যই ছন্দর অভাবে বা রো শব্দ চয়নর দোষে গিরকর কবিতা
খানি তর্কল আছে। ছন্দ বজায় থায়া কবিতা ইকরানি অকরলো
সময় উহানাত গিরক এগো অকালে আমারে বেলেয়া গেলগা।
গিরক এগোর দেহত্যাগর পিছে তার করপেথ উতা সংগ্রহ করাত
গেছিলুগা, কিন্তু তার আত্মীয়স্বজনে উতা মোরাও নাদলা।

চন্দ্রবদন সিংহর অনেক উচ্চ মানর রচনা আছে। কিন্তু
আত্মপ্রচারে অনিচ্ছুক, নিরঙ্কর ও গিরক উগোয় ছহান-
আহান কবিতা ছাড়া আর কিতাউ প্রকাশ নাকরেছে। মিয়াম
ছঃখর বিষয়হান—গিরক উগো অতি অল্প বয়সে আমারে বেলেয়া
গেলগা। তা জিংতা অয়া থাইলে আমি তারাতো অনেক সম্পদ
পেইলাও অইছ বুলিয়া মি দঢ়ভাবে বিশ্বাস করুরি। তার দেহ-
ত্যাগর পিছে ১৯৭০ ইংরাজীত তার করপেথ উতা খানি সংগ্রহ
করেছ। তার রচনাত তার প্রেম, দরদ বারো কোমল অনু-
ভূতির স্পষ্ট নিদর্শন পেয়ার। তারাতো পারেও কতোহানি—
(১) মাহুর ডেকি হাতগো নাগয় আকগো সিচিল পাছু।
ছনার ঠইগো বুলিয়া ঘরে কলকরিয়া থছু ॥

(২) মোরকা বুলিয়া তি যেসাদে দিনে রাতিয়ে কাছুরী।

মিও উসাদে তোরকা বুলিয়া কাদিয়া পার না পাউরি ॥

গোপীনাথ সিংহর ‘কনাক মেঠেল’-এ শৌর ছড়া পেয়ার, বারো
‘নিঃশিং আরতি’-ত পেয়ার তার কল্পনার প্রেমাস্পদর প্রতি
তার অকুণ্ঠ প্রেম, প্রেমপাত্রর প্রবঞ্চনা সত্ত্বেও তার অকৃত্রিম
প্রেম বারো খোঁরাও, বিরহবিধুর চিত্তলো আনন্দভরা—প্রেম-

ভরা পৃথিবীর আশ্বাদন, দূরেইর প্রেমাস্পদর কারণে ছঃখ-জ্বালার
অনুভূতিলো হোঁপারে—এপারে যোগসূত্র স্থাপনর ব্যাকুলতা।
তারাতো পারেও কতোহানি—

(১) আলিপাছং—আলিপেয়া থাক—

বানাপাছ—বানাপেয়া থাক।

(২) ছালি অয়া মাঙইলেউ খোঁরাঙ বুকে থাক।

.....

তোর ঠুমে

মোর হাবিতার ঠুম থাক।

শশীকুমার সিংহর লেখাত দেখিয়ার ছঃখর মাধ্যমে
পৃথিবীয়ে বারো জীবনরে চিনানির মানসিক দৃঢ়তা। এ জগতর
সঙ্কীর্ণতা মলিনতার উর্ধ্বতর স্তরর নির্মল রাজ্যত—জাগতিক
হিংসা, নিন্দা, মানুর মানুর বৈরভাব, অহঙ্কার এতা হাবিত্ত যুক্ত
মহামিলনর সমাজ আহানাত বাস করানিত তা ইচ্ছুক।
উতা ছাড়া তারাত আমি দেখিয়ার কর্মবাদে প্রবল বিশ্বাস বারো
সমাজর নৈতিক অবনতি বারো দারিদ্র্যর বিরুদ্ধে তার কটাক্ষ।
মেরাকে তার অটুট প্রেম বারো বাস্তবর লগে সংগ্রামর নিদর্শন
পেয়ার। তার পারেও আহানি—

(১) চরম ছঃখর মাঝে মি আকথুরুম এ পৃথিবীর
অন্তর মহান্তরর লগে পরিচিত অয়া তানুর গোপন কথা
পৃথিবীর বুকেই আকদিন ফাকরিয়া যানা মনাউরি।

(২) নিকটক জগৎ আহানর সন্নাটগো মি,

মোর আধিপত্যর মাঝে ছুপকরে ধূলি নেই।

গিরকর মনর এ প্রচণ্ড দৃঢ়তা এহান অন্যান্য কবিরাত নাপেয়ার
বুলেউ যাকরের।

চন্দ্রকান্ত সিংহর লেখাত দেখিয়ার উদাসীন প্রেমিকার প্রতি
তার অকৃত্রিম প্রেম, নিজর শক্তির সীমিত অবস্থার স্বীকৃতি,

নির্জনমনে প্রিয়জনর কণ্ঠালা স্মৃতির গভীর অনুভূতি, আধুনিক
কৃত্রিম সুখস্বাচ্ছন্দ্যর প্রতি কটাক্ষ বারো জিন্তা অয়া থানার মধুর
অনুভূতি ইত্যাদি । তার পারেও কতোহান—

(১) তোর পথেদে তি ।

মি তোর দূরেইত দেহা সাদ উহান বিছারেয়া মরুরি ।

(২) কিন্তু মি দেহুরি, মোর অলঙ্কার

হবা অলঙ্কার নাগয়,

মোর মূর্তি উতার অবয়ব চু' নাহে ।

বরুণ কুমার সিংহর লেখা নিতান্তই কম । তার দক্ষতা থানা
সত্ত্বেও তা উহানর যথাযথ ব্যবহার করে হুরারলো উহান মিয়াম
ছঃখর বিষয়হান ।

কালাসেনা সিংহর কাব্য ছ'হান—‘মঞ্জুরি’ বারো ‘অচিন্
পাহিয়া’ । তার লেখাত পেয়ারতায় তার আশাবাদ, অতীত-
বর্তমানর ছঃখ পাহুরিয়া ভবিষ্যতর আশালো হারো অনার,
বারো হাবি বাধা অতিক্রম করিয়া আগ বাড়ানির সংকল্প ।
প্রাকৃতিক সৌন্দর্য্য বর্ণনাতো কালাসেনা সিংহর দক্ষতা দেখিয়ার ।
তার ‘ফুলর বনে’ কবিতায় এহানর নিদর্শন দেব ।

কনাক-পারেঙর সমরজিৎ সিংহর লেখাত পেয়ার—মানুর
ভিত্তিহীন-মহুষাত্মহীন জীবন দেহিয়া তার মর্মব্যথা, বারো গতানু-
গতিক জীবনধারারে অতিক্রম করিয়া যানার প্রবল আকাঙ্ক্ষা ।

তরুণ কবি বিমল সিংহর ‘অপরাজিতা’ কাব্য
বিশেষভাবে উল্লেখযোগ্য । এ গিরকর লেখাত দেখিয়ারতা
—প্রবল বাধারে পরাজয় করিয়া বীরবিক্রমে মুড়েদে আগুরা-
নির প্রবল আকাঙ্ক্ষা, অতীতর পরাজয় পাহুরিয়া আশার
দৃষ্টিলো ভবিষ্যতরে চানা, প্রেমর বন্ধনরে গোঁণ করিয়া জীবনর
অগ্রগতির পথে কাকেই দেনার দৃঢ়তা । এ তরুণ কবি এগোর
ভিতরে যে দৃঢ়তা বারো শব্দ-যোজনার পরিপক্বতা ফুটিয়া

উঠেছে, এহানাত তার উজ্জল ভবিষ্যৎ আহানর সম্ভাবনা দেখিয়ার।

শ্যামানন্দ সিংহর সামর্থ্য থানা সত্ত্বেও তারাত্তো মিয়াম লেখা নাপাছি। তবে তার করপেখ আকারে আছে ছড়া উতা মিয়াম উপভোগ্য, উহানাত সন্দেহ নেই। এ ছড়াত তার বন্দোজ্ঞানর যথেষ্ট প্রমাণ পেয়ার। তারাত্তো পারেও আহান—

(.) হুনতে হুনতে কীর্তসিঙে তেরাদেহে চেইল।

গিদেইনুরে লৌদিরীতা মেইল মোরে মেইল ॥

(১) হুনো হুনো হুনাগাছি হৌনাবিহান থই।

এরৌ তেরৌ নাকরিয়া লেরিক চানাত বই ॥

এতার বাহিরে আমি উল্লেখ করে পারিয়ারতায়—মথুরা সিংহ, ‘ভূত-ভবিষ্যতর লেহা’-র লেখক চন্দ্রমোহন রাজকুমার, বিমল কুমার সিংহ, ‘মধুমালতী’র লেখক কালু সিংহ, ‘মেইরিক’র লেখক হরেকৃষ্ণ মুখোপাধ্যায়, শ্রীবাস, অমর সিংহ, ‘সুরর মিঙাল’-র লেখক নীলমাধব মুখার্জি—ইত্যাদির নাঙ। কালী-প্রসাদ সিংহর ‘এলার মালা’ বুলিয়া গীতি-কবিতার গ্রন্থ আহান আছে। উহান সম্বন্ধে মি কিতাউ নামাতিঙ; কারণ-হান হাবিয়েউ হারপেয়ার।

কবিতার কথা নাতে পদাবলীর কথা পাহুরে হুরারিয়ার। বিশেষ করিয়া আমার সমাজে পদাবলীর গুরুত্ব অনেক মিয়াম; কারণ, আমারতা যে কোনো ধর্মীয় বা সামাজিক অনুষ্ঠান পদাবলী-কীর্তনর মাধ্যমে অর। কিন্তু আমার পদাবলী-সাহিত্যর যথাযথ বিকাশ এবাকাউ নাছে। প্রাণ ভরিয়া আহ্বান করানির মতো পদাবলী এবাকাউ আমার ভাষাত না নিঙলেছে বুললেই যাকরের। গোষ্ঠবিহারী সিংহ, সেনাক্রপ সিংহ, নরসিংপুরর চানমণি সিংহ বারো সিংহার

ব্রজকুমার সিংহ —এ গিরক এগির পদাবলীত পরিপক্বতা
আহানি আছে, কিন্তু পরিপূর্ণ পক্বতা এবাকাউ নাহেছে ।
প্রসঙ্গক্রমে হারৌর কথা আহান মাতানি মনাউরি যে নরসিংহ-
পুরর অধিনীকুমার সিংহ বারো চানমণি সিংহ গিরকর
যৌথ প্রচেষ্টালো রাসলীলাহান রচিত আছে এবং ঔমতে রাস-
লীলার অনুষ্ঠানো আছে ।

কবির প্রশস্তি লমকরানির আগে চন্দ্রকান্ত সিংহ গিরকর
সংকলিত 'মালিনী'—নাঙর কাব্য-গ্রন্থ উহানর ভূয়সী প্রশংসা
না করিয়া গুরারুরি । এ সংকলন এহানাত গিরকে নিরপেক্ষ
দৃষ্টিলো হাবি উল্লেখযোগ্য কবির কবিতা সংগ্রহ করেছে ।
এ সংকলন এহান আমার কাব্য জগতে দৃঢ় পদক্ষেপ আহান এবং
অতুলনীয় দানহান যেহানে আমার কাব্যরে অনেক গজর স্তরে
কাকরে দিলো । এ প্রচেষ্টা এহানরকা তারে অকুণ্ঠচিত্তে
ধন্যবাদ জানাউরি । আরতাউ বৃহত্তর আকারে এসাদে সংকলন
আহান নিকললে আমার কাব্যরে জগতর মুণ্ডে তুলিয়া ধরানি
সহজ অইতই ।

এবারে ভবিষ্যতর কথা । ভবিষ্যৎ এহানর সৃষ্টি অরতা
বর্তমানেন্ড । স্মৃতরাং বর্তমান অবস্থার আলোচনা করলেই
ভবিষ্যৎহান সম্পর্কে হারপেইতাঙাই । আগে দীঘলগো বরেতে
আমার সাহিত্যর বর্ণনা দিয়া গেলাংগা, কিন্তু আসলে হাবি রচনা
পুলকরলে আতর মুঠিহানর ভিতরে চলইতই—অতি নিলজ্জর
সাদে এহান আমি মান্ডে বাধ্য অইলাঙ । কিন্তু তথাপি সমাজে
চৈতন্য নাহের—গীতিস্বামী গিরকর ভাষাত—“বারা বুলিয়া
বুলিয়া হাবিয়ে থাইলাঙ ঘুমজিয়া” । বিশ্বজগতর মানু কুস্পেয়
কাইলাগা, এমন কি যেতারে আমি 'পাহাড়িয়া' বুলিয়া তুচ্ছ-
ভাঙিল্য করিয়ার, তাহুর আতর পানি না পিয়ার, ও নাগা
লুসেই-খাসিয়া কুস্পেয় কাইলাগা, আমি কুস্পেয় অন্ধকূপে পড়িয়া

আছি —এতা খালকরিয়া আগোয় অলিয়া পুড়িয়াউ না মরতার।
ফলে সামাজিক যে কোনো উন্নয়নমূলক কামর সাদে সাহিত্য
সৃষ্টিকারী যে যে অবস্থার বা পরিবেশের দরকার, উতার বারাদে
আমি দৃষ্টি আহানো নাদিয়ার।

(১) পইলাকার আমার ব্যাখ্যান—আমি গুণর শ্রদ্ধা না
জানি। আমার শ্রেষ্ঠ কামরান অইলতায়—ইমে সুপ কিতাউ না
করানি; কিতাপারা করানি অইলেউ ভাগুরা কাম করানি।
কুনো আগোয় হবা কাম আহানি করলে তারে স্বীকৃতি দেনাতে
গুপো না, বরং তারে দাবেয়া সমাজর মুণ্ডে তারে হীনপ্রতিপন্ন
করানি উহানেই আমার সমাজসেবার উদ্দেশ্যহান। জাত
এহানর এ প্রচণ্ড অজ্ঞতা বারো বিবেকহীনতার দরুণ গীতিস্বামী
গিরকর জীবনে কতোবার আহির পানি আহেছিল, কতোবার
তারে সত্যত অপমান করেছি, কতোবার কীর্তনর হাদিত তারে
এলাদেনা বন্ধ করেছি—উতার যারি হারপাকুরা গিরিগিথানিয়ে
জানি। এবাকা পেয়াউ ঐ গিরক উগোর স্মৃতিরক্ষারকা বা
তারে যথাযথ সম্মান দেহানিরকা আমি কিতা করেছি? গুরু
বিপিন সিংহর সাদে প্রচণ্ড প্রতিভাবান গিরক আগো—যেগোয়
মণিপুরী নৃত্যত বিপ্লব আহান আনেদেছে—ঐ গিরক উগোরে
আমি বিন্দু আহান সম্মান নাদেছি, তার অভিনব নৃত্যভঙ্গির বিন্দু
আহান আমি না হিকেছি—অনুসরণ নাকরেছি। যেতাউ অক,
সাহিত্যর কথা মাতিয়ার হানতে সাহিত্যর কথাতেই আহিক :
বর্তমানর সাহিত্য জগতে যে যে গুণী গিরিগিথানি আছি, আমার
নাওপালপা সমাজ-সেবী গিরিগিথানিয়ে কুনোদিন কুনো লেখাত
বা কুনো ভাষণে তাহুরে স্বীকৃতি দিতে বা শ্রদ্ধা জানেইতে না দেখ-
লাও। এসাদে অনাদৃত গিরিগিথানি কতোগোরে আজি হাবির
মুণ্ডে তুলিয়া ধরিয়া তাহুরে মোর শ্রদ্ধা জানানি মনাউরি :

(ক) গোলাপসেনা বুলিয়া মাতলু গিরক উগো হঠাৎ সিদ্ধারেই

ফুলগোর সাদে শাতরা জড়িয়া পড়েছেগো। গিরক উগো লেই-
রিক মিয়াম তামকরেছেগো নাগয়; ইমে টোলে সংকৃত খানি তাম-
করেছেগো। আমি কনাক অইতে গিরক উগোর নাটকর অভিনয়
আমি প্রাণ ভরিয়া উপভোগ করলাও, বারো কীর্তনে বিষ্ণুপ্রিয়া
মণিপুরী ভাষালো এলা দিতে হনলাও। গিরক উগো মূলে
শিলচরর চেংকুড়িত জরম অছিলগো, বর্তমানে পারিবারিক
বিপর্যায়র দরুণ এপেয় তিনগড়িত আছেহা। ঐ গিরকর প্রতিভা
বারো সমাজচেতনা মি শ্রদ্ধা সহকারে স্মরণ করি।

(খ) নরসিংপুরর নাট্যকার তথ্বিনীকুমার সিংহ গিরক উগো
লেইরিক মিয়াম তামকরেছেগো নাগয়, অথচ তার নাটকে তার
রুচিবোধ, ভাষার পরিপকতা অলঙ্কর করে দেহিয়ার। গিরক
উগোরেউ মোর শ্রদ্ধা জানাউরি।

(গ) উত্তার পিছে এপেয়র বাসকানটিলার সুধদ্বা গিরকর কথা।
ঐ গিরকর ফাগিরাম-নাট্য মালা সময় আহানাত সমাজ এহানরে
বিরাট আনন্দ যোগাছিল। কিন্তু সমাজে তারে স্বীকৃতি নাদা-
নিয়ে, বারো আর্থিক সহায়তা নাপানিয়ে গিরক উগো হাবিতা
বাদ দিয়া বয়া আছে। অবশ্যই, অজা বাবাইসেনা প্রকাশনীয়ে
গিরক উগোর নাট্যমালা প্রকাশ করানির সিদ্ধান্ত নেহিগা, কিন্তু
গিরকর কোনো মতামত না পাছি।

(ঘ) আরাক আগো অইলতায় মোর বন্ধু সদৃশ তিনোখালর
বীরেন্দ্রকুমার সিংহ। ঐ তাখাপাগালা গিরক উগোরাও বিভিন্ন
গুণর সমাবেশ দেহিয়ার। ঐ গিরকে আধুনিক এলা লে'করের,
এলাদেনা পারের; পদাবলী ইকরের, কীর্তন দেনা পারের; নাটক
ইকরের, অভিনয় করে পারের; কবিতা ইকরের, কবিতা ইকরা-
নির হাদিত শোঁঅয়া চিয়ার ভাগানিও পারের। ঐ গিরক
উগোরেউ মোর শ্রদ্ধা জানাউরি।

এতা ছাড়া কনাক-পারেঙর ভিতরে যে যে শৌর প্রতিভা

আছে, উত্তারেউ আমি স্বীকৃতি নাদিয়ার। এ প্রসঙ্গত 'অপরা-
জিতা'-র লেখক বিমল সিংহের স্মরণ করুরি। এ গিরিগিথানি
এতারে আমি কুনোদিন শ্রদ্ধা না দেহরাছি। মদনমোহন
মুখোপাধ্যায়, ব্রজেন্দ্রকুমার সিংহ, ইন্দ্র কুমার সিংহ ইত্যাদি
গিরক গাছিয়ে স্বীকৃতি পাছিতাউ নিজর চেষ্ঠালো; সমাজে
আগুরেয়া কুনোদিন তাহুরে শ্রদ্ধা না জানাছি। আমার সমাজর
এ শ্রদ্ধা বা গুণদর্শিতার অসম্ভব দারিদ্র্য এহান সাহিত্য-সৃষ্টির
বিরাট প্রতিবন্ধকহান।

(১) দ্বিতীয়তঃ, সাহিত্য আনারাও অর্থকরী নাগয়। লেইরিক
আহান ছাপেইলে লকুরা নেই, অথবা লকুরা থাইলেউ ও
লেইরিক উত্তা না লুটানিরকা শিক্ষিত দল আহান পিঠিত
লাগতারা। সমাজর আর্থিক দুর্বস্থা উহান অবশ্যই এহানর
কারণ আহান, কিন্তু আসল কারণহান অইলতায় ভাষা-সাহিত্যর
প্রতি দরদর অভাব। মাসে দুই-আড়াই হাজার রূপা রোজ-
গার করে কলেজর অধ্যাপক আগোয় রূপা-পইছার অসুবিধা
দেহেয়া রূপা-আহান-দামর লেইরিকহান না লনি উহানরে
আমি আর্থিক দুর্বস্থা বলে হুরারিয়ার; উহান মানসিক
দুর্বস্থাহান। অজা বাবাইসেনা প্রকাশনীর কাধ্যসঞ্চালক
শ্যামানন্দ সিংহ গিরকর ভাষালো—“লেইরিক বেছানিত পুরি
ভিক্ষা মাগানিতেই ইজ্জত আছে।” নাট্যকার গিরিগিথানির
সমস্যাহানো এহান। নাটক অভিনয় করিয়া রোজগার করা-
নিতে দূরেইর কথা, বরং নিজর গাঠির রূপা হুদালা করানি
লাগের। একমাত্র আমার সমাজচেতনার অভাব—মাতৃভাষার
প্রতি শ্রদ্ধার অভাবেই এহানর কারণহান।

(৩) তৃতীয়তঃ, সাহিত্য-পত্রিকার নিদারণ অভাব এহান আমার
মিয়ান দুঃখর কথাহান। সাহিত্য-পত্রিকার মাধ্যমেই আমার
সাহিত্যিকর—বিশেষ করিয়া কনাক-সাহিত্যিকর—প্রতিভার

পরিচয় পোৱাৰ । আগে যে যে সাহিত্যিক নিকুলেছি, উতাৰ অনেক-
গোৰ পৰিচয় পাহিতা 'ফাগু', 'প্ৰতিশ্ৰুতি' ইত্যাদি পত্ৰিকাৰ
মাধ্যমে । কিন্তু যথার্থ বাৰো বলিষ্ঠ পত্ৰিকা আহান নেয়োনিয়ো
আমাৰ সাহিত্যৰ যথায়থ বিকাশ নার । মহাসভাৰ বাৰো সাহিত্য
পৰিষদৰ দীৰ্ঘদিনৰ ইতিহাসে এবাৰো পেয়া পত্ৰিকা আহানৰ
সাত না দেখলাও - এহান মিথাম দুখৰ কথাহান । অন্য ব্যক্তি
বা সংস্থাৰ তৰফেভো এসাদে প্ৰচেষ্টা আহান না দেখলাও ;
বা যে দু'হান আহান নিকুলিল উতাউ আৰ্থিক অভাবে মাড়ো
গেলগা । আমি ভাষাৰকা চা'ৰিয় বাৰো ফাটানি মনেয়াৰ, কিন্তু
মাহুৰে ছেহানিৰ মতো সাহিত্য-পত্ৰিকা আহান নেই - এতা খাল
ক'ৰিয়া নিৰ্ভজ্জ জাত এখানে শুপ বিন্দু আহানো লাজ নাপেয়াৰ ।
(৪) চতুৰ্থতঃ, সাহিত্য-সংমেলনৰ গুৰুত্ব সম্বন্ধে আমি নিতান্ত
অন্তৰ্ভ । অসম সাহিত্য সভাৰ বাৰ্ষিক সংমেলন আকেইহান
দেখলে এজাত এহানৰ কথা খাল কৰলাংকো পুৰি জলিয়া
পুড়িয়া মরানি আহেৰ । সংমেলন আকেইহানাত গিরকগাভিয়ে
খৰচ কৰতারা তাৰূপা তিন-চাৰি লাখ, মাহু পুলইতারা তা
ত্ৰিশ-চল্লিশ হাজাৰ । আমাৰ তাতে প্ৰতি ক্ষেত্ৰত দেখিয়াৰ -
সাহিত্য-সংমেলন আহানৰ ঠৌৰাও কৰানিয়ে গিরিগিথানি
আকতায় জলিয়া পুড়িয়া মরতারা, মাহুৰে সংমেলনৰ
উদ্দেশ্যো রূপা দেনা বাৰো সংমেলনে যোগ দেনাত
বিরত কৰানিৰকা বুমতুম বেজতারা । নিসকে নাইলে সংমেলনৰ
ফামে রাতি আধাৰে থায়া তিল উড়ানি, বিজ্ঞাতৰ তাৰ কাপে
দেনা - এতা বিক্ষুপ্ৰিয়াৰ কাম । আজি বিংশ শতাব্দীৰ শেষ
ভাগে আয়া মাহু কতোগোয় তিলয়া সাহিত্য আলোচনা কৰানি
এহান জাতৰ ক্ষতিজনকহান বুলতারা জাত এহানৰ চিন্তাৰ মানৰ
সীমাথীন নীচতা উহান ভাষালো প্ৰকাশ কৰে হুৱাৰিয়াৰ ।
এসাদে সংমেলনৰ মাধ্যমে আমি পৰস্পৰ ভাৱৰ আদান প্ৰদান

করিয়ে, বারো কনাক ছাত্র-ছাত্রীয়ে আত্মবিকাশ করে পারতারা
 মি চাউরিতা - প্রতি বছর এসাদে সম্মেলন আরতাউ বিরাট
 আকারে অক - ঘরে ঘরে আমার এলা-কবিতা ফৌ-অকগা,
 শৌরে খেলতে আমার ভাষালো ছড়া দেকা, ইমা-ইন্দোলে রুরা
 রুরেইতে আমার ভাষার এলা দেকা - এতা হাবি অইন্তইন্ত
 সাহিত্য-সম্মেলনর মাধ্যমে ।

সাহিত্য সৃষ্টির অভাবরকা হুদা সমাজরে দোষ দিলেউ
 নার ; লেখক গিরক গাছির নিজর দোষো আছে ।

প্রথমতঃ, আমার লেখক গোষ্ঠীর জিজ্ঞাসার মিয়াম অভাব ।
 সাহিত্য সৃষ্টিরকা জ্ঞানার্জনর দরকার । বিশ্ব জগতর অন্যান্য
 সাহিত্য, ইতিহাস, কুষ্টি, ধ্যান-ধারণা এতা হাবির লগে পরিচিত
 নাইলে কুনোগোয় উন্নত ধরণর সাহিত্যিক অনা হুরারতারা ।
 অথচ আমার সাহিত্যিক গিরক গাছির অধিকাংশর ভিতরেই এ
 জিজ্ঞাসার অভাব । যেহানি স্কুল-কলেজে তামকরেছি, উহা-
 নিলোই তালু পরিতৃপ্ত ; বিশ্ব জগতরে চিনানিরকা - জ্ঞানানিরকা
 তালুর কুনো জিজ্ঞাসা নেই । আমার কবি এতার ভিতরে দুগো-
 আগো ছাড়া অনা কুনোগোরতাউ চন্দ্রজ্ঞান নেই । ঐ জ্ঞান
 উহানি অর্জন করানি উহানি অমাটিক ডাঙর কামহান নাগয়,
 কিন্তু কুনোগোয় উহানি অর্জন করানিরকা সচেটে নাইতারা ।

দ্বিতীয়তঃ আমার লেখকর ভিতরে নির্ণায়ক অর্থায় কাব্য-
 সুন্দরীর প্রতি প্রীতির নিতান্ত অভাব । সমাজে অনেক প্রতিভা-
 বান লেখক হুদা নির্ণায়ক অভাবে তালুর কাব্য জীবন জলাঞ্জলি
 দিয়া বহিয়া আছি । মদনমোহন মুখোপাধ্যায় গিরকে তার
 প্রতিভার যথাযথ ব্যবহার করলে আমি তারাংতো অনেক সম্পদ
 পেইলাউ অইছ । বরুণকুমার সিংহ গিরকরতাউ কবিতা এবং সমা-
 লোচনা-সাহিত্য লেখানিত দক্ষতা আছে, কিন্তু গিরকে উহানর
 সদ্ব্যবহার নাকরলো । অনেকে মাত্তারা যে আর্থিক বা

পারিবারিক ছরবছা খাইলে কাব্য চর্চা সম্ভব নার । কিন্তু মোর
কথাহান—আর্থিক বা পারিবারিক ছরবছা দেহেয়া কুনোগোয়
নিজর গৃহিণীরে বা জিপুতরে বানা নাপাছি বুলিয়া দৃষ্টান্ত নেই ।
সাহিত্যিক গিরক গাছিয়ে কাবালক্ষীরে বানা পেইলে নিজর দুঃখর
কথা ঔ গিথানকরাও মাতলা অইছ ।

তৃতীয়তঃ লেখক গিরক গাছির শব্দ, অর্থ বারো রস-
সম্পর্কে যথাযথ ধারণার অভাব । শব্দর অভিধা, লক্ষণা, ব্যঞ্জনা
এ তিনো ধরণর অর্থ হারপানি লাগের এবং কিসাদে রসহান
ফুটানিরকা কিসাদে শব্দর প্রয়োজন, উহানো হারপানি লাগের ।
হাবি ধরণর শব্দলো হাবি ভাব বা রস ফুটানি সম্ভব নার ।
অন্তরগোত যে রসর অভিবাক্তি অর, ঔ রসর উপযোগী শব্দ
ব্যবহার করে পারের উগোহে যথার্থ সাহিত্যিকগো, কবিগো ।
আমার লেখক বারো পাঠক গোষ্ঠীর ভিতরে কথা আহান
বরাবর ছনে আয়ার—উনি আমার আদত শব্দলো সাহিত্য
করানি, বারো বাংলা শব্দ না বরানি । এ সম্বন্ধে মি অনেক
মাতেছ ; অনেক প্রবন্ধ ইকরেছ ; উহানে মিয়াম মাতানি আটেল
পাউরি । সংক্ষেপে ইমে এহানি মাতিঙ : প্রথমতঃ, গিরি-
গিথানিয়ে যেতারে আমার আদত শব্দ বুলতারি, উতার ৬০%
ভাগ আমার শব্দ নাগয় ; মেইতেই শব্দ । বারো যেতারে
বাংলা শব্দ বুলতারি, উতার ৯০% বাংলা নাগয় ;
সংস্কৃত । আধুনিক যে কুনো ভারতীয় ভাষার সাহিত্য
সম্বন্ধ অরতা সংস্কৃত শব্দভাণ্ডারলো । ঔ সংস্কৃত
শব্দ বাদ দিয়া সাহিত্য করানির কল্পনা উহান পাগলামিহান ছাড়া
কিন্তুউ নাগয় । দ্বিতীয়তঃ, সাহিত্যর বিচার অরতা রসলো ।
রসর অভিবাক্তিরকা সাহিত্যিকে যেপেয়তো শব্দ আনকগা ;
উহানাত তার স্বাধীনতা আছে । বারো এহান যে কুনো রসজ্ঞ

মাগুরেউ স্বীকার করতায় যে হাস্যরস, সমাজচিত্রণ ইত্যাদি ;
 বিষ্ণুপ্রিয়া মণিপুরী শব্দর প্রচণ্ড সামর্থ্য থাইলেউ বীররস,
 প্রেমরস, দার্শনিকভাব ইত্যাদি প্রকাশরকা সংস্কৃত শব্দ নাইলে
 নার । 'বিরাট'-শব্দর বিরাটত্ব উহার 'ডাঙর'-শব্দর নাদের, আকাশ-
 শব্দর অসীমত্ব উহান 'হাগ'-শব্দর নাদের, 'বীর'-শব্দর বীরত্ব
 উহান 'বলী'-শব্দর নাদের । দৌ-অর কামে পানিরে 'জল'-বুলিয়ার,
 গুরারে 'তান্বুল' বুলিয়ার, ভাতরে 'অন্ন' বুলিয়ার উহান হাবিয়েউ
 জানি । এ ভেদ এহান অরতা রসভেদে, পরিবেশভেদে । শব্দর
 লগে রস বা পরিবেশর এ সম্বন্ধ এহান হার না পেইলে
 সাহিত্যিক অনা সম্ভব নেই ।

আমার সাহিত্যর ছরবস্তার কথা আলোচনা করতে
 পদাবলীর কথা না মাতিয়া ফুরারিয়ার । আমার পদাবলীর
 মানহান এবাকাউ অনেক নীচে আছে । এহানর কারণহানি
 অইলতায় : প্রথমতঃ, আমার লেখক গিরকগাছির রসবোধর
 অভাব—এ সম্বন্ধে আগেই আলোচনা করলাও । দ্বিতীয়তঃ, রাধা-
 কৃষ্ণ-প্রেমর মাধুর্য্য বারো গান্ধীর্ঘ্যর বিষয়ে জ্ঞানর অভাব ।
 রাধাকৃষ্ণর প্রেম উহান দিব্যালোকর—আত্মার-আত্মার প্রেমহান,
 উহানোত দৈহিক কোনো সম্বন্ধ বা পিপাসা নেই । ঐ প্রেম উহান
 পবিত্রভৌ পবিত্রতরহান—“সেই প্রেম নুলোকে না হয় ।” অথচ
 আমার পদাবলী লেখকে ঐ প্রেম উহানরে এমন পর্যায়ত
 নিয়া বেলাছিগা যে মনে অরতা—রাধা বারো গোপী এতা
 আধুনিক নিঙোলে চলচ্চিত্র চানার কাজে সাজ বাজ করিয়া
 যিতারাগা উসাদে স্ফূর্তি করাত যিতারাগাতা, বারো কৃষ্ণ এগো
 চরিত্রহীন যুবক আগো, পথে রাধা বা গোপীরে নির্জনে
 পেয়া 'ফাত্মা' করেবতা । রাধাকৃষ্ণর দিবা প্রেম উহান সম্বন্ধে
 ধারণা না থানিয়ে উহানরে এসাদে বিকৃত করে দেহরেইতারাতা ।
 পদাবলী লিখতে গেলগা রাধাকৃষ্ণপ্রেমর মাধুর্য্য উহান হারপানি

—হৃদা হারপানি নাগয় ; নিজর জীবনে অনুভব করানি লাগের ।
নাইলে যথার্থ পদাবলীর সৃষ্টি কুনোদিন নাইতই ।

আমার সাহিত্যজগতে আরাক অভাব আহানর কথা না
মাতিয়া নার । উহান অইলতায় আমার সমাজে মহিলা-সাহিত্য-
কর অভাব । অনেক আগে গীতারাণী সিংহ, মনোরমা
সিংহ, গীতা মুখার্জি, কুঞ্জরাণী সিংহ—এসাদে কতোগোর
বিক্ৰিণ্ড রচনা খামি পাছিলাও । এবাকা উতাউ নেই,
• হুরা লেখিকাউ না নিকুলতার । এহান অত্যন্ত ছুঃখর
বিষয়হান । নিঙোলপী আগ না বাড়লে জাতর অগ্রগতি সম্ভব
নেই । উহানলো হুরা নিকুলে আহিতারা নিঙোলপীর প্রতি
অনুরোধহান —‘তুমি আগ বাড়িয়া আহো, আমার সমাজহানরে
ডাল করো’ । ‘সোভিয়েৎ দেশে মি’-র লেখিকা কুঙ্কুম সিংহর
পরিপক্ব আভেত্তো আমি আশানুরূপ লেখা নাপেয়ার ; উহান
ছুঃখর বিষয়হান । গিথানক উগোর প্রতিও মোর অনুরোধহান
থাইল, তেই যেন আমার সাহিত্যরে আরতাউ ডালকরেদিরী ।

যেতাউ অক, আমার সাহিত্যর ভবিষ্যৎ সম্পর্কে মাতাত
যিতেগা এতা হাবি কথা আহিলতা । আমার এ দোষ ত্রুটি
এতার সংশোধন না করলে অদূরে আমার উন্নত সাহিত্য গড়িয়া
তুলানির আশা বৃথা । আমার এবাকার কামহান —সাহিত্য
পরিষদরে শক্তিশালী করানি, সাহিত্য প্রকাশ করানি, সাহিত্য
পত্রিকা নিকালানি বারো সাহিত্য-সম্মেলনর মাধ্যমে সাহিত্য
বারো সাহিত্যিকর বিকাশর অনুকূল পরিবেশ সৃষ্টি করানি ।
লমইতেগা গীতিস্বামী গিরকর মর্মভেদী সুরে সুর মিলেয়া মাতিও
"কার কাজে কাছুরিতা আকগরো হার নাপেইলা ।

হবার কাজে মাতেগাতে আরাক আহান নিঙকরলা ।"
হাবিরে পুনঃ শ্রদ্ধা জানেয়া এপেয় মোর বক্তব্যহান লমকরিও ।

বিষ্ণুপ্রিয়া মণিপুরী শব্দ ভাণ্ডার

কুনো ভাষা আহানর শব্দ ভাণ্ডার লেপকরানিরকা পইলা দরকার অরতা অভিধান আহানর । কিন্তু এবাকা পেয়াও বিষ্ণুপ্রিয়া মণিপুরী ভাষার কুনো অভিধান প্রকাশিত নাছে । তবে মি বিষ্ণুপ্রিয়া মণিপুরীর প্রায় ত্রিশ হাজার শব্দ সংগ্রহ করিয়া অভিধান আহান সংকলন করেছু । উহান ১৯৮২ ইং-রাজীয় ভিতরে প্রকাশিত অবার কথা । ঐ অভিধানউহানর উপাদান উতালো আজি বিষ্ণুপ্রিয়া মণিপুরী শব্দ ভাণ্ডার সম্বন্ধে কথা খানি মতিঙ ।

মি সংগ্রহ করেছু ত্রিশ হাজার শব্দ উতার ভিতরে খাটি সংস্কৃত শব্দ অছেতায় দশ হাজারর চুরা, সংস্কৃতত উৎপন্ন অর্থৎ তদ্ভব শব্দ অছেতা প্রায় দশ হাজার । এ তদ্ভব শব্দর ভিতরে প্রায় আট হাজার শব্দ বাংলা, অসমীয়া হিন্দি, নেপালী, ওড়িয়া ইত্যাদি ভাষার লগে মিল, বাকী দুই হাজার তদ্ভব শব্দ বিষ্ণুপ্রিয়া মণিপুরীর নিজস্ব । সংস্কৃতর পিছে বিষ্ণুপ্রিয়া মণিপুরীর দ্বিতীয় প্রধান উৎসগো অইলতার মেইতেই; এ মেইতেই ভাষাত আমি পাছিতা প্রায় চারি হাজার শব্দ । উতার ভিতরে তিন হাজারর চুরা মেইতেইর লগে সম্পূর্ণ মিল, বাকী এক হাজার শব্দ উতা বিষ্ণুপ্রিয়া মণি-পুরীয়ে নুৰা করে হংকরেছিতা । তৃতীয় প্রধান উৎসগো অইলতার আরবী পারশী, যেপেরঙ আমি প্রায় দুই হাজার শব্দ নোছিগা । এতার বাহিরে খন্যাক, মিশ্র, সন্দিগ্ধ, ইংরাজী ইত্যাদি শব্দ প্রায় চারি হাজার আছে ।

এ ত্রিশ হাজার শব্দর ভিতরে অন্যান্যভাষার লগে পুরাপুরি মিল বা উচ্চারণর বৈশিষ্টর দরুণ যৎসামান্য পরিবর্তিত শব্দ উতা বাদ দিলে বিষ্ণু-প্রিয়া মণিপুরীর নিজস্ব বিশিষ্ট শব্দ অরতায় প্রায় পাচ হাজার । নিজস্ব বিশিষ্ট শব্দ বুলিয়া মাতলাঙ কথা এহানর অর্থহান মিয়াম অস্পষ্ট, কিন্তু শ্রোতৃমণ্ডলীর সুবিধারকা এ শব্দ এহানর আকৃষ্টা বিচারে না গেলাংগা ।

* ১৯৮০ ইংরাজীত সিঙ্গারীত, বিম সাহিত্য পরিষদর পক্ষত অনুষ্ঠিত
অছিল বিম সাহিত্য-সংস্কৃতি সম্মেলনে প্রদত্ত ভাষণ । *

সংক্ষেপে মাতে পারিয়ার যে, যে শব্দ বিষ্ণুপ্রিয়া মণিপুরীয়ে নিজে হ-
করিয়া ব্যবহার করতারা উক্ত ভাষার নিজস্ব বিশিষ্ট শব্দ। নিজস্ব
বিশিষ্ট শব্দ এ কথার অর্থ হান এহান নাগয় যে শব্দ এতা আমি নিজে শুণাত
নিকালছিতা। এ নিজস্ব শব্দ এতার অধিকাংশই আমি অন্যান্য ভাষাত
আনিয়া নিজে নুৰা রূপে হংকরেছিতা। যেমন, আগে মাতলাঙ সংস্কৃত-
জাত শব্দর ভিতরে প্রায় দুই হাজার শব্দ আমি নিজে রূপ দেহিতা, বারো
মেইতেইজাত শব্দর ভিতরেও প্রায় এক হাজার শব্দ আমি রূপ দেহিতা।
অবশ্যই ধন্যাত্মক বারো দেশী শব্দ প্রায় এক হাজার এবং সম্বন্ধ বা ব্যাখ্যা
করে নুৰারেছি প্রায় এক হাজার শব্দও বিষ্ণুপ্রিয়া মণিপুরীর নিজস্বতা
আছে। এমাদে করিয়া অন্য ভাষাত মা বা অবাভাবে হংকরা বিষ্ণুপ্রিয়া
মণিপুরীর নিজস্ব শব্দ পাচ হাজারর চুৰা।

মাতে গেলাংগা বিভিন্ন প্রকারর শব্দ এতা দৃষ্টান্ত খানিলো
পরিষ্কার করিক—

সংস্কৃত শব্দ—অত্যন্ত, অদ্য, অদৃষ্ট, অধম, উপদেশ, উপদ্রব, কারণ, গুণ,
চরিত, ছিদ্র, জ্ঞান, ভিত্তি, বিপদ, রাজা, শাস্ত্র, হেলা ইত্যাদি।

অন্যান্য ভাষার লগে মিল তম্ভব বা সংস্কৃতজাত শব্দ—আখর, আখি (মা.),
আগ, আদা, আংঠি, কালি, কুকারা, কঙাল, খেড়, গাঠি, ইন্দারা, উজ,
কলো, কাকালি, গাত, চরিত, পুখুদি, বিয়ান, বাখান, বামন, বেত, বেলুকা
সিকল, হিল, হিয়ান, ইত্যাদি।

মেইতেই শব্দ—অঙ, ইরলপা, উমেই, কাঙা, কাঙথল, খম, খাম, চাঙ, চেপ,
ঠুম, ঠেম, তাঙ, থিনা, থঙ, থৌ, নেম, ফল, লাম, লেম, হু ইত্যাদি।

আরবী-পারশী শব্দ—আইন, আকুল, আলাদা, ইজ্জৎ, কম, কারখানা, তর-
কার, দফা, দেদার, পইসা, বইজ্জাত, বাগিহা, রাজিব, রান্দা, সিবেই, রুমাল
ইত্যাদি।

সংস্কৃতও হংকরা বিষ্ণুপ্রিয়া মণিপুরী নিজস্ব শব্দ— অট, অরিঙ,
আকসাটে, আহা, উহানা, কোঁল, জি, বুজন, বেইবুনি, বেঙ, মইলক, এবিল,
জালায়, জিনাকি, থকিত, সাজারাং, রৌ, হেঁজি ইত্যাদি।

মেইতেইন্ত হংকরা বিষ্ণুপ্রিয়া মণিপুরী নিজস্ব শব্দ— অইচা (রাওজা), অইথি-তামথি, অংনাথেংনি, আচা-আদাক, আঁঙল, আনাংসাইচৌ, ইলাক-বিলাক, ইলাফাম, ইসালপা, কেচালাং, কোরং, কোফাং, খাবিলালটুং, ডেইমারি, চেকরং, নামফা, মেইনিং ইত্যাদি ।

আরবী-পারশী হংকরা বিষ্ণুপ্রিয়া মণিপুরী নিজস্ব শব্দ—অদ্দ, নিকানি, ইঞ্জাম, ইসমালিক, গল্লা, (Palla=curl), চৌন্দা, জাঁশু, জিঞ্জুর, তাউত (reign, ইত্যয়ং), দইরাপ, নজীক, নদন (নৌ=new, তন=body), পতর (strength, পত্যার), বেরু, হেবানিয়া, হেমান ইত্যাদি । (ধন্যা-অক বিষ্ণুপ্রিয়া মণিপুরী নিজস্ব শব্দ—গগা, কেকানি, ডিকিডিকানি, থুরথুরানি, ফেরফেরা, বেরবেরা, হিরহির ইত্যাদি ।)

সন্দিগ্ধ বিষ্ণুপ্রিয়া মণিপুরী নিজস্ব শব্দ—আদুলা, কাবাই, কাতিয়া, কুকুনু, কেসারা (heap), গজ, চাঠি, ডুফা, ডেম ইত্যাদি ।

কুনো কুনো গিরিগিথানিয়ে মোর শব্দর হিসাবি এহান হুনিয়া নিশ্চয়ই খাঙ লাগলাঙ । আপনাগাছির মনে উঠের প্রশ্নহান এহান—আমার একে-বারে নিজস্ব শব্দ মাত্ৰ দুই হাজারর চুৰা বারো অন্যান্য ভাষাত আনিয়া নুৰা করে হংকরিয়া নিজস্বভাবে ব্যবহার করিয়ায়তা আরাক তিন হাজার চুৰা । এতাপারা ভাষা আহানর নিজস্ব শব্দ সম্পদ অইলো অমাটিক কম অইলতা ? কিন্তু অন্যান্য ভাষার শব্দ তথ্য বিচার করলে দেখতাঙাই—মূল মূল ভাষা অর্থাৎ সংস্কৃত, ইরাণীর ইত্যাদি ভাষা ছাড়া অন্যান্য হাবি ভাষারতাও এহানেই রীতিহান । এ অবস্থাত দিশ হাজার বিষ্ণুপ্রিয়া মণিপুরী শব্দর ভিতরে পাচ হাজার নিজস্ব শব্দ থানা উহান এ ভাষার শব্দ-সম্পদর দীনতাহানতে মোটেই নাগয়, বরং প্রাচুর্যহান ।

এবারে প্রশ্নহান অইলতায়—বিষ্ণুপ্রিয়া মণিপুরী শব্দ যদি হুন্দা এগি অর, উহান অইলে আমার সাহিত্যতে কিসাদে অইতই ? আমার ভিতরে দল আহানে হুন্দা ‘নিজর শব্দ, ‘নিজর শব্দ’ বুলিয়া মাততারা উতায় একেবারে মূরে আত দিয়া আঠুঠেটু ভাগিয়া বহিতায় । আসলে, যেতায় ‘আমার নিজর শব্দলো সাহিত্য করানি বুলিয়া চিকারি দিতারা

উভয় আমার শব্দ কিতারে মাততর, হারনাপাছি । তান্দুর মতে, 'মাতৃভাষা' এহান আমার ঠারহান নাগর, আমার ঠারহান উনি 'ইমাঠার' । কিন্তু হার পানি থকর—'ইমা' শব্দ উগো মেইতেইগো, বারো 'ঠার' শব্দ উগো প্রাচীন বাংলাগো । 'গামছা' শব্দ এগোরে বাংলা শব্দগো বুলতারা, 'খুন্তেই' বা 'ফিতুপ' উতা উনি আমার ঠারহানি । কিন্তু এ শব্দ দিয়োহানিও মেইতেই শব্দহানি । 'কাগজ' শব্দ বাংলা, 'চে' শব্দ মেইতেই; 'দরজা' শব্দ আরবী-পারশী, 'থংচিল' শব্দ মেইতেই । কই আমার শব্দ বুলিয়ারতাতে কুংতা ? সুতরাং 'হুন্দা আমার শব্দলো সাহিত্য করানি' বুলতারা । উভয় আমার শব্দ কুংতা আঙুলি দিয়া দেখরা নুরারতর । মোর আসল বক্তব্যহান এহান যে আমি যেতা যেতা শব্দ ব্যবহার করিয়ার, উভয় আমার ঠার; উতা বেপেরতো আহক, উহান আমার বিচারর কুনো প্রয়োজন নেই । চেয়ার, টেবিল, টেলিগ্রাম, টেলিফোন—এতা হাবি আমার ভাষা, আমার শব্দ; কারণ শব্দ এতা আমি ব্যবহার করিয়ারতা । সুতরাং অগে যেতা বাংলা বা মেইতেই বুললাঙ উতা হাবিও আমার ভাষা; এতারে যোগের যেসাদে পারতারা উসাদে প্রয়োগ করোকা । আরাক শব্দ আকতা আছে, যেতা আমি সচরাচর ব্যবহার নাকরিয়ার কিন্তু কুনো কুনো সাহিত্যিকে অন্যান্য ভাষান্ত আনিয়া ব্যবহার করতারা । যেতায় দা আমার শব্দলো সাহিত্য করানি বুলিয়া চিকারী দিতারা গিরিগিথানিয়ে এজাত সাহিত্যিক উতারে ভাষার শত্রু বুলিয়া নির্দেশ করতারা বারো ঘণার চক্ষে দেখতারা । উতারে উদ্দেশ্য করিয়া মাতৌরিতা—সাহিত্য বারো ভাষার অগ্রগতির ধারা হার-নাপেইলে এসাদে সমালোচনা করতারা । আমার সুপরিচিত বাংলা ভাষাদে চেইলে দেখতাঙাই—ঈশ্বরচন্দ্র বিদ্যাসাগর, মধুসূদন দত্ত, রবীন্দ্রনাথ ঠাকুর, নজরুল ইসলাম গাছির যুগর আগে বাংলার শব্দ ভাণ্ডার বর্তমানর অধেকৌ নাছিল । এ সাহিত্যিক গিরিগিথানিয়ে সংস্কৃতত অবাধে শব্দ আনিয়া ব্যবহার করলা, নজরুল ইসলামে অবাধে অসংখ্য শব্দ পারসীও আনিয়া ব্যবহার করল । ফলে বাংলায় শব্দভাণ্ডার দ্রুত গতিত বাড়ানি অকরল । আজি হিন্দির অভিধান আলোচনা করলে দেখতাঙাই—প্রতি সংস্করণে শব্দ সংখ্যা বাড়ে । কারণ, অন্যান্য ভাষান্ত হিন্দিয়ে হরদর শব্দ সংগ্রহ

করাত আছে। এসাদে বিস্তৃত দৃষ্টিভঙ্গিলো চেইলে দেখভাঙাই
 অগাঢ় ভাষাত শব্দ নেনা উহান ভাষার সম্পদহান। কুপমণ্ডুর
 দৃষ্টিলো চেয়া ভাষার এ অগ্রগতির পথ কদ্ধ নাকরেদিয়ে।
 রসভেদে শব্দ ভেদ অর, বিভিন্ন রস ফুটানিরকা নিজর পরিচিত
 শব্দলো সত্ত্ব নার। ফলে অগাঢ় ভাষাত আনানি লাগের।
 প্রেম কথার অর্থ উহান বানা কথালো না ফুটের; আকাশ শব্দর
 অর্থহান হাগ কথালো না ফুটের চরণ শব্দত যে ভক্তি ভাবহান
 আহের উহান জাঙ শব্দত না ফুটের। সুতরাং, সাহিত্যিকগোয় যে
 ভাবহান বা রসহান ফুটানি মনার, উহানাত উপযুক্ত শব্দ আনিয়া
 লাগেইতই। উহানাত সফল আছে নানাছে বিচার করে পারিয়ার,
 কিন্তু শব্দ এগো আমার আপাব-পারগো না আমার হেকনাপা জাত
 রগো, উহান আমার বিচার্যহান নাগয়। এ বিষয়ে বিভিন্ন প্রবন্ধত
 মি মাতে গেছুগা, উহানে এ বিষয়লো মিয়াম বিস্তৃত নাকরিঙ।

সাহিত্যরস ফুটানিরকাও অক, যে কারণেও অক, অগাঢ়
 ভাষাত শব্দ আনিয়া নিজরতা করে পারানির শক্তি উহানেই
 ভাষা আহানর বলিষ্ঠতাহান। এবং এ প্রসঙ্গে মি গর্বসহকারে
 মাতানি পারুরি যে, এ শক্তি এহান বিষ্ণুপ্রিয়া মণিপুরীত যতহান
 আছে, অতি কম ভাষারহাই ততহান শক্তি আছে। কারণ
 ভাষা এহান সংস্কৃতত উৎপন্ন অন্য অগাঢ় সংস্কৃতজ ভাষার লগে
 অতি নিকট সম্বন্ধ আছে, অতাদিকে অনেক হাজার বছর মেইতেইর
 লগে বসবাস করানিয়ে মেইতেইত হাজার হাজার শব্দ নিয়াছিগা।
 উহানে এ ভাষায় আকবেদে অসমীয়া, হিন্দি, বাংলাও শব্দ
 নেরগা, অতগদে মেইতেইত। ফলে আমার সাহিত্যর এ শৈশব
 অবস্থাতো আমার শব্দভাণ্ডার মোটেই কম নাগয়। এ প্রসঙ্গত
 তুলনা করিয়া চেইবাঙ—বিষ্ণুপ্রিয়া মণিপুরীর শব্দভাণ্ডার
 বর্তমানেউ ত্রিশ হাজার, অথচ এ সাহিত্যত বহুগুণে উন্নত
 মেইতেই ভাষার শব্দভাণ্ডার মাত্র পচিশ হাজারর চুগা।

বিষ্ণুপ্রিয়া মণিপুরীর শব্দভাণ্ডার এ প্রাচুর্য এহান সমার্থক শব্দ
 কংগোর দৃষ্টান্তলো হারপেইক—দরজা, ছরার, খঙচিল ; বই,
 লেইরিক ; অন্দর, কমুঙ ; শঙ্কা, মইবঙ, মইপুঙ ; পাণ্ডড়ি,
 কয়েত ; বাগজ, চে ; চকি, কাম, কাঙথল ; গামহা, খুন্তেই.
 পাঁচালি, ইরুফি ; নপুর, খংচি ; বেছুনি, উমেই, পাখা ; খুড়ী,
 ইমাতোন, ইন্দোন ; বইজি, বোদি, ইতেইমা ; দানা, তাদা ;
 কেইচম, হুতি ; ইনাফি, চাদর, উরনা ; তলপুতি, চাকচাবী ;
 আঁত্রাবি, লাঙো ; হিয়াল, লামুই ; ছরাত, মুকখু, বালিফু ;
 বারান্দা, মাঙকল ; রাণাবর, চাকশাঙ, চাকুম, চাকাম ; পরদা,
 যুহান ইত্যাদি। এসাদ অসংখ্য উদাহরণ আছে। ভাষার এ
 অসংখ্য শক্তি এহানরে কামে লাগেয়া অগাচ্চ ভাষার শব্দ আনিয়া
 এ ভাষার সমৃদ্ধ করতারা, উতাই এ ভাষার যথার্থ সেবাবী,
 উতাই যথা সাহিত্যসেবী। বেতার এ শক্তির ব্যবহার না
 করতারা, বারা যে শব্দহানি আছে উতালো থানা মনেইতারা,
 ঐ সকল দৃষ্টিন্দ্রিয়া গিরিগিথানি উতা এ ভাষার পরম শত্রু—
 এহান মি স্পষ্ট ভাবালো মাতুরি। আজি সাময়িক উত্তেজনালো
 হারনাপেইলেউ, সমাজর বৈজ্ঞানিক দৃষ্টিভঙ্গি খুলতই উবাকা
 হারপেইতাউই।

এবার বিষ্ণুপ্রিয়া মণিপুরী ভাষার শব্দভাণ্ডারে মেইতেই
 উপাত্তান সম্বন্ধে কথা আহানি মাতিঙ। বিষ্ণুপ্রিয়া মণিপুরীত
 মেইতেইর দান এতো মিথাম বে, মেইতেইর জ্ঞান নেয়োইলে
 বিষ্ণুপ্রিয়া মণিপুরী ভাষার যথার্থ জ্ঞান পানা সম্ভব নেই, কারণ
 শব্দ আগোর ভিতর কি অর্থ লুকেয়া আছে উহান হারপানিরকা
 মেইতেই জ্ঞান অবশুপ্রাপী। শব্দ কতোহানলো এ কথা এহানর
 তাৎপর্যহান হারপেইক—মইপুঙ (মরাই=মুখ, পুঙ=বাত),
 শেলপুঙ (শেল=বাত, পুঙ=বাত), শেলপাচ (শেল=বাত,
 পাক=চেষ্টা), লুংচ (লুঙ=হিল, পাক=চেষ্টা), লুংচেং

(লুঙ = হিল, চেঙ = টুকারা), পাচেঙ (পা = বাহা, নাগা পাই, চেঙ = টুকারা), পালাঙ (পা = বাহা, লান = বুলানি), ফাকলান (ফাক = ডাম, লান = বুলানি), লিফাক (লি = বেত, ফাক = ডাম), লিচেই (লি = বেত, চেই = লাঠি, বেত), খঙচেই (খঙ = জাঙ, চেই = মালা), খঙচেং (খঙ = জাঙ, চেং = অবস্থা, নাপনি), ফিজ়েং (ফি = ফুতি, চেং = অবস্থা, নাপনি), ফিজাঙ (ফি = পুতি, শাঙ = ডাঙর)।

এসাদে প্রায় চারি হাজার মেইতেই শব্দ মি মোর অভিধান উহানাত ব্যাখ্যা করে গেছুগা। দৃষ্টান্ত মিগাম করিয়া সময় না খেদিক। মাহানি বাহুল্য, মেইতেই শব্দ এতায় আমার ভাষা এহানরে অভাবনীয় সম্পদ দিয়া গেছেগা। বর্তমানে বাংলা ভাষা ভামকরানির ফলে মেইতেই শব্দর মাধুৰ্য্য আমি দিনে দিনে পাহরে ধিয়ারগা। শব্দ বতোহানর তুলনামূলক আলোচনা করলে মেইতেই শব্দর মাধুৰ্য্যহান পরিষ্কার অইতই। ইতেইমা শব্দর অর্থহান যোগারে মালকগোর সাদে সম্বন্ধযুক্ত করেছি (ই = মোর, তেই = সম্বন্ধ, মা = ইমা); এ অর্থ এহান বইজি বা বৌদি শব্দয় নাদের। ইন্দোল শব্দর অর্থ হুকাং ইমা (ইমা = মা, তোল = হুকাং); এ অর্থ এহান কাকী বা খুড়ী শব্দয় নাদের। ইচেম শব্দর ভিতরে যে সম্মানহানর ছোতনা অর, উহান বড়দি' শব্দয় নাদের। বিষ্ণুপ্রিয়া মণিপুরী ভাষারে সমৃদ্ধ করানিরকা এসাদে অসংখ্য মেইতেই শব্দর প্রয়োজনতা আছে।

অন্যান্য ভাষাও শব্দ আনলেগা ভাষার অপমান বুলতারা উহা সংকীর্ণদৃষ্টিসম্পন্ন, উহা ভাষার অগ্রগতির পরম প্রতিবন্ধী। যেতার অন্য ভাষাও শব্দ আনলেগা ভাষার স্বাতন্ত্র্য নষ্ট অইতই বুলতারা উহায় ভাষার বারো সাহিত্যর মর্ম হারনাপাছি। অগ ভাষাও শব্দ আনলেগা ভাষার স্বাতন্ত্র্য নষ্ট নার। যে কুনো সাহিত্য আলোচনা করলে দেখতাগাই। কবিশুদ্ধ রচনা

ঠাকুরর কবিতা টুংকা আহান মাতিক—

“পতন অভ্যাদয় বন্ধুর পন্থা যুগ যুগ ধাবিত যাত্রি।

হে চির সারথি, তব রথ চক্রে মুখরিত পথ দিন রাত্রি ॥”

এপেয় বাংলা শব্দ আকগো নেই, হাবি সংস্কৃত। অথচ এসাদে ইকরিয়া কবিগুরুরে বিশ্বকবি অয়া গেলগা বারো বাংলা সাহিত্যরে উন্নতির চরম শিখরে তুলে দিয়া গেলগা। আসল কথাহান—প্রত্যেক ভাষার নিজস্ব কাঠাম আহান আছে, উহানাত আনিয়া অন্য ভাষার শব্দ উতা যথাযথভাবে জুড়া দেনা পারলে সাহিত্য এবং ভাষা সমৃদ্ধ অরতা।

উহানলো লমইতেগা বিষ্ণুপ্রিয়া মণিপুরী লেখক গাছিরে মাতানি মনাউরিভায়—অর্থ, রস ইত্যাদির বারাদে দৃষ্টি থয়া যতো পারোরায় অন্যান্য ভাষাত শব্দ আনোগা, আমার ভাষার সম্পদ বৃদ্ধি করো।

বিষ্ণুপ্রিয়া মণিপুরী সাহিত্যের ভাষা

গেলগা কালি মালিগাওঁত কীর্তন হুনতে গায়ক গিরক গাহিরে
দিলা এলা উতার পদাবলীত শব্দযোজনা সম্বন্ধে কীর্তনর গিছে আমার
ভিতরে খানি আলোচনা অইল । ঐ সময়ত নীলমাধব মুখার্জী গিরকে
আজিকার অনুষ্ঠান এহান অকরানির আগে এ সম্বন্ধে খানি মাতানিরকা
মোরে মাতলো, উহানে ঐ সম্বন্ধে দুহান আহান কথা মাতিঙ । এবং
এ বিষয় এহান সম্বন্ধে কথা মাততে গিয়া মোর সম্বন্ধেউ কথা আহানি
মাতাত বাধ্য অইতো ; উহানলো হাবিরাঙ মাপ চাউরি ।

মি ওম, ওঁচ মানে থাইতেঙ বিষ্ণুপ্রিয়া মণিপুরী ভাষালো প্রবন্ধাদি
রচনাত আত্মনিরোগ করেছু । ঐ সময়ত পুরি আজ পেয়া মোর বিরুদ্ধে
ডাঙর অভিযোগ আহান—মোর রচনাত টান বাংলা মিরাম হমার, উনাদে
অইলে আমার ভাষার অস্তিত্ব বা স্নাতক নেয়ইতই, ইত্যাদি । এজাত
সমালোচকর কথাহান অইলতার—যতদূর সম্ভব নিজর আদত শব্দলো
সাহিত্য করানি । সাহিত্য সমালোচনার দৃষ্টিলো এহান অত্যন্ত নিম্নমানর
সমালোচনাহান এবং আশা কেরেছিলু, বহির্জগতর লগে পরিচিতির লগে
লগে এজাত ভাবধারা সেচিরা যিতইগা । অবশ্যই খানি খানি যান্না আরম্ভ
বয়েছে । তিন চারি বছর আগে হুনলাও এলায়, আজিকার এলায় শব্দ
যোজনা অনেক তঙাল অয়া আহের । কালি ব্রজকুমার সিংহ গিরকর এলা
বতোহান হুনিয়া মোরতা এ ধারণাহান অইল । কিন্তু এরাবাউ অধিকাংশ
মানুহর দৃষ্টিভঙ্গিহানেই এহান যে নিজর আদত শব্দলো সাহিত্য ইকরানি ।
সুতরাং, এ বিষয়ে আলোচনার যথেষ্ট প্রয়োজন আছে ।

আলোচনাত হমানির আগে শব্দ, অর্থ বারো রস এ বস্তু এহান
সম্বন্ধে খানি আলোচনা করানি লাগই । প্রাচীন ভারতীয় ঋষিয়ে মাতিয়া
গেইগা—“একঃ শব্দ সম্যগ্ সুপ্রবুদ্ধঃ সর্বগে লোকে কামধুগ্ ভবতি ।”
শব্দ আগো যথার্থ হারপেইলে অর্থঃ শব্দ আগোর অর্থহান কিহান বাজো

ও অর্থের লগে কাব্যের আত্মা যে রস ও রসের লগে সম্বন্ধহান কিহান, উহান হারপেইলে শব্দর সর্গের কামধেনুর সাদে ফল নের । শব্দতত্ত্ব অতি গভীর, হুদা বাহিরর শব্দ বা অর্থলো শব্দতত্ত্বর যথার্থ বিচার নার, শব্দতত্ত্ব বিচার করতে গেলেগো আসল শব্দর আত্মা রসর বিচার করানি লাগের । কাব্যতত্ত্ববিদে মাততারা—শব্দ বারো অর্থ এতা অইলতায় কাব্যলক্ষ্যর দেহগো, আত্মাগো অইলতায় রস । রস উহান অভিযুক্ত অরতা যথার্থ শব্দ বারো অর্থের মাধ্যমে । বারো এহান হাবিও স্বীকার করতাঙাই যে আমি কাব্য বা সাহিত্য করিয়ারতা রস আহান অভিযুক্ত করানিরকা, সুতরাং আসল লক্ষ্যহান রস, শব্দ অইলতায় ও রস অভিযুক্তির উপকরণ আহান । আপ্পানে হবা হবা শব্দ কতোগো লাগেইলে কাব্য নার । আন্দ, বান্দ, ফাল কতোহান দিলে নাছাহান নার, ও ফাল উতার ভিতরে যেবাকা ভাল আহান থাইতই, পরস্পর সঙ্গিত আহান থাইতই এবং বিশেষ রস আহানর অভিযুক্তি করতই, উবাকা উহানরে নাছাহান বুলিয়ার । উসাদে শব্দর ভিতরে যেবাকা পরস্পর সঙ্গিত থাইতই এবং ও শব্দর বিশেষ রস আহান অভিযুক্ত করতই, উবাকা ও শব্দসমষ্টিরে কাব্য অরতা ।

বিশ্ব সৃষ্টির বারাদে চেইক—বিশ্বর মূল কারণ ব্রহ্মউগো রস স্বরূপ, ও রসস্বরূপ ব্রহ্মত্ব পইলা নিকুলেরতা আকাশ বা শব্দ । শব্দতত্ত্ব রসর উৎপত্তি অরতা নাগয়, শব্দর মাধ্যমে রস অভিযুক্ত অরতা । রস আগে শব্দ পিছে । আরাক আকবেদে চেইবাঙ—এ শব্দতত্ত্বর অছেতা শিবর ডমরু, শব্দতত্ত্ব আহেরতা শিবরাংতো । শিব শব্দর বুঝারতা জ্ঞান । উহানলো জ্ঞান যেসাদে শূন্য, পবিত্র, শিবো উসাদে শূন্য । এবং বৈষ্ণবতত্ত্ব হারপাছি পিরিগিথানিরে হারপেইতাঙাই, ও শিাই অবিত, পরতত্ত্বর পইলাকার তত্ত্বহান । উহানলো চেইবাঙ বিদ্যাদেবী সরস্বতী গিথানকর লগে অছেতা হংস, পবিত্র আত্মার প্রতীক, আরাক আকবেদে বীণ harmoni । পবিত্র আত্মা বা রস উহান যেবাকা শব্দর মাধ্যমে harmoniously সঙ্গীতপূর্ণভাবে নিকুলের উবাকা কাব্যর উদ্ভা অরতা । উহানলো কাব্য

করতে গেলো রসবোধের দরকার, এবং যোগেরতা অর্থবোধ আছে বারো
রসের লগে শব্দের harmony বা সম্বন্ধের জ্ঞান আছে উগোয় যথার্থ
কবিগো অর ।

এবারে আসল কথাহানাত আঁহিক । আমার সমাজে পূর্বোক্ত
সাহিত্যিক বারো সমালোচকের দৃষ্টি খারতা হুদা শব্দের বারাদে, অর্থ
এবং রসের বারাদে তানুর দৃষ্টি নেই । কিন্তু অর্থভেদে বারো রসভেদে
যে শব্দ যোজনার ভেদ অন্য লাগের, উহান অতি স্পষ্টহান, উহান
হারপানি লাগের । সাধারণ দৃষ্টান্ত কতোহান লইক—পানি বারো জল
দিয়ো শব্দটু ব্যবহার করিয়ার ; দিয়ো শব্দয়ৌ বুঝারতা water ।
কিন্তু দিয়ো শব্দের ভিতরে রসভেদ আছে । সাধারণ ব্যবহারে ‘পানি ফুটি
দে’ বুলিয়ার, বৈষ্ণব সেবা করিয়ার সময়ত ‘জল ফুটি দে’ বুলিয়ার ।
চরণ বারো জুও দিয়ো শব্দয়ৌ অর্থ আকহান, কিন্তু রসভেদে প্রয়োগ
ভিন্ন ভিন্ন । সাধারণ প্রয়োগে মাতিয়ারতা ‘জাঙহানি ধবেলা’, খমহামফামে
জাঙ ধনার উপের মাতিয়ারতা ‘চরণ ধৌত কর’ বুলিয়ার । এসাদে সাধারণ
প্রয়োগে ‘ভাত খানা’ বুলিয়ার, দৌরাঙ কাতকরা ভাত খানা অইলে
মাতিয়ারতায় ‘প্রসাদ লকরানি’ । এসাদে জল, চরণ ধৌত, প্রসাদ লকরানি,
এ শব্দ এতার ভিতরে ভিত্তির ভাব আহান খার । লপদুকেন্তু আহের বুজন
উগোরে চরণ ধৌত কর বুললে, বা হোটোলে ভাত খেয়ার উবাকা প্রসাদি
করিক বুললে রসবোধে ব্যাঘাত অর । কালি হুনলাঙ এলা উতার ভিতরে
ফাম কতোহানাত রসের অত্যন্ত ব্যাঘাত ঘটানিয়ে হুনানিহান মিয়াম সাকীত
লাগিল । দৃষ্টান্ত আহানি দিক—রাধায় কৃষ্ণরকা অনুরাগে আছে সময়
উহানাত পদকর্তায় মাতেরতা—‘হুনে গিথানকে, কাবু করেছে গিরকে’
ইত্যাদি । পথরদুন্দর এলা দিতে কৃষ্ণ গোপীয়ে মাতেরতা, ‘আনিকা কথা
না মাতিয়ো’ বুলিয়ার । এ ‘আনিকা’ শব্দ এহানেই আনিকা কথাহান,
এহানে রাধাকৃষ্ণর প্রেম উহানরে অপবিত্র করে দেয় । কৃষ্ণ গোপীয়ে
‘পদরীজেনেই’ বুলিয়ার মাতের, গোপীয়ে কৃষ্ণে ‘গাবুরাপুরা’ বুলিয়ার
মাততারা । গোপীয়ে কৃষ্ণে আকখরদুম ‘কটগো দিলে ফটগো নিকুলতই’

বুলিয়া মাতলা । কুনো আবদিন গোপী বারো কৃষ্ণ বিতর্কিত গোপীয়ে
 কৃষ্ণে টিকির লগে উপমা দিতে হুনেছিলাঙ । এ প্রত্যেকহান কথা রসবোধর
 অত্যন্ত হানিকর । যে গোপীয়ে কৃষ্ণর সাধারণ মূর কামারানিহান অছে
 বুলিয়া হুনিয়া ঔচিত্য অনৌচিত্য বিচার না করিয়া নারদরাঙ কৃষ্ণরকা
 নিজর জাঙর ধূলি দেনারকা অগ্রসর অছিলা, ঔ প্রাণেত্ত প্রিয় কৃষ্ণরে
 কট দেনার কথা তানূর থতান্ত আহে নুঝারের । ‘গাবুদাপুদু’, পুদু-
 জেলেই’, ‘হুনে গিথানকে’ ইত্যাদি কথা এতা হুনলে মনে অরতা শ্রীরাধা
 এগো যেন চরিত্রহীনা বহক আগো, গোপী উতাও উসাদে চঞ্চল স্বভাবা
 নিঙোল আকতা, বারো শ্রীকৃষ্ণ উগো যেন নিঙোলর প্রতি আকৃষ্ট চরিত্রহীন
 যুবক আগো । মনে অরতা যেন সিনেমা চানাত যিতারাগা নিঙোল
 বতোগোরে পথে পেয়া কৃষ্ণ বুলিয়া গাবুদাপুদু আগোয় ফাত্মি
 কেরেরতা । আজি কালিকার কীর্তনে যে এসাদে পরিবেশ আহানর সৃষ্টি
 অর, উহানর বিরুদ্ধে মি প্রচণ্ডভাবে প্রতিবাদ করুনি । বৈষ্ণব তত্ত্ববিদে
 জানি, রাধা কৃষ্ণর প্রেম এহান কীর্তি নির্মল । ঔ প্রেমে দেহবোধ নেই,
 প্রেম অরতা আত্মায় আত্মায় । জাগতিক প্রেমরে প্রেম বুলিয়া মাতানি
 উহান প্রেম শব্দর অপমানহান । এ প্রেমে হৌ প্রেমর বিন্দু আহানৌ
 নেই ; বরং এহান প্রেমর সম্পূর্ণ বিপরীতহান—

“কাম আর প্রেম দোহে, বহুত অন্তর ।

কাম অন্ধতম প্রেম নির্মল ভাস্কর ॥”

অমার্টিক নির্মল প্রেম উহানরে সাধারণ জগতর গাবুদাপুদু-পুদু-জেলেইর
 প্রেমে পরিণত করানি উহান অত্যন্ত আপত্তিজনক । কীর্তনে যতই রসিকতা
 করিক, প্রতিহান কথার ভিতরে এ চিন্তা এহান খনা লাগতই যে রাধা
 কৃষ্ণর প্রেম উহান দৈব প্রেমহান, উহানাত মলিনতার বিন্দু আহানৌ নেই ।
 শ্রীকৃষ্ণর প্রেম বর্ণনা করতে গিয়া শ্রীধর স্বামীয়ে মাতেছে—“ব্রহ্মাদি জয়
 সংরুঢ় দর্প কন্দর্পদর্পহা ।” অর্থাৎ যে কামদেবে ব্রহ্মারেউ জয় করেছিল
 ঔ কামদেবর দর্প চূর্ণ করেছিলতা ভগবান শ্রীকৃষ্ণ ।

এ পবিত্র প্রেম বা ভক্তিরস উহান চেৎকরে ধরিয়া ঔ প্রেম প্রকাশ

করানিরকা যে যে শব্দ উপযুক্ত, উতা যে কোনো ভাষাত্তৌ অক আনিয়া
যোজনা করানি লাগের । উপের 'এগোতে বিষ্ণুপ্রিয়া মণিপুরী' শব্দগো,
এগোতে নাগর' বুলিয়া শব্দর বংশ বিচার করলে নাইতই । এবং উহানরকা
আমারতা সংস্কৃত বা বাংলাত্ত স্বাধীনভাবে শব্দ আনিয়া ব্যবহার করানি
লাগতই ।

আরাক হাস্যকর ব্যাপার আহান, যেতারে আমার গিরিগিথানিয়ে
বাংলা শব্দ বুলতারা, উতায় শতকড়া ৯০ ভাগ সংস্কৃত শব্দ এবং ভারতীর
যে কোনো সাহিত্যর উন্নতি করতে গেলেনা এসাদে সংস্কৃত শব্দ স্বাধীন
ভাবে আনানিই লাগতই । বাংলা ভাষা উন্নত অছেতা সংস্কৃত শব্দ
ভাণ্ডারলো —

“পতন অভ্যুদয় বন্ধুর পন্থা যুগ যুগ ধাবিত যাত্রী ।

হে চির সার্থি তব রথচক্রে মূর্খারিত পথ দিন রাত্রি ॥”

এহান কবিগুরু রবীন্দ্রনাথ ঠাকুরর লেখা বাংলা কবিতাংন আহান ;
কিন্তু এপের বাংলা শব্দ শতকড়া দশ ভাগৌ নেই । কবি মধুসূদন দত্তর

‘মেঘনাথ বধ’ বাবা খুললে পা । অহানাত আট-দশগৌ বাংলা শব্দ
নাপেইতাঙাই । এ গিরক গাছিয়ে কিয়া এসাদে করেহিত ? রসসুতিকা ।
বিশেষ রস আহান প্রকাশ করতে যে যে শব্দ লাগের, উতা তান্দ
নির্বিচারে সংস্কৃতত্ত আনিয়া ব্যবহার করেছি । উহানেই তান্দর কাব্য
অমর অয়া অছেতা । ঠিক এসাদে, বিষ্ণুপ্রিয়া মণিপুরীর অমর সাহিত্য
রচনারতা সংস্কৃত শব্দ আনানি ছাড়া অন্য পথ নেই । বিশেষ করিয়া
বীররস, ভীতিরস বারো গভীর দার্শনিকতত্ত্ব ফুটানিরকা সংস্কৃতত্ত শব্দ
আনানিই লাগতই । অন্য রসে নিজস্ব শব্দলৌ চলের । রবীন্দ্রনাথ
ঠাকুরর আরাক কবিতা আহান চেইক —

“ভুতের মতন চেহারা যেমন নির্বোধ অতি ঘোর ।

যা কিছু হারায় গিন্নী বলেন কেঁটা বেটাই চোর ॥”

এপের সংস্কৃত শব্দ নেই বুল্লেউ যাকরের ; এপের অধিকাংশ শব্দই বাংলার
নিজস্ব । কিয়া ? রসহানে এসাদে নিজস্ব শব্দ বিছারার আরো । শরৎচন্দ্র


চট্টোপাধ্যায় গিরকে চলিত ভাষালোঁ সাহিত্য করেছে, উত্তম গভীর দার্শনিক তত্ত্বের কথা, বীররসের কথা নেই আরো । হাবি রস শব্দ আকতালো ফুটানি অসম্ভব । অধিকন্তু, আমি ‘বিষ্ণুপ্রিয়া মণিপুরী শব্দ’ বুলিয়া মারিত্যারতাহে, কিন্তু আদত বিষ্ণুপ্রিয়া মণিপুরী শব্দ দুই হাজারের গজে নেই । খেমন চেইক, দরজা—পারশিক, দুৱার—বাংলা, থংচিল—মেইতেই ; বই—বাংলা, লেইরিক—মেইতেই ; লেম—ইংরাজী, বাতি—বাংলা, থংমেই—মেইতেই । কই আদত বিষ্ণুপ্রিয়া মণিপুরী শব্দতে ? মোর কথাহান অইলতায়, শব্দ আদত বিষ্ণুপ্রিয়া মণিপুরী অক বা নাক, আমি যেতা ব্যবহার করিয়ার, যেতালো আমার অর্থবোধ অর, উতা হাবি বিষ্ণুপ্রিয়া মণিপুরী শব্দ । এ দৃষ্টিলো চেইলে বিষ্ণুপ্রিয়া মণিপুরীর সাদে শব্দ ভাণ্ডার নিতান্ত কম ভাষারতাই আছে । কিয়া বুললে, আমি মেইতেন্তো শব্দ গ্রহণ করে পারিয়ার, বাংলা, সংস্কৃত বা অন্যান্য ঠারেন্তো আনে পারিয়ার । এবং মি অত্যন্ত গৌরব করিয়া মার্তোরি, বিষ্ণুপ্রিয়া মণিপুরী ভাষার সাদে প্রচণ্ড গ্রহণী শক্তি হিন্দীর


বাহিরে উত্তর ভারতীয় অন্য কোনো ভাষাত নেই বুল্লেউ যাবরের । এ প্রচণ্ড গ্রহণী শক্তি এহানরে ক্ষুদ্র দৃষ্টিভঙ্গিলো সীমিত করিয়া থনা উহান দূর দৃষ্টির পরিচয়হান নাগর । অন্য ভাষাত শব্দ আনলেগা ভাষার স্বাতন্ত্র্য নষ্ট অর বুলিয়া অনেকে মাততারা । উহান সম্পূর্ণ ভুল ধারণাহান । অন্য ভাষাত শব্দ আনলেগাহে ভাষার শক্তি বৃদ্ধি অরতা । ইংরাজী উন্নত অছেতা হুন্দা অন্য ভাষার শব্দলো ।

বক্তব্যহান দীঘল অযারগা ; মোর এলা টুকারা আহানর অর্থ বিচার করিয়া মোর বক্তব্যহান লমকরিও । মোর ‘বুল্দিরি মি মান্দু বিছারেয়া’—এলা উহানাত ববহত ‘ভালবাসা’, ‘দয়া’, ‘দরদ’, ‘আকাশ’, ‘বিরাট’, ‘মহান’—ইত্যাদি শব্দর বিরুদ্ধে মি অগে অভিযোগ হুনলু । কিন্তু হারপানি লাগতই যে ‘ভালবাসা’ শব্দত যে সাম্যভাব আহান থার, ‘বানী’ শব্দত উহান নাথার ; ‘দরদ’ শব্দত যে ভালবাসা, দয়া বারো সহানুভূতির সমন্বয় আহান থার, উহান অন্য শব্দত নেই ; ‘আকাশ’

শব্দয় যে অনন্ত space আহানর সূচনা করে, উহান 'হাগ' শব্দয়
নুঝারের ; 'মহান' বারো 'বিরাট' শব্দয় যে মহত্ত্বর সূচনা করে, 'ডাঙর'
শব্দয় উহান নুঝারের । সুতরাং, এপেরর ভাসবাসা, দরদ, আকাং, বিরাট,
মহান, দরদিয়া—এ শব্দ এতার যে কুনো আগো পরিবর্তন করলে মোর
ভাব উহান প্রকাশিত নাইতই ।

সুতরাং, মোর অনুরোধহান অর্থ বারো রসর বারাদে দৃষ্টি
নাতিয়া শব্দর সমালোচনা এহান বেলাদিক, এহান ডাঙর সংকীর্ণতাহান ।
বিশেষ করিয়া পদকর্তা গিরিগিথানির প্রতি অনুরোধহান, তানু যেন
রাধাকৃষ্ণর প্রেমরসর বারাদে দৃষ্টি থয়া ও রসবোধে ব্যাঘাত নাইবতা করে
পদ রচনা করে দেকা ।





অজা বাবাইসেনা প্রকাশনী

কদুধরম,

চেংকুড়ি, শিলচর-৭৮৮০০৭

আমি প্রকাশ করেছি লেখক—

- ১। রুবাইয়ৎ-ই-ওমর খৈয়াম—ধনঞ্জয় রাজকুমার
- ২। এলার মালা—ডঃ কালীপ্রসাদ সিংহ
- ৩। বিষ্ণুপ্রিয়া মণিপুরী ভাষাতত্ত্বের রূপরেখা—ডঃ কালীপ্রসাদ সিংহ
- ৪। ডিগল আতহানল মোরে—ধনঞ্জয় রাজকুমার
- ৫। সালই মনুঙেদে—অনিল কুমার সিংহ
- ৬। জরাসন্ধ—ইন্দ্রকুমার সিংহ
- ৭। ধনুবপদ—রাজেন্দ্রকুমার সিংহ
- ৮। অপরাধিতা—বিমল সিংহ
- ৯। মিকুপর চেরী ফুল—ধনঞ্জয় রাজকুমার
- ১০। অজা বাবুলোব—শ্যামানন্দ সিংহ
- ১১। সেন্সাস—ইন্দ্রকুমার সিংহ
- ১২। কাব্যময় এরে রাত্টি এহান—অভয় কুমার সিংহ
- ১৩। কনাক মাতৌ—শ্যামানন্দ সিংহ
- ১৪। খুন্তল (মিনি পত্রিকা)—বীণাপানি সিংহ (সম্পাদিকা)

যেতা প্রকাশ পানার পথে—

- ১। এলার মালা (পরিবর্ধিত ২য় সংস্করণ)—ডঃ কালীপ্রসাদ সিংহ
- ২। প্রবন্ধ মালা (২য় খণ্ড)—ডঃ কালীপ্রসাদ সিংহ
- ৩। কবিতা মালা—ডঃ কালীপ্রসাদ সিংহ

৪। BISHNUPRIYA MANIPURI—Dr K.P. Sinha
(Language, Literature & Culture)